

## Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

## लूका रचित सुसमाचार

लूका ईसू क जीवन क बरे में लिखस

१ बहोत स मनई हमरे बीच होइजाइ वाली घाटना क ब्यौरा लिखइ क कोसिस करेन ह।  
२ उहइ बातन हमका उ सबइ मनइयन क जरिये जान पड़िन जउन उ पचे सुरुआत स घटत देखेन अउर जउन सुसमासार क प्रचार करत रहेन।<sup>३</sup> हे मान्यवर थियुफिलुस! काहेकि मई सुरुआत स सब कछू होसियारी स पढ़ेउँ ह। एह बरे मोका इ नीक जान पड़त ह कि तोहरे बरे एक टु एक क बाद एक एक घटना क लिखेउँ।<sup>४</sup> जेसे तू सब इन बातन क बेफिकर होइके जान ल्या जउन तोहका सिखाइ ग अहइ।

जकरयाह अउर इलीसिबा

५ उ समइया में जब यहूदिया पहेरोदेस क राज्य रहा। हुवाँ जकरयाह नाउँ क एक याजक रहत रहा। जउन याजकन क अबिय्याह दल \*क रहा अउर ओकर पत्नी इलीसिबा हारून बंस क रही।  
६ उ दुइनउँ परमेस्सर क निगाह में धर्मी रहेन। उ पचे बिना कउनो दोख क पभू क सबइ हुकुमन अउर विधानन क पालन करत रहेन।<sup>७</sup> मुला ओनके कउनो संतान नाही रही, काहेकि इलीसिबा बाँझ रही अउर उ दुइनउँ बहोत बुढ़वा होइ ग रहेन।

८ जब जकरयाह क आपन दले क मन्दिर में याजक क काम खातिर बारी आइ, अउर उ परमेस्सर क समन्वा आराधना बरे हाजिर भवा।  
९ तउ याजकन में चली भइ रीति रिवाजे क तरह पर्ची डाइके ओका चुना गवा कि उ पभू क मन्दिर में जाइके धूप जरावइ।<sup>१०</sup> जब धूप जरावइ क समइ आइ तउ बाहेर एकट्टा भवा मनई पराथना करत रहेन।

११ उहइ समइया जकरयाह क समन्वा एक टु पभू का दूत परगट भवा। उ दूत धूप क वेदी क दाहिन कइती खड़ा रहा।<sup>१२</sup> जकरयाह जइसे उ दूत क निहारेस तउ उ घबराइ गवा अउर डर जइसे ओका जकड़ि लिहस।<sup>१३</sup> फिन सरगदूत ओसे कहेस, “जकरयाह जिन डेराअ, तोहार पराथना

सुनि लीन्ह गइ अहइ। एह बरे तोहार पत्नी इलीसिबा एक बेटवा क जनम देई, अउर तू ओकर नाउँ यूहन्ना धर्या।<sup>१४</sup> उ तोहका आनंद अउर खुसी देइ, साथे ओकरे जनम स अउर भी बहोत स मनइयन क खुसी होई।<sup>१५</sup> काहेकि उ पभू क निगाहे में महान होई। उ कबहुँ कउनो दाखरस या कउनो मदिरा क न पिई। आपन जन्म स पवित्र आत्मा स भरपूर होई।

१६ “उ इस्राएल क बहोतन मनइयन क ओनकइ पभू परमेस्सर कइती लौटइ बरे फेरी।<sup>१७</sup> उ एलिय्याह क आत्मा अउर सामर्थ में होइके परभू क अगवा अगवा चली। उ बापन क हिरदय ओनके संताने कइती मोड़ देइ अउर आज्ञा न मानइवालन क मने क बदल देइ जेहसे उ पचे धर्मी मनइयन क नाई सोचइ लागइ। इ सबइ, उ मनइयन क पभू बरे तइयार करइ क करी।”

१८ तबहीं जकरयाह दूत स कहेस, “मई इ कइसे जान लेउँ कि इ सच अहइ? काहेकि मई एक बुढ़वा हुँ अउर मोर पत्नी बुढ़िया होइ ग अहइ।”

१९ तबहि सरगदूत जवाब देत ओसे कहेस, “मई जिव्राईल हुँ। मई उहइ हुँ जउन परमेस्सर क अगवा खड़ा रहत हुँ। मोका तोसे बात करइ अउर इ सुसमाचार क बतावइ बरे पठवा ग अहइ।  
२० मुला देखा, काहेकि तू मोरे सब्दन प, जउन निश्चित समइ क आइ प सच सिद्ध होइहीं, बिसवास नाही किहा, यह बरे तू गूंगा होइ जाब्या अउर उ दिना तलक नाही बोल पउब्या जबहि ताई इ घटित न होइ जाइ।”

२१ ओहर बाहेर मनई जकरयाह क इतजार करत रहेन। ओकना अचरज भवा कि उ एँतनी देर मन्दिर में काहे ठहर गवा।<sup>२२</sup> फिन जब उ बाहेर आवा अहइ तउ उ ओनसे बोल नाही पावत रहा। ओनका इ लाग कि जइसे मन्दिर क भीतर कउनो दर्सन होइ गवा अहइ। उ गूंगा होइ ग अउर सिरिफ इसारा करत रहा।<sup>२३</sup> अउर फिन अइसा भवा कि जब ओकर आराधना क काम होइ गवा तउ जकरयाह वापस आपन घर लौटि गवा।

२४ थोड़े दिना बाद ओकर पत्नी इलीसिबा गर्भवती भइ। पाँच महीना तलक उ सबन स अलगइ रही। उ कहेस,<sup>२५</sup> “अब आखिर मैं जाइके इ तरह पभू मोर मदद करेस ह। मनइयन क बीच मोर लाज राखइ बरे उ मोर सुधि लिहस ह।”

\*१:५ अबिय्याह दल यहूदी याजकन २४ दलन में बँटा रहा। देखा १ इति. २४

### कुंवारी मरियम

२६-२७ इलीसिबा क छुटा महीना चलत रहा, गलील क एक सहर नासरत मँ परमेस्सर क दूत जिब्राईल क एक कुंवारी कन्या क लगे पटएस जेकर यूसुफ नाउँ क एक मनई स गोदी भरि दीन्ह गइ । उ दाऊद क बंस मँ जनमा रहा अउर उ कुंवारी कन्या क नाउँ मरियम रहा । २५ जिब्राईल ओकरे लगे आइ अउर कहेस, “तोह पइ अनुग्रह भइ अहइ, तोहार जय होइ । पभू तोहरे संग बा ।”

२९ इ बचन सुनिके उ बहोत घबरान, उ सोच मँ पड़ि गइ, “एकर का अरथ होइ सकत ह ?”

३० तब सरगदूत ओसे कहेस, “मरियम तू जिन डेराअ, तोसे परमेस्सर खुस अहइ । ३१ सुना ! तू गोड़वा स भारी होब्या अउर एक पूत क जनम देवू अउर ओकर नाउँ ईसू रखबिउ । ३२ उ महान होई अउर उ सबन त सर्वाच्च (परमेस्सर) क पूत कहवावा जाई । पभू परमेस्सर ओका ओकरे बाप दाऊद क सिंहासन दइ देई । ३३ उ अनन्त समइया ताई याकूब क घराने प राज करी । ओकर राज्य क नास कबहुँ न होई ।”

३४ एह पइ मरियम सरगदूत स कहेस, “इ सच कइसे होइ सकत ह ? काहेकि मई तउ अबहुँ कुंवारी हउँ ।”

३५ जवाबे मँ सरगदूत ओसे कहेस, “तोहरे लगे पवित्र आतिमा आई अउर सर्वाच्च (परमेस्सर) क सक्ती तोहका आपन परिछाहीं मँ लइ लेई । इ तरह उ जनम लेइवाला पवित्र पूत परमेस्सर क पूत कहवावा जाई । ३६ अउर इ भी सुनि ल्या कि तोहरे कुनबा क इलीसिबा क कुनबे मँ बुढ़ौती क गरभ मँ एक बेटवा अहइ अउर ओकरे कोखी क इ छुटा महीना चलत बा । लोग कहत रहेन कि उ बाँझ बा ! ३७ मुला परमेस्सर बरे कछून होइ सकइ, अइसा नाही !”

३८ मरियम कहेस, “मई पभू क दासी हउँ जइसा तू मोरे बरे कह्या ह, वइसा ही होइ !” अउर तब उ सरगदूत ओकरे लगे स चला गवा ।

मरियम क इलीसिबा अउर जकरयाह क लगे जाब

३९ उहइ समइया मरियम तइयार होइके यहूदिया क पहाड़ी पहेँटा मँ बसा एक ठु सहर क फउरन चली गइ । ४० फिन उ जकरयाह क घरे गइ अउर उ इलीसिबा क अभिवादन किहेस । ४१ इ भवा कि जबइ इलीसिबा मरियम क अभिवादन सुनेस तउ जउन बचवा ओकरे पेटवा मँ रहा,

उछरि गवा अउर इलीसिबा पवित्र आतिमा स सराबोर होइ गइ ।

४२ ऊँची आवाजे मँ चिल्लात भइ उ कहेस, “तू स्त्रियन मँ सबते जिआदा बड़भागी अहा अउर जउने बचवा क तू जनम देवू उ धन्य बा । ४३ मुला इ एतनी बड़ी बात मोरे संग काहे घटि गई कि मोरे पभू क महतारी मोरे नियरे आइ । ४४ काहेकि तोहरे पैलगी क सब्द जइसेन मोरे कनवा मँ आइ, मोरे पेटवा मँ बचवा खुसी स उछरि गवा । ४५ तू धन्य अहा जउन इ बिसवास किहेस कि पभू जउन कछू कहेस उ होइके रही ।”

मरियम क परमेस्सर क स्तुति

४६ तबहीं मरियम कहेस,

“मोरे प्रान पभू (परमेस्सर) क स्तुति करत ह ।

४७ मोरे आतिमा मोरे उद्धारकर्ता परमेस्सर मँ खुस भइ ।

४८ उ आपन दीन दास की बिटिया क सुधि लिहेस

अउर अब हौँ आजु क बाद

सबहिँ मोका धन्य कइहीं ।

४९ काहेकि उ सक्तीवाला मोरे बरे बड़कवा कारज किहेस ह ।

ओकर नाउँ पवित्र अहइ ।

५० जउन ओसे डेरात हीँ

उ ओन पइ पीढ़ी दर पीढ़ी दाया करत ह ।

५१ उ आपन बाँहन क सक्ती देखाइस ।

उ घमंडी मनइयन क ओनके डींग हाँकइवालन क बिचारन क छितराइ दिहेस ।

५२ उ राजन क सिंहासने स तरखाले उतार दिहस । दीनन क ऊँचा उठाएस ।

५३ उ भुखान मनइयन क नीक चीजे स भरपूर कइ देई

अउर धनी लोगन क निकारि देई ।

५४ उ आपन सेवकन इस्राएलियन क दाया कइर आवा

अउर हमरे पूर्वजन क बचन क मुताबिक ।

५५ ओका इब्राहीम अउर ओकर संताने प सदा दाया देखावइ क याद रही ।”

५६ मरियम कउनो तीन महीने ताई इलीसिबा क संग ठहरी रही अउर फिन आपन घरवा लौटि आइ ।

यूहन्ना क जनम

५७ फिन इलीसिबा क बचवा पइदा करइ क समइ आइ अउर ओकरे एक बेटवा पइदा भवा ।

५८ जब ओकर पड़ोसी अउर ओकर नातेदार सुनेन कि पर्भू ओह प दाया देखाइस ह तउ सबइ साथे मिलिके खुसी मनाएन।

५९ अउर फिन अइसा भवा कि अठवें दिन बचवा क खतना खातिर मनइयन हुवाँ आएन। उ पचे ओकरे बाप क नाउँ क मुताबिक ओकर नाउँ जकरयाह धरइ जात रहेन, ६० तबहीं ओकरे महतारी बोल पड़ी, “नाहीं एकर नाउँ यूहन्ना रखा जाब अहइ।”

६१ तब उ पचे ओहसे बोलेन, “तोहरे कउनो भी नातेदार का इ नाउँ नाहीं बा।” ६२ अउर फिन उ पचे इसारन मँ ओकरे बाप स पूछेन, “उ ओका का नाउँ देइ चाहत ह?”

६३ एह प जकरयाह ओनसे एक ठु तख्ती माँगोस अउर लिखेस, “एकर नाउँ अहइ यूहन्ना।” एह पइ उ सबइ अचरजे मँ पड़ि गएन। ६४ तबहीं फउरन ओकर मुँह खुलि गवा अउर ओकर बाका फूटि गवा। उ बोलइ लाग अउर परमेस्सर क स्तुति करइ लाग। ६५ एहसे सबइ पड़ोसी डेराइ गएन अउर यहूदिया क समूचइ पहाड़ी पहाँटा मँ मनइयन एँकरे बारे मँ बतियाई लागेन। ६६ जउन कउनो भी इ बात सुनेस, अचरजे मँ पड़िके कहइ लागेन, “इ गदेला का बनी?” काहेकि पर्भू क हाथ ओह प अहइ।

### जकरयाह क स्तुति

६७ तब ओकर बाप जकरयाह पवित्तर आतिमा स सराबोर होइ गवा अउर उ भविस्सवाणी किहेस: ६८ “इस्राएल क पर्भू परमेस्सर क आसीस होइ काहेकि उ आपन मनइयन क मदद बरे आवा अउर ओनका आजाद कराएस।

६९ उ हमरे बरे आपन सेवक दाऊद क परिवार स एक उद्धारकर्ता दिहस।

७० जइसा कि उ बहोत पहिले आपन पवित्त नबी स वचन देवाँएस।

७१ उ हमका हमार दुस्मनन स अउर ओन सब क हथवन स,

जउन हम स घिना करत रहेन, हमका छोड़ावइ क वचन दिहस।

७२ हमरे पूर्वजन प दाया देखावइ क अउर आपन पवित्तर बचन क याद रखइ क।

७३ ओकर बचन रहा एक उ सपथ जउन हमरे पूर्वजन इब्राहीम क संग लीन्ह गइ रहिन,

७४ कि हमार दुस्मनन क हथवन स हमार छूटकारा अउर बेडर क पर्भू क सेवा करइ क हुकुम दीन।

७५ अउर आपन जिन्नगी भर हर रोज ओकरे समन्वा हम पचे पवित्तर अउर धर्मी रहि सकी।

७६ “हे बालक! अब तू सर्वोच्च (परमेस्सर) क बड़ा नबी कहा जाइ

काहेकि तू पर्भू क अगवा अगवा चलिके ओकरे बरे राह तइयार करी।

७७ अउर ओकरे मनइयन स कही कि ओनके पापन क छमा स उ

ओनके लोगन क उद्धार का गियान देबा।

७८ “हमरे परमेस्सर क नरम अनुग्रह स एक नवा दिन क भोर हम पइ ऊपर स उतरी।

७९ ओन प चमकइ बरे जउन मउत क गहरी छाया मँ जिअत अहइ काहेकि हमरे गोड़वन सांति क राहे प सीधा जाइ।”

८० इ तरह उ लरिका बाढ़इ लाग अउर ओकर आतिमा मजबूत स मजबूत होइ लाग। उ मनइयन मँ परगट होइ स पहिले निर्जन जगहिया मँ रहत रहा।

ईसू क जनम

(मत्ती १:१८-२५)

१ उ दिना औगुस्तुस कैसर कइँती स एक हुकुम निकरा कि समूचइ रोम क राज्य मँ जनगणना दर्ज कीन्ह जाइ। २ इ पहली जनगणना रही। इ ओन दिनन भइ जब सीरिया क राज्यपाल विवरिनियुस रहा। ३ एह बरे जनगणना खारित हर कउनो आपन सहर आवा।

४ यूसुफ भी, गलील क नासरत सहर स यहूदिया मँ दाऊद क सहर बैतलहम क आवा काहेकि उ दाऊद क परिवार अउर बंस क सदस्य रहा। ५ उ हुवाँ आपन होइवाली स्त्री मरियम क संग जउन गर्भवती रही, आपन नाउँ लिखावावइ ग रहा।

६ अबहिं जब उ पचे हुवाँ रहेन, मरियम क बचवा पइदा करइ क समइ आइ गवा। ७ अउर उ आपन पहिलौटी पूत (ईसू) क जनम दिहस। काहेकि हुवाँ सराय क भीतरे उ पचन क कउनो ठर नाहीं मिल पावा। एह बरे उ ओका ओढ़ना मँ लपेटिके चरही मँ लोटाएस।

ईसू क जनम क खबर

८ तबहीं हुवाँ उ पहाँटा मँ बाहेर खेत मँ कछू गड़रियन रहेन जउन राति क समइ आपन आपन झूंड क रखवारी करत रहेन। ९ उहइ समइया पर्भू क एक दूत परगट भवा अउर ओनकइ चारिहुँ

कईती पभूँ क तेज फूटइ लाग। उ सबइ सहमि गएन।<sup>१०</sup> तबहीं सरगदूत ओनसे कहेस, “डेराअ जिन, मई सुसमाचार लइ आवा हउँ, जेसे सबइ मनइयन क महान आनंद होई।<sup>११</sup> काहेकि आज दाऊद क सहर मँ तोहार उद्धारकर्ता मसीह पभूँ क जनम भ अहइ।<sup>१२</sup> तोहका ओका पहिचानइ क चीन्ह होइ कि तू एक ठु बचवा क ओढ़ना मँ लपेटा भवा, चरही मँ ओलरा पउव्या।”

<sup>१३</sup> उहइ समइया एकाएक उ सरगदूते क संग ढेरि क अउर सरगदूतन हुवाँ हाजिर भएन। उ पचे इ कहत भए परमेस्सर क गुन गावत रहेन:

<sup>१४</sup> “सरगे मँ परमेस्सर क महिमा होइ अउर धरती प ओन मनइयन क सांति मिलइ जेहसे उ खुस होइ।”

<sup>१५</sup> अउर जब सरगदूतन ओनका तजिके सरग लौटि गएन तउ उ सबइ गइरियन आपुस मँ कहइ लागेन, “आवा हम बैतलहम चली अउर जउन घटना भइ अहइ अउर जेकाँ पभूँ हमका बताएन ह, ओका देखी।”

<sup>१६</sup> तउ उ पचे जल्दी गएन अउर हुवाँ मरियम अउर यूसुफ क पाएन अउर निहारेन कि बचवा चरही मँ लोटा बा।<sup>१७</sup> गइरियन जब ओका निहारेन तउ इ बचवा क बारे मँ जउन संदेसा ओनका दीन्ह ग रहा, उ पचे ओनका सबइ क बताइ दिहन।<sup>१८</sup> जउन कउनो भी ओनका सुनेन, उ पचे गइरियन क कही बातन प अचरज करइ लागेन।<sup>१९</sup> मुला मरियम इ सबइ बातन क आपन मनवा मँ राखि लिहस अउर उ ओन प सोचइ बिचारइ लाग।<sup>२०</sup> अउर ओहर उ सबइ गइरियन जउन कछू सुनेन अउर देखे रहेन, ओके बरे परमेस्सर स्तुति अउर धन्यवाद देत अपने घरन क लौटि गएन। इ सब अइसेन घटा जइसेन कि ओनका बतावा गवा रहा।

<sup>२१</sup> अउर जब बचवा क खतने क खातिर अठवाँ दिन आइ तउ ओकर नाउँ ईसू रखेन। ओका इ नाउँ ओकरे गरभ मँ आवइ स पहिले सरगदूत दइ दिहन।

ईसू क मन्दिर मँ लइ जाब

<sup>२२</sup> अउर जब मूसा क व्यवस्था क मुताबिक पइदा भए बचवा क सूतक क दिन पूरा होइ गवा अउर सुद्ध होइ क समइ आइ तउ उ पचे ईसू क पभूँ क अरपन करइ बरे यरूसलेम लइ गएन।<sup>२३</sup> पभूँ क

लिखे भइ व्यवस्था क मुताबिक, “हर पहिलौटी क बेटवा पभूँ क बरे बिसेस मान जाई।”<sup>२४</sup> अउर पभूँ क व्यवस्था कहत ह, “एक जोड़ी कबूतर या पडुकी क दुइ नवा बचवा क बलिदान देइ चाही।” तउ उ पचे पभूँ क व्यवस्था क मुताबिक बलि चढ़ावइ लइ गएन।

समौन क ईसू क दर्सन

<sup>२५</sup> यरूसलेम मँ समौन नाउँ क एक धर्मी अउर भगत रहा। उ इस्राएल क सुख चइन क बाट जोहत रहा। पवित्र आतिमा ओकरे साथ रही।<sup>२६</sup> पवित्र आतिमा ओका परगत किए रही कि जब तलक उ पभूँ क मसीह क दर्सन नाहीं कइ लेइ, मरी नाहीं।<sup>२७</sup> उ पवित्र आतिमा क साथ मन्दिर मँ आवा अउर जब व्यवस्था क मुताबिक कारज बरे बालक ईसू क ओकर महतारी बाप मन्दिर मँ लइ आएन।<sup>२८</sup> तउ समौन ईसू क आपन गोदी मँ उठाइके परमेस्सर क स्तुति करत बोला:

<sup>२९</sup> “पभूँ अब तू आपन बचन क मुताबिक मोका आपन दास क सांति क साथ मुक्ती द्या

<sup>३०</sup> काहेकि मई आपन आँखिन स तोहरे उ उद्धार क दर्सन कइ लीन्ह ह।

<sup>३१</sup> जेका तू सबहिं मनइयन क उपस्थिति मँ तइयार किए अहा।

<sup>३२</sup> इ बचवा गैर यहूदियन बरे तोहरे राहे का देखावय बरे ज्योति क सोता अहइ अउर तोहरे इस्राएल क मनइयन बरे इ महिमा अहइ।”

<sup>३३</sup> ओकर महतारी बाप ईसू क बारे मँ कही गइ इ बातन स अचरजे मँ पड़ि गएन।<sup>३४</sup> फिन समौन ओनका आसीबाद दिहस अउर ओकर महतारी मरियम स कहेस, “इ बचवा इस्राएल मँ बहोतन क गिरावइ या उठावइ क कारण बनइ अउर एक अइसा चीन्ह ठहरावा जाइ बरे तय कीन्ह ग अहइ जेकर खिलाफत कीन्ह जाइ।<sup>३५</sup> अउर मनइयन जेका गूढ समझिहीं, उ लोगन क पता लगि जाई जेहसे तोहरे हिरदय क दुख होइ।”

हन्नाह ईसू क देखत ह

<sup>३६</sup> हुवँइ हन्नाह नाउँ क एक ठु महिला नबिया रही। उ असेर कबीले क फनूएल क बिटिया रही। उ बहोत बुद्धिया रही। आपन बियाहे क सिरिफ सात बरिस पाछे, तलक उ आपन भतारे क

<sup>१२</sup> :२३ उद्धृत निर्ग. १३ :२

<sup>३२</sup> :२४ उद्धृत लैव्य. १२ :८

साथे रही।<sup>३७</sup> अउर फिन चौरासी बरिस तलक उ विधवा रही। उ मन्दिर कबहुँ नाहीं तजेस। उपवास अउर पराथना करत भइ उ रात-दिन आराधना करत रही।<sup>३८</sup> उहइ समइ उ उहाँ महतारी बाप क लगे आइ। उ परमेस्सर क धन्यवाद दिहस अउर जउन मनइयन यरूसलेम क छुटकारा क बाट जोहत रहेन, उ ओन सबन्क छोड़ावइ क बारे में बताएस।

यूसुफ अउर मरियम क घर लौटव

<sup>३९</sup> अउर जब उ पचे पर्भू क व्यवस्था क मुताबिक सब कछु पूरा कइ लिहेन तउ उ सबइ गलील मँ आपन सहर नासरत लौटि आएन।<sup>४०</sup> अउर उ बालक बाढ़इ लाग अउर हिट्ट पुट्ट होइ लाग। उ बहोत बुद्धिमान रहा अउर ओह प परमेस्सर क अनुग्रह रही।

बालक ईसू

<sup>४१</sup> फसह क त्यौहार प हर बरिस ओकर महतारी बाप यरूसलेम जात रहेन।<sup>४२</sup> जब उ बारह बरिस क रहा तउ सदा क नाई उ पचे त्यौहार प गएन।<sup>४३</sup> जब त्यौहार खतम भवा अउर उ सबइ घरवा लौटत रहेन तउ बालक ईसू यरूसलेम मँ रुकि गवा मुला महतारी बाप क एकर जानकारी नाहीं होइ पाइ।<sup>४४</sup> इ बिचारत भए कि उ दले मँ कहुँ होई, उ सबइ दिन भर जात्रा करत रहेन। फिन उ सबइ ओका आपन नातेदारन अउर नजदीकी मीतन मँ हेरइ लागेन।<sup>४५</sup> अउर जब उ ओनका नाहीं मिल पावा तउ उ सबइ हेरत हेरत उ पचे यरूसलेम लौटि आएन।

<sup>४६</sup> अउर फिन भवा ई कि तीन दिना बाद उ ओहका मन्दिर मँ पाएन। उ उपदेस देइ वालेन क साथ बडठ के ओनका सुनत रहा अउर ओनसे सवाल पूछत रहा।<sup>४७</sup> उ सबहिं जउन ओसे सुने रहेन, ओकर समझ बूझ अउर ओकरे सवाले क जवाब स अचरजे मँ पड़ि गएन।<sup>४८</sup> जब ओकर महतारी बाप ओका निहारेन तउ दंग रहि गएन। ओकर महतारी ओसे पूछेस, “बेटवा, तू हमरे साथ अइसा काहे किहा? तोहार बाप अउर मई तोहका हेरत बहोतइ फिकिर मँ रहेन।”

<sup>४९</sup> तब ईसू ओनसे कहेस, “तू मोका काहे हेरत रह्या? का तू नाहीं जनत्या कि मोका मोरे बाप क घरे मँ होइ चाही?”<sup>५०</sup> मुला ईसू ओनका जउन

जवाब दिहस, उ पचे ओकरे बचन क न समुझ सकेन।

<sup>५१</sup> फिन उ ओनके संग नासरत लौटि आवा अउर ओनकइ हुकुम क मानत रहा। ओकर महतारी इ सब बतियन क आपन मने मँ राखत जात रही।<sup>५२</sup> ओह कइती ईसू बुद्धि मँ, डील डौल मँ अउर परमेस्सर अउर मनइयन क पिरम मँ बाढ़इ लाग।

यूहन्ना क प्रचार

(मत्ती ३ :१-१२ ; मरकुस

१ :१-८ ; यूहन्ना १ :१९-२८)

<sup>१</sup> तिबिरियुस कैसर क राज्य क पन्द्रहवाँ ३ बरिस मँ जब:

यहूदिया क राज्यपाल पुन्तियुस पीलातुस रहा ; अउर उ पहाँटा क चउथाई भाग क राजन मँ हेरोदेस गलील क,

ओकर भइया फिलिप्पुस इतूरैया अउर त्रखोनितिस क;

अउर लिसनियास अबिलेने क मातहत राजा रहा।

<sup>२</sup> अउर हन्ना अउर काइफा महायाजक रहेन, तबहीं परमेस्सर क बचन जकरयाह क बेटवा यूहन्ना क लगे रेगिस्तान मँ पहुँचा।<sup>३</sup> तउ यरदन नदी क नगिचे क समूचे पहाँटा मँ गवा, उ पापन क छमा बरे मनफिराय क खातिर बपतिस्मा क प्रचार करइ लाग।<sup>४</sup> नबी यसायाह क बचन क किताबे मँ जइसा लिखा बा :

“कउनो क रेगिस्तान मँ चिल्लात भवा सब्द:

‘पर्भू क बरे रास्ता तइयार करा

अउर ओकरे बरे रास्ता सोझ बनवा।

<sup>५</sup> हर घाटी भरि दीन्ह जाई

अउर हर पहाड़ अउर पहाड़ी सपाट होइ जइहीं

टेढ़ मेढ़ स्थान सीधे

अउर ऊबड़ खाबड़ रास्ता चौरस कइ दीन्ह जाई।

<sup>६</sup> अउर सबइ मनई परमेस्सर क

उद्धार क दर्सन करिहीं।”<sup>७</sup>

<sup>८</sup> यूहन्ना बपतिस्मा लेइ आएन मनइयन क भीड़ स कहत रहा, “अरे सँपोला, तू पचन क कउन चेताएस ह कि तू आवइवाले किराध स बच जा? <sup>९</sup> फल क जरिये तोहका प्रमाण देइ क होई कि असल मँ तोहका अपने पापन क पछतावा अहइ। अउर आपुस मँ इ कहब जिन सुरू करा, ‘इब्राहीम हमार बाप अहइ।’ मई तोहसे कहत हउँ कि परमेस्सर इब्राहीम बरे इन पाथरन स भी बचवन पइदा कइ सकत ह। <sup>१०</sup> वृच्छन क जड़े

प कुल्हाड़ा धरा गवा अहइ अउर हर उ वृच्छ, जउन नीक फर नाही पइदा करत, काटिके गिराइ दीन्ह जाई अउर फिन ओका आगी मँ झोंकि दीन्ह जाई ।”

१० तब भीड़ ओसे पूछेस, “तउ हमका का करइ चाही ?”

११ जवाबे मँ उ ओनसे कहेस, “जउन कउनो क लगे दुइ कुरता होइ, उ ओनका जेकरे लगे न होइ, ओनके संग बाँटि लेई । अउर जेकरे लगे खइया क होइ, उ भी अइसा ही करइ ।”

१२ कछू चुंगी (टैक्स) त उगहिया ओकरे लगे बपतिस्मा बरे आपन अउर फिन उ पचे ओसे पूछेन, “गुरु, हमका का करइ क चाही ?”

१३ एह पइ उ ओनसे कहेस, “जेतना चाही ओसे जिआदा जिन वसूला ।” १४ कछू सिपाही ओसे पूछेन, “अउर हमका का करइ चाही ?”

तउ उ ओनका समझाएस, “जोर अउर दबाव स कउनो स धन जिन ल्या । कउनो प झूठ दोख जिन लगावा । आपन पगार स संतोख करा ।”

१५ लोग बड़की आसा स बाट जोहत रहेन अउर यूहन्ना क बारे मँ आपन मने मँ इ बिचारत रहेन कि कहूँ, “इ तउ मसीह नाही बा ।”

१६ तबहीं यूहन्ना इ कहत भवा उ सबन क उत्तर दिसह, “मई तउ तोहका जले स बपतिस्मा देत हउँ मुला उ जउन मोसे जिआदा बरियार वा, आवत अहइ । मई ओकरे पनही क फीता तलक खोलइ क जोगग नाही हउँ । उ तोहका पवित्र आतिमा अउर आगी स बपतिस्मा देइ । १७ ओकरे हाथ मँ ओसावइ क पाँचा अहइ, जइसे उ दाना क भूसा अलगाइ क आपन खरिहाने मँ उठाइके धरत ह । मुला उ भूसा क अइसी आगी मँ झोंकी जउन कबहुँ नाही बुताइवाली अहइ ।” १८ इ तरह अइसे ही अउर बहोत स सव्दन स उ ओनका समझावत भवा सुसमाचार सुनावत रहत रहा ।

कइसे यूहन्ना क कारज क खतम भवा

१९ (पाछे यूहन्ना उ चौथाई पहँटा क मातहत राजा हेरोदेस क ओकर भाई क पत्नी हिरोदियास क संग ओकर गलत संबंध अउर ओकर दूसर कुकरम बरे डाटेस फटकारेस । २० एह पइ हेरोदेस यूहन्ना क बंदी बनाइके, जउन कछू कुकरम उ किहे रहा, ओहमाँ एक अउर जोर दिहस ।)

यूहन्ना क जरिए ईसू क बपतिस्मा

(मत्ती ३ :१३-१७ ; मरकुस १ :९-११)

२१ अइसा भवा कि जब सब लोग बपतिस्मा लेत रहेन तउ ईसू भी बपतिस्मा लिहस । अउर जब ईसू पराथना करत रहा, तबहि अकास खुलि गवा २२ अउर पवित्र आतिमा एक ठु कबूतरे क देह धइके ओह प तरखाले ओतरा । अउर अकासबाणी भइ, “तु मोर पियारा पूत अहा, मई तोहसे बहोत खुस हउँ ।”

यूसुफ क बंसज वृच्छ

(मत्ती १ :१-१७)

२३ ईसू जब आपन सेवा सुरू किहस तउ उ लगभग तीस बरिस क रहा । अइसा बिचारा गवा कि उ यूसुफ क बेटवा रहा,

एली क बेटवा यूसुफ,

२४ मत्तात क बेटवा एली,

लेवी क बेटवा मत्तात,

मलकी क बेटवा लेवी ।

यन्ना क बेटवा मलकी,

यूसुफ क बेटवा यन्ना,

२५ मत्तित्याह क बेटवा यूसुफ,

आमोस क बेटवा मत्तित्याह,

नहूम क बेटवा आमोस,

असल्याह क बेटवा नहूम,

नोगह क बेटवा असल्याह,

२६ मात क बेटवा नोगह,

मत्तित्याह क बेटवा मात,

सिमी क बेटवा मत्तित्याह,

योसेख क बेटवा सिमी,

योदाह क बेटवा योसेख,

२७ योनान क बेटवा योदाह,

रेसा क बेटवा योनाह,

जरुब्बाबिल क बेटवा रेसा,

सालतियेल क बेटवा जरुब्बाबिल,

नेरी क बेटवा सालतियेल,

२८ मलकी क बेटवा नेरी,

अदी क बेटवा मलकी,

कोसान क बेटवा अदी,

इलमोदाम क बेटवा कोसाम,

एर क बेटवा इलमोदाम,

२९ यहोसुआ क बेटवा एर,

एलीएजेर क बेटवा यहोसुआ,

योरीम क बेटवा एलीएजेर,

मत्तात क बेटवा योरीम,

लेवी क बेटवा मत्तात,  
<sup>३०</sup> समौन क बेटवा लेवी,  
 यहूदा क बेटवा समौन,  
 यूसुफ क बेटवा यहूदा,  
 योनान क बेटवा यूसुफ,  
 एलियाकीम क बेटवा योनान,  
<sup>३१</sup> मेलिआ क बेटवा एलियाकीम,  
 मिन्ना क बेटवा मेलिआ,  
 मत्ताता क बेटवा मिन्ना,  
 नातान क बेटवा मत्तात,  
 दाऊद क बेटवा नातान,  
<sup>३२</sup> यिसै क बेटवा दाऊद,  
 ओबेद क बेटवा यिसै,  
 बोअज क बेटवा ओबेद,  
 सलमोन क बेटवा बोअज,  
 नहसोन क बेटवा सलमोन,  
<sup>३३</sup> अम्मीनादाब क बेटवा नहसोन,  
 आदमीन क बेटवा अम्मीनादाब।  
 अरनी क बेटवा आदमीन,  
 हिस्रोन क बेटवा अरनी,  
 फिरिस क बेटवा हिस्रोन,  
 यहूदाह क बेटवा फिरिस,  
<sup>३४</sup> याकूब क बेटवा यहूदाह,  
 इसहाक क बेटवा याकूब,  
 इब्राहीम क बेटवा इसहाक,  
 तिरह क बेटवा इब्राहीम,  
 नाहोर क बेटवा तिरह,  
<sup>३५</sup> सरूग क बेटवा नाहोर,  
 रऊ क बेटवा सरूग,  
 फिलिग क बेटवा रऊ,  
 एबिर क बेटवा फिलिग,  
 सेलाह क बेटवा एबिर,  
<sup>३६</sup> केनान क बेटवा सेलाह,  
 अरफच्छद क बेटवा केनान,  
 सेम के बेटवा अरफच्छद,  
 नूह क बेटवा सेम,  
 लिमिक क बेटवा नूह।  
<sup>३७</sup> मथूसिलह क बेटवा लिमिक,  
 हनोक क बेटवा मथूसिलह,  
 यिरिद क बेटवा हनोक,  
 महललेल क बेटवा यिरिद,

केनान क बेटवा महललेल,  
<sup>३८</sup> एनोस क बेटवा केनान,  
 सेत क बेटवा एनोस,  
 आदम क बेटवा सेत,  
 अउर परमेस्सर क पूत आदम रहा।

ईसू क परीच्छा

(मत्ती ४ :१-११ ; मरकुस १ :१२-१३)

१ पवित्र आतिमा स भरा भवा ईसू यरदन नदी स लौटि आवा। आतिमा ओका ऊसेरें मँ राह देखॉवत रही।<sup>२</sup> हुवाँ सइतान चालीस दिन ताई ओकर परीच्छा लिहस। ओ दिनन मँ ईसू बे खइया क खाए रहा। फिन जब समइ पूर भवा तउ ईसू भुखान।

<sup>३</sup> एह बरे सइतान ओसे कहेस, “जदि तू परमेस्सर क पूत अहा तउ इ पथरे स रोटी बनइ बरे कहा।”

<sup>४</sup> एह पइ ईसू जवाब दिहस, “पवित्र सास्तरन मँ लिखा बा :

‘मनई सिरिफ रोटी प नाही जिअत।’” §

<sup>५</sup> फिन सइतान ओका बहोत ऊँच लइ गवा अउर छिन भर मँ समूचे संसार क राज्य ओका देखॉवत बोला, <sup>६</sup> अउर सइतान ओहसे कहेस, “मई इन राज्यन क तोहका हुकूमत अउर धन दौलत दइ देइहउँ अउर मई जका चाहउँ ओका दइ सकत हउँ। <sup>७</sup> एह बरे जदि तू मोर आराधना करव्या तउ इ सब तोहार होइ जाई।”

<sup>८</sup> ईसू ओका जवाब देत भवा बोला, “पवित्र सास्तरन मँ लिखा बा :

‘तोहका सिरिफ आपन भूँ परमेस्सर क ही आराधना करइ चाही।

तोहका सिरिफ उहइ क सेवा करइ चाही।’” \*\*

<sup>९</sup> तब उ ओका यरूसलेम लइ गवा अउर हुवाँ मन्दिर क सबते ऊँची चोटी प लइ जाइके खडा कइ दिहस। अउर उ ओसे बोला, “जदि तू परमेस्सर क पूत अहा तउ हिआँ स अपने आपक तरखाले गिरइ द्या। <sup>१०</sup> पवित्र सास्तर मँ लिखा अहइ :

‘उ आपन सरगदूतन क तोहरे बारे मँ हुकुम देई कि उ पचे तोहार रच्छा करई।’ ††

‡ अउर लिखा अहइ :

‘उ पचे तोहका आपन बाँहे मँ अइसे उटइहीं कि

§ ४ : ४ उद्धृत व्यवस्था विवरण ८ : ३

\*\* ४ : ८ उद्धृत व्यवस्था विवरण ६ : १३

†† ४ : १० उद्धृत भजन संहिता ११ : ११



तोहार गोड़ कउनो पाथर स न टकराई।” ##

१२ ईसू जवाब देत भवा कहेस, “पवित्र सास्तरन मँ इ भी लिखा बा, तोहका आपन पभू परमेस्सर क परीच्छा मँ नाहीं नावइ चाही।” ##

१३ तउ जब सइतान ओकर सबइ तरह क परीच्छा लइके हारि गवा तउ दूसरइ समइ तलक ओका तजिके चल दिहस।

ईसू का लोगन क उपदेस

(मत्ती ४:१२-१७; मरकुस १:१४-१५)

१४ फिन ईसू आतिमा क समर्थ स भरा भवा गलील लौटि आवा अउर उ समूचे पहेँटा मँ ओकर चर्चा फैलि गइ। १५ उ ओनके आराधनालय मँ उपदेस दिहेस। सबइ ओकर प्रसंसा करत रहेन।

ईसू क आपन सहर मँ जाव

(मत्ती १३:५३-५८; मरकुस ६:१-६)

१६ फिन उ नासरत आवा जहाँ उ पला अउर बड़ा भवा। आपन आदत क मुताबिक सबित क दिन उ आराधनालय मँ गवा। जबहिं उ पाठ बाँचइ खड़ा भवा। १७ तउ यसायाह नबी क किताब ओका दीन्ह गइ। जब उ किताब खोलेस तउ ओका जगह मिला जहाँ लिखा रहा कि:

१८ “पभू क आतिमा मोरे मँ समाइ गइ अहइ काहेकि किहेस ह उ मोर अभिसेक कि दीनउँ क सुसमाचार सुनाउव मई, उ मोका पठएस ह बंदीयन क इ बतावइ कि उ पचे अजाद अहई।

आँधर क आँखिन मँ जोति सरसावइ, अउर दलितन क छुटकारा देवाँवइ; १९ पभू क अनुग्रह क समइ बतावइ क भेजा अहइ।” ##

२० फिन उ किताब क बंद कइके परिचारक क हथवा मँ दइ दिहस अउर बैठ गवा। आराधनालय मँ सबइ क आँखिन ओका निहारत रहिन। २१ तब उ ओनसे कहब सुरु किहेस, “आज इ बचन तोहरे काने मँ पूर भवा।”

२२ हर कउनो ओकरे बारे मँ अच्छी बातन कहत रहेन। ओकरे मुँहना स जउन सुन्दर बचन निकरत रहेन, ओन प सबन क अचरज भवा। उ पचे कहेन, “का इ यूसुफ क बेटवा नाहीं अहइ?”

२३ फिन ईसू ओनसे कहेस, “तू पचे जरूर मोका इ कहावत सुनउब्या, ‘अरे वैद्य खुद आपन इलाज करा।’ कफरनहूम मँ तोहरे जउन काजे क बारे मँ हम पचे सुना ह, उ काजे क हिआँ आपन खुद क सहर मँ भी कइ डावा।” २४ ईसू तब ओनसे कहेस, “मई तोहसे सच कहत हउँ कि आपन सहर मँ कउनो नबी क स्वागत नाहीं होत।

२५-२६ “मई तोहसे सच कहत हउँ इस्राएल मँ एलिय्याह क समइ मँ जब अकास जइसे मुँद गवा रहा अउर साढ़े तीन बरिस तलक पूरी धरती मँ खौफनाक अकाल पड़ि गवा, तउ हुवाँ बहुत विधवन रहेन। मुला सैदा पहेँटा के सारपत सहर क एक विधवा क तजिके एलिय्याह क कउनो अउर क लगे नाहीं पठवा गवा रहा।

२७ “अउर नबी एलीसा क समइया मँ इस्राएल मँ ढेर कोढ़ी रहेन मुला ओहमाँ स सीरिया क बसइया नामान क तजिके अउर कउनो क सुद्ध नाहीं कीन्ह गवा रहा।”

२८ तउ जबहिं आराधनालय मँ मनइयन इ सुनेन तउ सबहिं बहोत क्रोध स भर गएन। २९ तउ उ पचे खड़ा भएन अउर ओका सहर स बाहेर ढकेल दिहेन। उ सबइ ओका पहाड़े क उ चोटी प लइ गएन जेह प ओकर सहर बसा रहा जेसे उ पचे हुवाँ तरखाले झोंकि देई। ३० मुला उ ओनके बीच स निकरिके कहूँ आपन राहे प चला गवा।

ईसू का एक मनई क दुस्ट आतिमा स छुटकारा

(मरकुस १:२१-२८)

३१ फिन उ गलील क एक सहर कफरनहूम गवा अउर सबित क दिन मनइयन क उपदेस देइ लाग। ३२ मनई ओकरे उपदेस स अचरज मँ पड़ि गएन काहेकि ओकर संदेस मुड्ड विद्वान क तरह रहा।

३३ हुवई एक ठु मनई आराधनालय मँ रहा जेहमाँ एक दुस्ट आतिमा क सवारी रही। उ जोर स चिल्लान, ३४ “हे नासरत क ईसू! तु हमसे का चाहत बाटया? का तू हमार नास करइ आइ अहा? मई जानत हउँ तू कउन अहा तू परमेस्सर क पवित्र मनई अहा।” ३५ ईसू झिड़कत भवा ओसे कहेस, “चुप रहा। एहमाँ स बाहेर निकरि आवा।” एह पइ दुस्ट आतिमा उ मनई क लोगन्क समन्वा दइ मारेस अउर ओका बे नसकान किए ओसे बाहेर निकरि गइ।

## ४:११ उद्धृत भजन संहिता ९१:१२

## ४:१२ उद्धृत व्यवस्था विवरण ६:१६

## ४:१९ उद्धृत यसायाह ६१:१-२; ५८:६

३६ सबइ कोउ अचरजे मँ पड़ि गएन। उ सबइ एक दूसर स बतियात कहेन, “इ कइसा सन्देस बा ? हक अउर सक्ती क संग इ दुस्ट आतिमन क हुकुम देत ह अउर उ सबइ बाहेर निकरि जात हीं।” ३७ उ पहुँटा मँ लगे हर ठउरे प ओकरे बारे मँ खबर सँचर गइ।

रोगी स्त्री क चंगा कीन्ह जाब

(मत्ती ८ :१४-१७ ; मरकुस १ :२९-३४)

३६ तब ईसू आराधनालय क तजिके समौन क घर चला गवा। समौन क सासे क बहोत बोखार चढ़ा रहा। उ पचे ईसू स मदद बरे बिनती किहेन। ३९ ईसू ओकरे सिरहाने खड़ा भवा अउर बोखारे क डाटेस। बोखार ओहका छोड़ि दिहस। उ फउरन खड़ी होइ गइ अउर ओनकर सेवा करइ लाग।

ईसू बहोतन क चंगा किहेस

४० जब सूरज ओनवबत रहा तउ जेकरे हिआँ किसिम किसिम क बेमारी स पीड़ित रहेन, उ सबइ ओनका ओकरे लगे लइ आएन। अउर उ आपन हथवा ओहमाँ स हर एक पर रखत भए ओनका चंगा किहे। ४१ ओहमाँ बहोतन मँ दुस्ट आतिमन चिचियात भइ इ कहत बाहेर निकरि आइन, “तू परमेस्सर क पूत अहा।” मुला उ ओनका डाँटेस अउर बोलइ नाही दिहस, काहेकि उ सबइ जानत रहिन कि “उ मसीह अहइ।”

ईसू क दूसर सहरन क जात्रा

(मरकुस १ :३५-३९)

४२ जब भिनसार भवा तउ हुवाँ स उ कउनो एकांत ठउर चला गवा। मुला भीड़ ओका हेरत हेरत हुवँइ जाइके पहुँच गइ जहाँ उ रहा। उ पचे ओका ओनका छोड़िके न जाइ स रोकेन। ४३ मुला उ ओनसे कहेस, “परमेस्सर क राज्य क बारे मँ सुसमाचार मोका दूसर सहरन मँ भी पठवइ क बा काहेकि मोका यह बरे पठवा ग अहइ।”

४४ अउर इ तरह उ यहूदिया क आराधनालय मँ लगातार उपदेस देत रहा।

ईसू क पहिले चेलन

(मत्ती ४ :१८-२२ ; मरकुस १ :१६-२०)

५ अइसा भवा कि भीड़ मँ मनइयन ईसू क चारिहुँ कइती स घेरिके जब परमेस्सर क बचन सुनत रहेन अउर उ गन्नेसरत नाउँ क झिलिया क किनारे खड़ा रहा। २ तबहिँ उ झीले क किनारे दुइ नाउ देखेस। मछुआरा ओहमाँ स निकरिके आपन

जाल साफ करत रहेन। ३ ईसू ओहमाँ स एक नाउ प जउन समौन क रही, चढ़ि गवा अउर उ नाउ क किनारे स हटावइ बरे कहेस। फिन उ नाउ प बइठि गवा अउर हुवँई नाउ प स मनइयन क भीड़े क उपदेस देइ लाग।

४ जब उ उपदेस देब बंद किहेस तउ उ समौन स कहेस, “गहिर पानी कइती बढ़ा अउर मछुरी धरइ क आपन जालि डावा।”

५ समौन कहेस, “स्वामी हम सारी राति बहोत मेहनत कीन्ह ह, मुला हमका कछु नाही मिला। तउ भी तू कहत बाट्या, यह बरे मइँ जालि नाइ देत हउँ।” ६ जब उ पचे जलिया डारि दिहन तउ ढेर मछुरी धरी गइन। ओनकइ जालि जइसे फाटत रहिन। ७ तउ उ पचे दूसर नाउन मँ बइठन आपन साथी संगी क इसारा कइके मदद बरे बोलाएन। उ सबइ आइ गएन अउर उ सबइ दुइनउँ नाउन प एँतनी ढेरि क मछुरी लादि दिहन कि माना उ पचे बूड़इ लागेन।

८-९ जब समौन पतरस इ निहारेस तउ उ ईसू क गोड़वा मँ गिरिके बोला, “मोसे दूर रहा, काहेकि हे पभूँ मइँ एक पापी मनई हउँ।” उ इ एह बरे कहेस कि एँतनी मछुरी बटोर पावइ क कारण ओका अउर ओकरे सबही साथी क बहोत अचरज होत रहा। १० जब्दी क बेटवा याकूब अउर यूहन्ना क भी, जउन समौन क साथी रहेन, इ तरह बहोत अचरज भवा।

तउ ईसू समौन स कहेस, “डेराअ जिन, काहेकि अबहिँ स तू मनइयन क बटोरब्या।”

११ फिन उ पचे आपन नाउन क किनारे लइ आएन अउर सब कछु तजिके ईसू क पाछे होइ गएन।

कोढ़ी क सुद्ध कीन्ह जाब

(मत्ती ८ :१-४ ; मरकुस १ :४०-४५)

१२ तउ अइसा भवा कि जब ईसू एक नगर मँ रहा तबहीँ हुवाँ कोढ़ स बिआपा एक टु मनई रहा। उ जइसेन ईसू क निहारेस तउ दण्डवत पूरणाम कइके ओसे बिनती किहेस, “पभूँ, जदि तू चाहा तउ मोका चंगा कइ सकत ह।”

१३ एँह पइ ईसू आपन हाथ बढ़ाइके कोढ़ी क इ कहत भवा छुएस, “मइँ चाहत हउँ, चंगा होइ जा।” अउर फउरन ओकर कोढ़ जात रहा। १४ फिन ईसू ओका हुकुम दिहेस, “एँकरे बारे मँ उ कउनो स कछु न कहइ। मुला याजक क लगे जा अउर अपने सुद्ध होइ बरे मूसा क हुकुम क मुताबिक भेंट चढ़ाइ

द्या जइसे मनइयन क तोहरे चंगा होइ क प्रमाण मिलइ।”

१५ मुला ईसू क बारे मैं खबर अउर जिआदा रफ्तार स संचरइ लाग। अउर मनइयन क झुंड क झुंड एकट्टा होइके ओका सुनइ अउर आपन बेरामी स जरट्ट होइ बरे ओकरे नगिचे आवत रहेन। १६ मुला ईसू अक्सर कहँ एकान्त जंगल मैं चला जात रहा अउर उहाँ पराथना करत रहा।

लकवा क रोगी क चंगा करब

(मत्ती ९ :१-८ ; मरकुस २ :१-१२)

१७ अइसा भवा कि एक दिना जब उ उपदेस देत रहा तउ हुवाँ फरीसियन अउर धरम सास्तिरियन भी बइठा रहेन। उ सबइ गलील अउर यहूदिया क हर सहर अउर यरूसलेम स आए रहेन। मनइयन क चंगा करइ क पर्भू क सक्ती ओकरे साथे रही। १८ तबहीं कछू मनई खटिया प लकवा क एक बेरमिया क ओकरे लगे लइ आएन। उ पचे ओका भितरे लइ आइके ईसू क समन्वा धरइ क जतन करत रहेन। १९ मुला भीड़ क कारण भीतर जाइके रस्ता न मिल पावइ स उ सबइ छत प चढ़ि गएन अउर उ पचे ओका बिछुउना क साथ छत क बीचोबीचे स खपैरल टारिके भोर के बीच मैं ईसू क समन्वा उतार दिहन। २० ओनके बिसवास क लकत भवा ईसू कहेस, “अरे तोहार, पाप छमा होइ गएन।”

२१ तब धरम सास्तिरियन अउर फरीसियन आपन मैं सोचइ लागेन, “इ कउन बा जउन परमेस्सर बरे अइसे बेज्जती स बोलत ह? परमेस्सर क तजिके दूसर कउन अहइ जउन पाप छमा कइ सकत ह?”

२२ मुला ईसू ओनकइ सोचब बिचारब क ताड़ लिहस। फिन जवाबे मैं उ ओनसे कहेस, “तू पचे आपन मने मैं अइसा काहे सोचत अहा? २३-२४ जिआदा असान क बाटइ? इ कहब, ‘उठा अउर चला’? मुला एह बरे कि तू जान ल्या कि मनई क पूत क धरती प छमा करइ क हक अहइ।” उ लकवा क बेरमिआ स कहेस, “मइँ तोहसे कहत हउँ खड़ा ह्वा! आपन बिछुउना उठावा अउर घरे जा।”

२५ तउ उ तुरंतहि खड़ा भवा अउर ओनके लखत लखत जउने बिछुउना प उ ओलरा रहा, ओका उठाइके परमेस्सर क स्तुति करत भवा आपन घर चला गवा। २६ उ पचे जउन हुवाँ रहेन सब चकित होइके परमेस्सर क बड़कई करइ लागेन। उ पचे

सुरद्धा अउर अचरज स भरि गएन अउर बोलेन, “आजु हम पचे कछू अजूवा निहारा ह!”

लेवी क ईसू क बोलाँवा

(मत्ती ९ :९-१३ ; मरकुस २ :१३-१७)

२७ एकरे पाछे ईसू चला गवा। तबहीं उ चुंगी क चौकी पइ बइठा लेवी नाउँ क चुंगी उगहिया क लखेस। उ ओसे कहेस, “मोरे पाछे चला आवा।” २८ तउ उ खड़ा भवा अउर सब कछू तजिके ओकरे पाछे होइ गएन।

२९ फिन लेवी आपन घरे प ईसू क मान बरे एक ठु स्वागत जेवनार दिहस। हुवाँ चुंगी क उगहिया अउर दूसर मनइयन क बड़का जमघट मिलिके ओकरे संग जेवंत रहा। ३० तब फरीसियन अउर धरम सास्तिरियन लोग ओकरे चलन स इ कहत भए सिकाइत किहन, “तू चुंगी उगहिया अउर पापी मनइयन क संग काह खात पिअत ह?”

३१ जवाबे मैं ईसू ओनसे कहेस, “हिट्ट पुट्ट क नाही, मुला बेरमियन क वैद्य (डाक्टर) क जरूरत होत ह। ३२ मइ मनफिराव बरे धर्मी लोगन क नाही मुला पापी मनइयन क बोलावइ आवा हउँ।”

उपास प ईसू क मत

(मत्ती ९ :१४-१७ ; मरकुस २ :१८-२२)

३३ उ पचे ईसू स कहेन, “यूहन्ना क चलन अक्सर उपास राखत हीं अउर पराथना करत हीं। अउर अइसा ही फरीसियन क मनवइयन भी करत हीं मुला तोहार मनवइयन तउ खात पिअत रहत हीं।”

३४ ईसू ओनसे पूछेस, “का दुल्हा क संग मेहमान जब तलक दुल्हा क लगे रहत हीं, उपास करत हीं? ३५ मुला उ सबइ दिनन अबहिं जबहिं दुल्हा ओनसे छीन लीन्ह जइहीं। फिन उ दिनन मैं उ पचे उपास करिहीं।”

३६ उ ओनसे एक दिस्टान्त कथा अउर कहेस, “कउनो भी नवा पोसाके स टुकड़ा फाड़िके ओका पुरान पोसाके प नाही लगावत अउर जदि कउनो अइसा करत ह तउ ओकर नवा पोसाक तउ फाटि जाई, ओकरे संग उ नवा पड़बंद भी पुरान क साथ मेल न खाई। ३७ कउनो भी पुरान मसकन मैं नई दाखरस नाही भरत अउर जदि भरि देत ह तउ नई दाखरस पुरान मसकन क फोरि देई, उ फैलि जाई अउर मसकन क फोरि देई। ३८ मनई हमेसा नई दाखरस नई मसकन मैं ही धरत ह। ३९ पुरान दाखरस पीके कउनो भी नई का नाही चाहत काहेकि उ कहत ह, ‘पुरान उत्तम अहइ।’”

## सबित्त क पर्भू ईसू

(मत्ती १२ :१-८ ; मरकुस २ :२३-२८)

१ अब अइसा भवा कि सबित्त क एक दिन ईसू जब अनाजे क खेतन्स जात रहा तउ ओनकर चलन अनाजे क बलिया तोड़तेन, हथेली प रगड़ितेन अउर ओनका चवात जात रहेन। २ तबहीं कछू फरीसियन कहेन, “जेका सबित्त क दिन कीन्ह जाब नीक नाही बा, ओका तू पचे काहे करत अहा ?”

३ जवाब देत भवा ईसू ओनसे पूछेस, “का तू पचे नाही पढ़या जब दाऊद अउर ओकर साथी भुखान रहेन, तब दाऊद का किहेस ? ४ का तू नाही बाँच्या कि उ परमेस्सर क घरे मँ घुसिके, परमेस्सर क चढ़ाई गइ रोटिन क उटाइके खाइ लिहस अउर ओनका भी दिहेस जउन ओकरे संग रहेन ? जब कि याजकन क तजिके ओकर खाब कउनो बरे नीक नाही।” ५ उ अगवा फिन कहेस, “मनई क पूत सबित्त क दिन क भी पर्भू अहइ।”

ईसू सबित्त क दिन रोगी क चंगा किहेस

(मत्ती १२ :९-१४ ; मरकुस ३ :१-६)

६ दूसर सबित्त क दिना अइसा भवा कि उ आराधनालय मँ जाइके उपदेस देइ लाग। हुवँई एक अइसा मनई रहा जेकर दाहिन हाथ सुखंडी होइ गवा रहा। ७ हुवँई धरम सास्तिरियन अउर फरीसियन इ ताक मँ रहेन कि उ सबित्त क दिन कउनो चंगा किहे होइ तो ओह प दोख लगावइ क कउनो कारण पाइ जाई। ८ उ ओनके बिचारन क जानत रहा। यह बरे उ सुखंडी हथवावाले मनई स कहेस, “उठा अउर सबन क समन्वा खड़ा होइ जा।” उ उठि गवा अउर हुवाँ खड़ा होइ गवा। ९ तब ईसू मनइयन स कहेस, “मई तोहसे पूछत हउँ-सबित्त क दिन कउनो क भला करब चंगा अहइ या कउनो क नोसकान करब, कउनो क जिन्नगी बचाउब नीक बा या कउनो क जिन्नगी क नास करब।”

१० ईसू चारिहुँ कइँती ओन सबन क निहारेस अउर फिन ओसे कहेस, “आपन हथवा सोझ फइलावा।” उ वइसा ही किहेस अउर ओकर हाथ फिन स चंगा होइ ग। ११ मुला एँह पइ उ पचे आपुस मँ तहत्तुक करत कोहाइ गएन अउर बिचारइ लागेन, “ईसू क का कीन्ह जाइ ?”

## ईसू बारह प्रेरितन क चुनेस

(मत्ती १० :१-४ ; मरकुस ३ :१३-१९)

१२ उ दिनन मँ अइसा भवा कि ईसू पराथना करइ बरे एक पहाड़े प गवा अउर सारी राति परमेस्सर क पराथना करइ मँ बिताएस। १३ फिन मोर भवा तउ उ आपन मनवइयन क लगे बोलाँएस। ओहमाँ स उ बारह क चुनेस, जेनका उ “प्रेरितन” क नाउँ दिहस।

१४ समौन जेका उ पतरस का नाउँ दिहेस,

अउर ओकर भइया अन्दरयास,

याकूब अउर यूहन्ना,

फिलिप्पुस,

बरतुलमै,

१५ मत्ती,

थोमा,

हलफई क बेटवा याकूब

अउर समौन जिलौती,

१६ याकूब क बेटवा यहूदा

अउर यहूदा इस्करियोती जउन दगाबाज होइ गवा।

ईसू क मनइयन क उपदेस अउर चंगा करब

(मत्ती ४ :२३-२५, ५ :१-१२)

१७ फिन ईसू ओनके संग पहाड़ी स तरखाले उतरिके समथर भुइयाँ प खड़ा भवा। हुवँई ओकरे चलन क भारी जमघट रहा। एकरे साथ समूचइ यहूदिया, यरूसलेम, सूर अउर सैदा क समुदर किनारे स अनगिनत आलम हुवाँ आइके एकट्ठा भवा। १८ उ पचे ओका सुनइ अउर बेरामी स छुटकारा पावइ हुवाँ आए रहेन। जउन दुस्ट आतिमा स सतावा रहेन, उ पचे भी हुवाँ आइके चंगा भएन। १९ समूची भीड़ ओका छुइ भरि लेइ क जतन मँ रही काहेकि ओहमाँ स सक्ती निकरत रही अउर ओन सबन क बेरामी स दूर करत रही।

२० फिन उ आपन चलन क निहारत भवा बोला,

“धन्य अहा तू दीन जनन काहेकि

परमेस्सर क राज्य तोहार अहइ।

२१ धन्य अहा तू, जउन अबहीं भूखा अहा

काहेकि तृप्ति तउ होइ तोहार,

धन्य अहा तू, जउन आजु आँसू बहावत अहा,

काहेकि तू आगे हँसब्या।

२२ “धन्य अहा तू, जब मनई क पूत क कारण लोग तोहसे घिना करई, अउर तोहका निकारि देई; अउर करई तोहार बुराई, नाउँ तलक क दुस्ट कहिके, काटि देई उ पचे। २३ तब उहइ दिन तू मगन

होइके खुसी मैं उछर्या काहेकेइ सरग मैं तोहार प्रतिफल महान अहइ। काहेकि ओनके पूर्वजन भी नबियन क संग अइसा ही किहन ह।

२४ “हाय !धिक्कार अहइ तोहका ओ धनी मनइयो, काहेकि तोहका मिल गवा सुख चनइ भरपूर।

२५ अहइ तोहका धिक्कार, जउन भरपेट अहा अब काहेकि तू भूखा रहब्या।

अहइ तोहका धिक्कार, जउन अबहिन हँसत अहा, काहेकि तू आँसू बहउब्या अउर सोक करब्या।

२६ “बा धिक्कार तोहका, जब सबन दुआरा तोहार बड़कई होइ काहेकि ओनके पूर्वजन भी इही ब्यौहार झूटे नबियन क संग किहे रहन।

आपन बैरी स पिरेम करा

(मत्ती ५ :३८-४८ ; ७ :१२a)

२७ “ओ सुनवइया लोगो, मइ तोहसे कहत हउँ आपन बैरी स भी पिरेम करा। जउन तोहसे घिना करत हीं ओनके संग भलाई करा। २८ ओनका भी आसीबाद द्या जउन तोहका सरापत हीं। ओनके बरे पराथना करा जउन तोहरे संग नीक ब्यौहार नाहीं करतेन। २९ जदि कउनो तोहरे एक गाले प थप्पडियावइ तउ तू दूसर गाल भी ओकरे अगवा कइ द्या। जदि कउनो तोहार कोट तोहसे लइ लेइ तउ ओहका कुर्ता भी लइ लेइ द्या। ३० जदि कउनो तोसे मांगइ, ओका द्या। जदि कउनो तोहार कछू राखि लेइ तउ ओसे ओका वापस जिन मांगा। ३१ तू आपन बरे जइसा ब्यौहार दूसरन स चाहत बाटद्या, तोहका वइसा ही दूसर क संग ब्यौहार करइ चाही।

३२ “जदि तू बस ओनही क पिआर करत ह, जउन तोहका पिआर करत हीं, तउ एहमा तोहार कउन बड़कई? काहेकि आपन स पिरेम करइवालन स पिरेम तउ पापी मनई तलक करत हीं। ३३ जदि तू बस ओनहीं क भला करत ह, जउन तोहार भला करत हीं, तउ तोहार कउन बड़कई? अइसा तउ पापी तलक करत हीं। ३४ जदि तू सिरिफ ओनही क उधार देत ह, जेनसे तोहका वापस मिल जाइ क आसा बा, तउ तोहार कउन बड़कई? अइसे तउ पापी भी पापी मनइयन क देत हीं कि ओनका ओनकी पूरी रकम वापस मिलि जाइ।

३५ “मुला आपन दुस्मन स भी पिआर करा, ओनके संग भलाई करा। कछू भी वापस मिलि जाइके आसा तजिके उधार द्या। इ तरह तोहार फल महान होइ जाई अउर तू सर्वोच्च (परमेस्सर) क संतान बनब्या काहेकि परमेस्सर एहसाने क

मानइवालन अउर दुस्ट मनइयन प भी दया करत ह। ३६ जइसे तोहार परमपिता दयालु बा, वइसे ही तू दयालु बना।

आपन क पहिचाना

(मत्ती ७ :१-५)

३७ “कओ क दोखी जिन कहा तउ तोहका भी दोखी नाहीं कहा जाइ। कओ क नोक्ताचीनी जिन करा तउ तोहार भी नोक्ताचीनी नाहीं कीन्ह जाइ। छुमा करा, तोहका छुमा मिली। ३८ द्या तोहका भी दीन्ह जाइ। उ पचे तोहरे झोरी मैं पूरा नाप दबाइ दबाइ के, हलाइके बाहेर निकसत भइ उडेरिहीं काहेकि जउने नापे स तू दूसरन क नापत ह, उहइ स तोहका नापा जाइ।”

३९ उ ओनसे एक ठु दिस्टान्त कथा अउर कहेस: “का कउनो आँधर कउने दूसरे आँधर क राह देखाइ सकत ह? का उ सबइ दुइनउँ ही कउनो गइहा मैं नाहीं भहरइहीं? ४० कउनो भी पदवइया आपन पदावइवालन स बड़वार नाहीं होइ सकत, मुला जबहिं कउनो मनई पूरी तरह हुसियार होइ जात ह तउ उ आपन गुरु क नाई होइ जात ह।

४१ “तू आपन भाई क आँखी मैं कउनो ढेंढा काहे लखत ह अउर आपन आँखी क लट्टा भी तोहका नाहीं चोधरात। ४२ तउ आपन भाई स तू कइसे कहि सकत ह भाई तू अपन आँखी क तिनका मोका निकारइ द्या। जब तू आपन आँखी क लट्टा क नाहीं निहरत्या। अरे कपटी, पहिले आपन आँखी क लट्टा दूर करा, तब तोबका आपन भाई क आँखी क ढेंढा बाहेर निकारइ बरे देखाइ पड़ी।

दुइ किसिम क फर

(मत्ती ७ :१७-२० ; १२ :३४b-३५)

४३ “कउनो भी अइसा उत्तिम बृच्छ नाहीं अहइ जेह पइ बुरा फर लागत होइ। न ही कउनो अइसा बुरा बृच्छ बाटइ, जेइ पइ उत्तिम फर आवत होइ। ४४ हर बृच्छ आपन फर स पहिचाना जात ह। मनइयन कंटेहरी झारी स अंजीर नाहीं बटोरतेन। न ही कउनो झरबेली स मनई अंगूर बटोरत हीं। ४५ एक नीक मनई क मन मैं अच्छाइ क भंडार बाटइ। अउर एक खोटा मनई, जउ ओकरे मने मैं बुराई बाटइ, उहइ स बुराई पइदा करत ह। काहेकि एक मनई मुँहना स उहइ बोलत ह, जउन ओकरे हिरदइ मैं उफनाइ के बाहेर आवत ह।

आपन क पहिचाना

(मत्ती ७ :२४-२७)

४६ “तू मोका, ‘पर्भू पर्भू’ काहे पुकारत ह अउर जउन मई कहत हउँ, ओह प नाही चलत्या। ४७ हर कउनो जउन मोरे लगे आवत ह अउर मोर उपदेस सुनि लेत ह अउर ओह पर आचरण करत ह, उ कउने तरह क होत ह, मई तोहका बताउब। ४८ उ उहइ मनई क नाई अहइ जउन मकान बनावत बाटइ। उ गहिर खुदाई किहेस अउर चट्टाने प नैव डाएस। फिन जब बाढ़ आइ अउर नदी मकाने प टकरान तउ ओका हलाइ नाही पाएस, काहेकि उ बहोत अच्छी तरह स बना रहा।

४९ “मुला जउन मोर उपदेस सुनत ह अउर ओहँ प चलत नाही उ ओ मनई क नाई अहइ जउन बे नैव धरे धरती प मकान बनाएस। नदी ओसे टकरान अउर उ फउरन दहाइ गवा अउर पूरी तरह बरबाद होइ गवा।”

बिसवास क सकती

(मत्ती ८ :५-१३ ; यूहन्ना ४ :४३-५४)

७ १ ईसू मनइयन क जउन सुनावा चाहत रहा, ओका कहि चुकइ क पाछे उ कफरनहूम चला गवा। २ हुवाँ एक फऊजी नायक रहा जेकर नउकर एतना बेरमिया रहा कि मरइ के नगीचे रहा। उ नउकर ओकर बहोत पियारा रहा। ३ फऊजी नायक जब ईसू क बारे में सुनेस तउ उ कछू बुजुर्ग यहूदी नेतन क इ बिनती करइ क ओकरे लगे पटएस कि उ आइके ओकरे नउकर क प्राण बचाइ लेइ। ४ जब उ पचे ईसू क नगीचे पहुँच गएन तउ उ सबइ सच्चे मने स बिनती करत भए कहेन, “उ इ जोगग अहइ कि तू ओकरे बरे अइसा करा। ५ काहेकि उ हमरे मनइयन स पिरेम करत ह। उ हमरे बरे आराधनालय क बनवाएस ह।”

६ एँह पर ईसू ओनके संग चल दिहेस। अबहिं जब उ घरे स जिआदा दूर नहीं रहा, उ फऊजी नायक ओकरे लगे आपन मीतन क इ कहइ बरे पटएस, “पर्भू आपन क कस्ट जिन द्या काहेकि मई एतना नीक मनई नाही कि तू मोरे घरवा आवा। ७ एह बरे मई तोहरे लगे आवइ तलक नाही सोचेउँ। मुला तू बस कहि भर द्या, मोर नउकर नीक होइ जाई। ८ मई खुद कउनो अधिकारी क मातहत काम करत हउँ अउर मोरे मातहत भी कछू सिपाही अहइ। मई जब कउनो स कहत हउँ, ‘जो’ तउ उ चला जात ह। अउर जब मई आपन नउकर स कहत हउँ, ‘आवा’ तउ उ आइ जात ह अउर जब

मई आपन नउकर स कहत हउँ, ‘इ करा’ तउ उ ओका करत ह।”

९ ईसू जब इ सुनेस तउ ओका ओह प बहोत अचरज भवा। जउन भारी मनइयन क भीड़ ओकरे पाछे चली आवत रही, ओनके कईती मुड़िके ईसू कहेस, “मई तोहका बतावत हउँ अइसा बिसवास मोका इस्राएल में भी कहुँ नाही मिला।”

१० फिन पटए भए उ पचे जब वापस घरे पहुँचेन तउ उ सबइ उ नउकरे क बेरामी स जरटुट पाएन।

मुर्दा क जिन्नगी देब

११ फिन अइसा भवा कि ईसू नाइन नाउँ क एक सहर चला गवा। ओकर चलन अउर भारी आलम ओकरे संग रहा। १२ उ जइसे ही सहर दुआरे क नगिचे आवा तउ हुवाँ स एक मुर्दा क लइ जात रहेन। उ आपन विधवा महतारी क इकलौता बेटवा रहा। तउ सहर क अनगिनत मनइयन क भीड़ ओकरे संग रही। १३ जइसे पर्भू ओका निहारेस तउ ओकर हिरदय दया स भर गवा। उ उससे बोला, “जिन रोवा।” १४ फिन उ अगवा बढ़ा अउर उ ताबूत क छुइ लिहस उ पचे जउन ताबूते क लइ जात रहेन, हुवँइ ठहर गएन। ईसू कहेस, “नउ जवान! मई तोहसे कहत हउँ खड़ा ह्वा।” १५ तउ उ मुर्दा मनई बइठ गवा अउर बोलइ लाग। ईसू ओका ओकरी महतारी क वापस लौटाएस।

१६ अउर फिन उ सबइ स्तरद्धा अउर अचरज में पड़ि गएन। अउर इ कहत भएन परमेस्सर क महिमा बखनइ लागेन, “हमरे बीच एक महान नबी परगट भवा अहइ!” अउर कहइ लागेन, “परमेस्सर आपन मनइयन क मदद करइ बरे आइ ग अहइ।”

१७ ईसू क समाचार यहूदिया अउर आस-पास क देसन में सब कहुँ कईती फैलि गइ।

यूहन्ना क सवाल

(मत्ती ११ :२-१९)

१५ इ सबइ बातन क बारे में यूहन्ना क मनवइयन ओका सब कछू बताइ दिहन। तउ यूहन्ना आपन दुइ चलन क बोलाइ के १९ ओनका पर्भू स इ पूछइ बरे पटएस, “का तू उहइ अहा, जउन आवइवाला अहइ या हम पचे कउनो अउर क बाट जोही?”

२० फिन उ मनइयन ईसू क लगे पहुँचेन तउ उ पचे कहेन, “बपतिस्मा क देवइया यूहन्ना हमका तोहसे इ पूछइ पटएस ह: ‘का तू उहइ अहा जउन आवइवाला अहइ या हम सबइ कउनो अउर क बाट जोही।’”

२१ उहइ समइ उ बहोत स बेरमिया क नीक किहेन अउर ओनका करुण दुख अउर दुस्ट आतिमन स छुटकारा दियाएस। अउर बहोत स आँधर न क आँखिन दिहस। २२ फिन उ ओनका जवाब दिहस, “जा अउर यूहन्ना स जउन तू निहायाँ ह अउर सुन्या ह, ओका बतावा कि आँधर फिन स लखत अहई, लँगड़ा लूला चलत फिरत अहई अउर कोढ़ी सुद्ध होइ ग अहई। बहिरन सुनि पावत हीं अउर मुरदा फिन जिआवा जात अहई। गरीब मनइयन क सुसमाचार सुनाई जात अहई। २३ उ मनई धन्य अहइ जेका मोर क स्वीकार करइ मँ कउनो हिचक नाही।”

२४ जब यूहन्ना क संदेस लइ आवइवालन चला गएन तउ ईसू भीडे मँ मनइयन क यूहन्ना क बारे मँ बताउब सुरु किहेस: “तू पचे बियावान जंगल मँ का लखइ गवा रह्या ? का हवा मँ झूलत कउनो सरपत लखे गवा रइया ? नाही ? २५ फिन तू का लखइ गवा रह्या ? का कउनो पुरुस क मँहगा ओढ़ना पहिरे क लखइ गवा रह्या ? नाही, उ पचे जउन उत्तम ओढ़ना पहिरत हीं अउर जउन भोग बिलास क जिन्नगी मँ जिअत हीं, उ सबइ तउ रजवाड़ा मँ पाइ जात हीं। २६ मुला बतावा तू का देखइ गवा रह्या ? का कउनो नबी ? हाँ, मई तोहका बतावत हउँ कि तू जेका लख्या ह, उ कउनो नबी स कहीं जिआदा बा। २७ इ उहइ अहइ जेकरे बारे मँ लिखा अहइ :

‘देखा ! तोहसे पहिले मई आपन दूत पठवत अही, उ तोहसे पहिले ही राह तइयार करी।’ \*

२८ मई तोहका बतावत हउँ कि कउनो स्त्रियन स पइदा भएन मँ यूहन्ना स महान कउनो नाही अहइ। मुला फिन भी परमेस्सर क राज्य क छोटो स छोटो मनई भी ओस बड़का बा।”

२९ (तबहिं हर कउनो, हियाँ तलक कि चुंगी (टैक्स) उगहिया भी यूहन्ना क सुनिके ओकर बपतिस्मा लइके इ मान लिहेन कि परमेस्सर क रस्ता सच्चा अहइ। ३० मुला फरीसियन अउर धरम सास्त्रियन ओकर बपतिस्मा न लइके ओनके बारे मँ परमेस्सर क इच्छा क टारि दिहन।)

३१ “तउ फिन इ पीढ़ी क मनइयन क उपमा मई कउने स करउँ कि उ पचे कइसे बाटेन ? ३२ उ पचे बजारे मँ बइठेन ओन बचवन क नाई अहई जउन एक दूसर क पुकारिके कहत हीं :

‘हम तोहरे बरे बाँसुरी बजावा मुला तू नाच्या नाही।

हम तोहरे बरे सोक गवनिया गावा मुला तू रोया नाही।’

३३ काहेकि बपतिस्मा क देवइया यूहन्ना आवा जउन न तउ रोटी खात रहा अउर न ही दाखरस पिअत रहा अउर तू कहत ह, ‘ओहमाँ दुस्ट आतिमा समाइ गइ अहइ।’ ३४ फिन खात पिअत भवा मनई क पूत आवा, मुला तू कहत अहा, ‘देखा, इ पेटार अहइ। पियक्कड़ अहइ, चुंगी उगहियन अउर पापी मनइयन क मीत अहइ।’ ३५ बुद्धि क उत्तम होब ओकरे फल स सिद्ध होत ह।”

### फरीसी समौन

३६ फरीसियन मँ एक ठु फरीसी आपन संग खइया प ओका न्योत दिहस। तउ उ फरीसी क घर गवा अउर ओकरे हियाँ भोजन करइ बइठा।

३७ हुवई सहर मँ एक पापी स्त्री रही, ओक जब इ पता चलि गवा कि उ एक फरीसी क घर भोजन करत अहइ तउ उ स्फटिक क एक पथरी मँ इतर लइके आइ। ३८ उ ओकरे पाछे ओकरे गोड़वा क लगे खड़ी रही। उ रोवत रही। आपन आँसुअन स उ ओकर गोड़ भिजवइ लाग। फिन उ गोड़वा क आपन बाले स पोछेस अउर गोड़वा क चूमिके ओन प इतर उड़ेरस।

३९ उ फरीसी जउन ईसू क आपन घर बोलाएस, इ लखिके मनवा मँ सोचेस, “जदि इ मनई नबी होत तउ जान लेत कि ओका छुवइवाली स्त्री कउन अहइ अउर कइसी अहइ ? उ जान लेत कि इ तउ पापिन अहइ।”

४० जवाबे मँ ईसू ओसे कहेस, “समौन मोका तोहसे कछू कहइ क अहइ।”

उ बोला, “हे गुरु, कहा।”

४१ ईसू कहेस, “कउनो साहकारे क दुइ करजदार रहेन। एक प ओकरे पाँचसौ चानी क सिक्का निकरत रहेन अउर दूसर प पचास। ४२ काहेकि उ दुइनउँ करजा नाही पाट पाएन। यह बरे उ दायी कइके दुइनउँ क करजा माफ कइ दिहस। अब बतावा दुइनउँ मँ स ओका जिआदा पिरेम कउन स करी ?”

४३ समौन जवाब दिहस, “मोर बिचार बा, उहइ जेका उ जिआदा करजा छोड़ दिहस।”

ईसू कहेस, “तू नीक सोच्या ह।” ४४ फिन उ स्त्री कइती मुड़िके उ समौन स कहेस, “तू इ स्त्री क लखत अहा ? मई तोहरे घरवा आवा अही, तू मोड़े गोड़वा धोवइ क पानी नाही दिहा मुला इ

मोरे गोड़वा क अँसुअन स धोड़ दिहस अउर फिन आपन बरवा स पॉछेस। <sup>४५</sup> तू स्वागत मँ मोका नाही चूम्या मुला इ जब तलक मई भितरे गवा हूँ, मोरे गोड़वा क लगातार चूमत बाटइ। <sup>४६</sup> तू मोरे मूडे प तेल नाही मल्या, मुला इ मोरे गोड़वा प इतर छिड़केस। <sup>४७</sup> एह बरे मई तोहका बतावत हूँ कि एकर अगाध पिरम दसित करत ह कि एकर पाप छमा कइ दीन्ह ग अहई। मुला उ जेका तनिक पापन क छमा मिली, उ थोड़ा पिरम करत ह।”

<sup>४८</sup> तब ईसू उ स्त्री स कहेस, “तोहार पाप छमा कइ दीन्ह ग अहई।”

<sup>४९</sup> फिन जउन ओकरे संग जेवत रहेन, उ सबइ मने मँ सोचइ लागेन, “इ कउन अहइ, जउन पापन क छमा कइ देत ह?”

<sup>५०</sup> तब उ स्त्री स ईसू कहेस, “तोहार बिसवास तोहार रच्छा किहेस ह। सांति स जा।”

ईसू आपन चेलन क संग

<sup>१</sup> एकरे बाद अइसा भवा कि ईसू परमेस्सर क राज्य क सुसमाचार मनइयन क सुनावत भवा सहर-सहर अउर गाउँ गाउँ घूमइ लाग। ओकर बारहु प्रेरितन भी ओकरे संग होत रहेन। <sup>२</sup> ओकरे संग कछू स्त्रियन भी होत रहीं जेनका उ बेरामी अउर दुस्ट आतिमन स छुटकारा दियावत रहा। एनमाँ मरियम मगदलीनी नाउँ क एक स्त्री रही जेका सात दुस्ट आतिमन स छुटकारा मिला रहा। <sup>३</sup> हेरोदेस क संरकाम अफसर खोजा क पत्नी योअन्ना भी एनहीं मँ रहिन। साथ ही सूसन्नाह अउर ढेर क स्त्रियन भी रहिन। इ स्त्रियन आपन जतन स ईसू अउर ओकरे प्रेरितन क सेवा क संरजाम करत रहिन।

बिआ बोवइ क दिस्टान्त कथा

(मत्ती १३ :१-१७ ; मरकुस ४ :१-१२)

<sup>४</sup> जब सहर-सहर स आइके मनइयन क बड़ी भीड़ एकटठा होत रही, तउ उ ओनसे एक दिस्टान्त कथा कहेस,

<sup>५</sup> “एक किसान आपन बिआ बोवइ निकरा। जब उ बिआ बोएस कछू बिआ राह क किनारे जाइके गिरेन अउर गोड़े तरे रौंद गएन। अउर चिड़ियाँ ओनका चुग लिहेन। <sup>६</sup> कछू बिआ पथरही धरती प गिरेन, उ सबइ जब उगेन तउ ओद न होइ स

मुरझाइ गएन। <sup>७</sup> कछू बिआ कँटेहरी झाड़िन मँ गिरेन। काँटन क बाढ़इ क संग संग उ भी बाढ़ेन अउर कँटवन ओनका दबोच लिहेन। <sup>८</sup> अउर कछू बिआ धरती प गिरेन। उ उगेन अउर उ सबइ सउ गुना फसल दिहेन।”

इ बातन क बतावत भवा उ पुकारिके कहेस, “जेकरे लगे कान अहई, उ सबइ सुनि लेई।”

<sup>९</sup> ओकर चेलन ओसे पूछेन, “इ दिस्टान्त कथा क अरथ का अहइ?”

<sup>१०</sup> तउ उ बताएस, “परमेस्सर क राज्य क भेद जानइ क सुविधा तोहका दीन्ह गइ अहइ मुला दूसर क इ भेद दिस्टान्त कथा स दीन्ह ग अहई जेहसे :

‘उ पचे देखत भी

न देख पावइ

अउर सुनते हुए भी

न समुझ पावइ।’<sup>†</sup>

बिआ बोवइ क दिस्टान्त कथा क अरथ

(मत्ती १३ :१८-२३ ; मरकुस ४ :१३-२०)

<sup>११</sup> “इ दिस्टान्त कथा क अरथ इ अहइ : बिआ परमेस्सर क उपदेस अहइ। <sup>१२</sup> उ बिआ जउन राह क किनारे गिरा रहेन, उ मनइयन उपदेस जउन अब उपदेस सुनत हीं, सइतान आवत ह अउर उपदेस क ओनके मने स निकार लइ जात ह जेहसे उ सबइ पतिआय न पावइ अउर ओनकइ उद्धार न होइ सकइ। <sup>१३</sup> उ बिआ जउन पथरही भुइयाँ प गिरा रहेन ओनकइ अरथ अहइ ओन मनइयन स जउन उपदेस सुनत हीं तउ ओका खुसी स तउ अपनावत हीं। मुला बिआ ओनके भितरे जम नाही पावत उ सबइ कछू समइ बरे बिसवास करत हीं मुला परीच्छा क घड़ी मँ डुग जात हीं।

<sup>१४</sup> “अउर जउन बिआ काँटन मँ गिरेन ओकर अरथ अहइ, ओन मनइयन स जउन उपदेस सुनत हीं, मुला जब उ पचे आपन राहे प चलइ लागत हीं। तउ फिकिर, धन दौलत अउर जिन्नगी क भोग बिलास ओका दहबोचि लेत हीं, जेहसे ओन प कबहुँ फसल पाकत नाही। <sup>१५</sup> अउर बढ़िया भुइयाँ प गिरा भवा बिआ क अरथ अहइ ओन मनइयन स जउन अच्छा अउर सच्चा मन स जब उपदेस क सुनत हीं तउ ओका धारण भी करत हीं। फिन आपन धीरज क संग उ पचे उत्तम फल देत हीं।



आपन सच्चाई क बैपरा

(मरकुस ४ :२१-२५)

१६ “कउनो दीया ढकना स ढाकइ बरे नाही जलावत। या ओका बिछुना तरे नाही धरत। मुला उ ओका डीबट प धरत ह काहेकि जउन भीतर आवई, रोसनी देखि सकई। १७ काहेकि कछू भी अइसा छुपा नाही अहइ जउन उजागर न होई अउर कछू भी अइसा छुपा नाही बा जउन जाना न जाई अउर परगट न होई। १८ एह बरे धियान स सुना काहेकि जेकरे लगे बा ओका भी दीन्ह जाई अउर जेकरे लगे नाही अहइ, ओसे भी ओकरे नगिचे देखात ह, उ भी लइ लीन्ह जाई।”

ईसू क मनवइयन ही ओकर सच्चा परिवार

(मत्ती १२ :४६-५० ; मरकुस ३ :३१-३५)

१९ तबही ईसू क महतारी अउर ओकर भाइयन ओकरे लगे आएन मुला उ पचे भीड़ क कारण ओकरे नगिचे नाही जाइ सकेन। २० यह बरे ईसू स इ कहा गवा, “तोहार महतारी अउर तोहार भाइयन बाहेर खड़ा अहइ। उ पचे तोसे भेंटइ चाहत ही।”

२१ मुला ईसू ओनका जवाब दिहस, “मोर महतारी अउर मोर भाइयन तउ इ सबइ अहइ जउन परमेस्सर क उपदेस सुनत ही अउर ओह प चलत ही।”

चेलन क ईसू क सक्ति क दर्सन

(मत्ती ८ :२३-२७ ; मरकुस ४ :३५-४१)

२२ तबइ एक दिन अइसा भवा कि उ आपन चेलन क संग एक नाउ प चढ़ा अउर ओनसे “आवा, झिलिया क उ पार चली।” तउ उ पचे पाल खोलि दिहन। २३ उ पचे जब नाउ खेवत रहेन, ईसू सोइ गवा। झिलिया प आन्धी अउर तूफान उतर आवा। ओनके नाउ मँ पानी भरइ लाग। उ पचे खतरा मँ रहेन। २४ एहसे उ सबइ ओकरे लगे आएन अउर ओका जगाइके कहइ लागेन, “स्वामी! स्वामी! हम बूडत अही।”

फिन उ खड़ा भवा अउर उ आन्धी, अउर लहरन क फटकारेस। उ सबइ थम गइन अउर हुवाँ सान्ति होइ गइ। २५ फिन उ ओनसे पूछेन, “तोहार बिसवास कहाँ गवा?”

मुला उ पचे डेरान रहेन अउर अचरज मँ पड़ा रहेन। उ पचे आपुस मँ एक दूसरे स कहेन, “आखिर इ अहइ कउन जउन हवा अउर पानी दुइनउँ क हुकुम देत ह अउर उ सबइ ओका मानत ही।”

दुस्ट आतिमन स छुटकारा

(मत्ती ८ :२८-३४ ; मरकुस ५ :१-२०)

२६ फिन उ पचे गिरासेनियन लोगन क पहुँटा मँ पहुँचेन जउन गलील झीले क समन्वा रहा। २७ जइसेन ही उ किनारे प उतरा, सहर क एक मनई ओका मिला। ओहमा दुस्ट आतिमन क स्वारी रहिन। बहोत दिना स उ न तउ ओढ़ना पहिरत रहा, न ही उ घरे मँ रहत रहा, मुला उ कबरे मँ रहत रहा।

२८-२९ उ जब ईसू क लखेस तउ चिचियात भवा ओकरे समन्वा गिरिके ऊँची अवाज मँ बोला, “हे सर्वोच्च परमेस्सर क पूत ईसू तू मोसे का चाहत ह? मई बिनती करत हँ मोका पीरा जिन द्या।” उ दुस्ट आतिमा क उ मनई मँ स बाहेर निकरइ क हुकुम दिहेस, काहेकि उ दुस्ट आतिमा उ मनई क बहोत दाई पकडे रही। अइसेन अवसरन प ओका हथकड़ी बेड़ी स बाँधि के पहरुअन क बीच राखि जात रहा। मुला उ हमेसा जंजीर क तोरि डावत अउर दुस्ट आतिमा ओका वीरान जगहन मँ भगावत रहत!

३० तउ ईसू ओसे पूछेस, “तोहार नाउँ का अहइ?”

उ कहेस, “सेना।” (काहेकि बहोत स दुस्ट आतिमन ओहमा समाई रहिन।) ३१ उ सबइ ईसू स बहस मोबहसा क संग बिनती करत रहेन कि ओनका गहिर गड़हा मँ जाइके हुकुम न देई। ३२ अब देखा, तबहिँ हुआँ पहाड़ी प सुअरन क झुण्ड चरत रहा। दुस्ट आतिमन ओसे बिनती किहेन कि उ ओनका सुअरिन मँ जाइ देई। तउ उ ओनका जाइके हुकुम दिहेस। ३३ एह प उ सबइ दुस्ट आतिमन उ मनई मँ स बाहेर निकरी अउर ओन सुअरिन मँ घुस गइन। अउर सुअरिन क झुण्ड तरखाले उ ढालू तट स लुढ़कत पुढ़कत अउर दउड़त भवा झीले मँ जाइके गिरि गवा अउर बूड़ गवा।

३४ सुअरिन क झुण्ड क बहोरिया, जउन कछू भवा रहा, ओका निहारिके हुवाँ स परानेन। अउर एकर खबर उ पचे सहर अउर दिहात मँ सुनाएन। ३५ फिन हुवाँ क मनइयन जउन कछू घटा रहा ओका लखइ बाहेर आएन। उ सबइ ईसू स भेंटेन। अउर उ पचे उ मनई क जेहमाँ स दुस्ट आतिमन निकरी रहिन, ईसू क गोड़वा प बइठा पाएन। उ मनई ओढ़ना पहिरे रहा अउर ओकर दिमाग एकदम सही रहा। एहसे उ सबहिँ डेराइ गएन। ३६ जउन निहारेन, उ पचे बताएन क दुस्ट

आतिमन क सवारीवाला मनई कइसे नीक भवा ।  
३७ गिरासेन पहुँटा के सबहीं वसइया ओसे बिनती  
किहेन कि उ हुवाँ स चला जाइ काहेकि सबहिं  
बहोत डेरान रहेन ।

तउ ईसू नाउ मँ आवा अउर लौटि गवा ।  
३८ मुला जउने मनई स दुस्ट आतिमन निकरी  
रहिन, उ ईसू स आपन क संग लइ जाइके बिनती  
करत रहा । एह पइ ईसू ओका इ कहत भवा लौटाइ  
दिहस, ३९ “घर जा अउर जउन कछू परमेस्सर  
तोहरे बरे किहे अहइ ओका बतावा ।”

तउ उ लौटिके ईसू ओकरे बरे जउन कछू किहस  
ह, ओका सारे नगर मँ कहत फिरा ।

मरी लरकी क जिन्नीगी देव अउर  
बेरमिया स्त्री क चंगा होव

(मत्ती ९ : १८-२६ ; मरकुस ५ : २१-४३)

४० अब लखा जब ईसू लौटा तउ मनइयन क  
भीड़ ओकर अगवानी किहेस, काहेकि उ सबइ  
ओका जोहत रहेन । ४१-४२ तबहीं याईर नाउँ क  
एक मनई हुवाँ आइ । उ हुवाँ क आराधनालय क  
मुखिया रहा । उ ईसू क गोड़वा मँ गिरि गवा अउर  
ओसे आपन घरे जाइके बिनती करइ लाग । काहेकि  
ओकर बारह बरिस क एक इकलौती बिटिया रही,  
उ मरइ क रही ।

तउ ईसू जब जात रहा तउ भीड़ ओका कुचरि  
देत रही । ४३ हुवाँ एक स्त्री रही जेकर बारह बरिस  
स खून बहत रहा । जउन कछू ओकरे लगे रहा,  
उ बैद्य पर खरिच कइ दिहस, मुला उ कउनो स  
नीक नाही होइ पाइ । ४४ उ ओकरे पाछे आइ अउर  
ओकरे चोंगा क मोहरी छुएस अउर तुरंतहि ओकर  
लहू बहव रुकि गवा । ४५ तब ईसू पूछेस, “उ कउन  
अहइ जउन मोका छुएस ह ?”

जब सबहिं मुकरइ लागेन कि उ पचे ईसू क  
नाहीं छुएन तउ पतरस कहेस, “स्वामी तोहका  
भिड़िया घरे अहइ अउर तोहका दबावति अहइ ।”

४६ मुला ईसू कहेस, “कउनो मोका छुएस ह  
काहेकि मोका लागत अहइ कि मोसे सक्ती निकरी  
गइ होइ ।” ४७ जब उ स्त्री देखेस कि मइँ छुप  
नाहीं सकित तउ उ काँपत काँपत आइ अउर ईसू क  
समन्वा गिरि गइ । हुवाँ सबहीं मनइयन क समन्वा  
उ बताएस कि मइँ तोहका कउने कारण स छुए  
हुँ अउर कइसे फउरन नीक होइ गइ । ४८ एह प  
ईसू ओसे कहेस, “बिटिया तोहरे पतियाये स तोहार  
उद्धार भवा ह । चइन स जा ।”

४९ उ अबहीं बोलत रहा कि आराधनालय क  
मुखिया क घरे स कउनो आवा अउर बोला, “तोहार

बिटिया मरि गइ अहइ । तउ गुरु क अब अउर  
कस्ट जिन द्या ।”

५० ईसू इ सुनि लिहस । तउ उ ओसे बोला,  
“डेरअ जिन ! बिसवास राखा । उ बचि जाई ।”

५१ जब ईसू उ घरे मँ आवा उ आपन संगे पतरस,  
यूहन्ना, याकूब अउर बिटिया क महतारी बाप क  
तजिके कउनो अउर क आपन संग भितरे नाही लइ  
गवा । ५२ सबहीं मनइयन उ लरकी बरे रोवत रहेन  
अउर बिलाप करत रहेन । ईसू कहेस, “रोउव बंद  
कइ द्या । इ मरी नाही बा, मुला सोवति अहइ ।”

५३ एह पइ मनइयन ओकर हँसी उड़ाएन ।  
काहेकि उ जानत रहेन कि लरकी मरि चुकी  
बा । ५४ मुला ईसू ओकर हथवा पकडेस अउर  
चिल्लाइके कहेस, “बच्ची, खड़ी होइ जा !”  
५५ ओकर आतिमा लौटि आइ, अउर उ फउरन  
उठि गइ । ईसू हुकुम दिहेस, “एँका कछू खइया क  
दीन्ह जाइ ।” ५६ एह पइ लरकी क महतारी बाप क  
बहोत अचरज भवा मुला ईसू ओनका हुकुम दिहेस  
कि जउन भवा अहइ, ओका उ पचे कउनो क न  
बतावइँ ।

ईसू बारहु प्रेरितन क पठएस

(मत्ती १० : ५-१५ ; मरकुस ६ : ७-१३)

१ फिन ईसू बारहु प्रेरितन क एक साथे  
बोलाँएस । अउर ओनका दुस्ट आतिमन स  
छूटकारा दियावइ क सामर्थ अउर हक दिहेस । उ  
ओनका बेरामी दूर करइके सामर्थ दिहेस । २ फिन  
उ ओनका परमेस्सर क राज्य क सुसमाचार का  
घोसना किहेस अउर बेरमियन क नीक करइ बाहेर  
पठएस । ३ उ ओनसे कहेस, “आपन जात्रा बरे  
कछू संग न लेई, न लाठी, न झोरा, न रोटी, चाँदी  
अउर न कउनो अउर ओढ़ना । ४ तू जउन कउनो  
घरे क भितरे जा, हुवई ठहरा । अउर जब तलक  
बिदा न ह्वा, हुवई ठहरा रहा । ५ अउर जहाँ कहुँ  
मनई तोहार अगवानी न करइँ तउ जब तू उ सहर  
क तजि द्या अउर ओनके खिलाफ सनद क रूप मँ  
गोड़वा क धूरि झाड़ि द्या ।”

६ तउ हुवाँ स चलिके उ सबइ हर कतहुँ  
सुसमाचार क उपदेस देतेन अउर मनइयन क चंगा  
करत सबहीं गाउँन स फिरत भए जात्रा करइ  
लागेन ।

हेरोदेस क भरम

(मत्ती १४ : १-१२ ; मरकुस ६ : १४-२९)

७ अब जबहिं एक चउथाई देस क राजा हेरोदेस  
जउन कछू भवा रहा, ओकरे बारे मँ सुनेस तउ उ

भरम मैं पड़ि गवा काहेकि कछु मनइयन इ कहत रहेन, “यूहन्ना क मरे हुअन मैं स जिआइ दीन्ह ग अहइ।”<sup>८</sup> दूसर कहत रहेन, “एलिय्याह परगट भवा अहा।” कछु अउर कहत रहेन, “पुरान जुग क कउनो नबी जी उठा बा।”<sup>९</sup> मुला हेरोदेस कहेस, “मई तउ यूहन्ना क गटइ कटवाइ दिहे रहेउँ। फिन इ अहइ कउन जेकरे बारे मैं मइ अइसी बात सुनत रहत हउँ?” तउ हेरोदेस ओका देखइ क जतन करइ लाग।

पाँच हजार स जिआदा क भोज

(मत्ती १४ :३-२१ ; मरकुस

६ :३०-४४ ; यूहन्ना ६ :१-१४)

<sup>१०</sup> फिन जब परेरितन लौटिके आएन तउ उ पचे जउन कछु किहे रहेन, सब ईसू क बताएन। तउ उ ओनका हुवाँ स आपन संग लइके चुप्पे बैतसैदा नाउँ क सहर चला गवा।<sup>११</sup> मुला भीड़ क पता लग गवा तउ उ भी ओनके पाछे होइ गइ। ईसू ओनकइ सूआगत किहेस अउ परमेस्सर क राज्य क बारे मैं ओनका बताएस। अउर जेनका दवाई क जरूरत रही ओनका नीक किहेस।

<sup>१२</sup> जब दिन ओनवइ लाग तउ उ पचे बारहु ओकरे लगे आएन अउर बोलेन, “भीड़ क बिदाई दइ द्या जइसे उ सबइ नगिचे क गाऊँन अउर खेतन मैं जाइके ठहरइ क ठिकाना अउर खइया क पाइ सकइ काहेकि हम हिआँ बहोत दूर सुनसान जगह मैं अही।”

<sup>१३</sup> मुला उ ओनसे कहेस, “तू ही एँका खइया क द्या।”

उ पचे बोलेन, “हमरे लगे बस पाँच रोटी अउर दुइ मछरी क छोड़िके अउर कछु भी नाही अहइ। या तू इ तउ नाही चाहत अहा कि हम पचे जाई अउर इ सबन बरे खइया के मोल क लइ आई।”

<sup>१४</sup> (हुवाँ करीब पाँच हजार पुरुसन रहेन।)

मुला ईसू आपन चलन स कहेस, “ओनका पचास पचास क दल मैं बइटाइ द्या।”

<sup>१५</sup> तउ उ पचे वइसा ही किहेन अउर हर कउनो क बइटाइ दिहन।<sup>१६</sup> फिन ईसू पाँच रोटी अउर दुइ मछरी क लइके सरगे कइँती लखत भवा ओनके बरे धन्यवाद दिहेस अउर फिन ओनके टुकड़न मैं तोरत भवा ओनका आपन चलन क दिहस कि उ पचे मनइयन क परोस देई।<sup>१७</sup> मनइयन खुब जिअरा भरिके खाएन अउर बचा भवा टुकड़न स ओकर चलन बारह झउआ भरेन।

पतरस कहेस ईसू ही मसीह अहइ

(मत्ती १६ :३३-१९ ; मरकुस ८ :२७-२९)

<sup>१८</sup> इ भवा कि ईसू जब अकेल्ले मैं पराथना करत रहा तउ ओकर चलन भी ओकरे संग रहेन। तउ ईसू ओनसे पूछेस, “मनइयन का कहत हीं कि मई कउन हउँ?”

<sup>१९</sup> उ पचे जवाब दिहन, “बपतिस्मा देवइया यूहन्ना कछु कहत हीं एलिय्याह मुला कछु दूसर कहत हीं पुरान जुग क कउनो नबी उठि खइ भवा बा।”

<sup>२०</sup> ईसू ओनसे कहेस, “अउर तू का कहत ह कि मई कउन हउँ?”

पतरस जवाब दिहस, “परमेस्सर क मसीह।”

<sup>२१</sup> मुला इ बारे मैं कउनो क भी न बतावइ क चिताउनी देत भवा ईसू ओनसे कहेस,

ईसू कहेस उ जरूर मरिहीं

(मत्ती १६ :२१-२८ ; मरकुस ८ :३१-९ :१)

<sup>२२</sup> “इ तइ अहइ कि मनई क पूत ढेरि क कस्ट उटाई अउर उ बुजुर्ग यहूदी नेतन, मुख्ययाजकन अउर धरम सास्तिरियन के मना कइ दिहे स मारि डावा जाई फिन तिसरे दिन जी जाई।”

<sup>२३</sup> फिन उ ओन सबन स कहेस, “जदि कउनो मोरे साथ चलत चाहत ह तउ ओका खुद आपन क नकारइ क होई। अउर हर दिन ओका आपन करूस (यातना) उठावइ क होई। अउर मोर अनुसरन करइ क होइ।<sup>२४</sup> काहेकि जउन कउनो आपन जिन्नगी बचाउब चाहत ह, उ ओका खोइ बइठी मुला जउन कउनो मोरे बरे आपन जिन्नगी क तजि देइ, उहइ ओका बचाई।<sup>२५</sup> काहेकि एँहम कउनो मनई का का लाभ अहइ कि उ समूच संसार क लइ लेइ मुला खुद आपन क नास कइ देइ या खोइ देइ।<sup>२६</sup> जउन कउनो भी मोरे या मोरे सबन बरे लजात ह, ओकरे बरे मनई क पूत भी जब आपन महिमा मैं, आपन परमपिता अउर पवित्र सरगदूतन क महिमा मैं परगट होई तउ ओकरे बरे लजाइ जाई।<sup>२७</sup> मुला मई तोसे सच कहत हउँ, हिआँ कछु खइ अहइ, जउन जब तलक मउत क सेवाद नाही लेइही, जब ताई परमेस्सर क राज्य क ना लखि लेई।”

मूसा अउर एलिय्याह क संग ईसू

(मत्ती १७ :१-८ ; मरकुस ९ :२-८)

<sup>२८</sup> इ सबन के कहइ क लगभग आठ दिना बाद उ पतरस, यूहन्ना अउर याकूब क संग लइके

पराथना बरे पहाड़े प गवा। २९ फिन अइसा भवा कि पराथना करत भए ओकरे मुँहना क रूप तनिक अलग होइ गवा अउर ओकर ओढ़ना चमचमात सफेद होइ गएन। ३० हुबई ओसे बतियात दुइ मनई परगट भएन। उ सबइ मूसा अउर एलिय्याह रहेन। ३१ जउन आपन महिमा क संग परगट भ रहेन अउर ईसू क मउत क बारे मँ बात करत रहेन जेका ओका यरूसलेम मँ पूरा करइ क रहा। ३२ मुला पतरस अउर जउन ओनके संग रहेन ओनका नीद आइ गइ। तउ जब उ पचे जागेन उ पचे ईसू क महिमा क लखेन अउर उ सबइ उ दुइ मनइयन क लखेन जउन ओकरे संग खड़ा रहेन। ३३ अउर फिन भवा अइसा कि जइसे ही उ पचे ईसू स बिदाई लेत रहेन, पतरस ईसू स कहेस, “स्वामी अच्छा बा कि हम हिआँ अही, हमका तीन माँड़ब बनवइ क अहइँ एक तोहरे बरे, एक मूसा बरे अउर एक एलिय्याह बरे।” (उ नाहीं जानत रहा, उ का कहत अहइ।) ३४ उ इ कहत रहा कि एक बादर उमड़ा अउर उ ओनका आपन छाया मँ घेरि लिहस। जइसे ही ओन प बादर छावा, उ पचइ घबराइ गएन। ३५ तबही बदरे स अकासवाणी भइ, “इ मोर पूत अहइ, एँका मई चुन्योँ ह, एकर सुना।” ३६ जब अकासवाणी होइ गइ तउ उ पचे उहाँ ईसू क अकेल्लन पाएन। उ पचे एँकरे बारे मँ चुप रहेन। उ सबइ जउन कछू लखेन, ओकरे बारे मँ उ समइ कउनो स कछू नाहीं कहेन।

ईसू लरिका क दुस्ट आतिमा स  
छुटकारा दिलावत ह

(मत्ती १७ :१४-१८ ; मरकुस ९ :१४-२७)

३७ अगवा दिन अइसा भवा कि जब उ पचे पहाड़ी स तरखाले उतरेन तउ ओनका एक बड़ी भीड़ मिलि गइ। ३८ तबही भीड़ मँ स एक मनई चिचियान, “गुरु, मई पराथना करत हउँ कि मोरे बेटवा प दया दृस्टि करा। उ मोरे इकलौती संतान अहइ। ३९ एकदम्मई एक दुस्ट आतिमा ओका जकरि लेत ह अउर चिचिआत ह। ओका दुस्ट आतिमा अइसे अइँठत ह कि ओकरे मुँह स झाग निकरइ लागत ह। उ ओका बराबर सतावत रहत ह अउर कउनो तरह नाहीं छोड़त। ४० मई तोहरे चलन स पराथना किहा ह कि ओका बाहेर खदेर देई मुला उ पचे अइसा नाहीं कइ सकेन।”

४१ तब ईसू जवाब दिहेस, “अरे अबिसवासियो अउर भटक गवा मनइयो, मई अउर केतना दिन तोहरे संग रहब अउर कब ताई तोहार सहत रहब ? आपन बेटवा क हिआँ लिआवा।”

४२ अबहीं उ लरिका अउतइ रहा कि दुस्ट आतिमा ओका पटकनी दिहस अउर अइँठेस। मुला ईसू दुस्ट आतिमा क फटकारेस अउर लरिका क रोग स जरटूट कइके बाप क सौँपि दिहस। ४३ उ सबइ परमेस्सर क इ बड़कई स अचरजे मँ पड़ि गएन।

ईसू आपन मउत क बारे मँ कहेस

(मत्ती १७ :२२-२३ ; मरकुस ९ :३०-३२)

ईसू जउन कछू करत रहा ओखा लखिके मनइयन जब अचरज करत रहेन तबहीं ईसू आपन चलन स कहेस, ४४ “अब मई जउन तोहसे कहत हउँ, ओन बातन प धियान द्या। मनई क पूत मनइयन क हाथे स धरावइ जाइवाला अहइ।” ४५ मुला उ पचे इ बात क नाहीं समुझा सकेन। इ ओनसे छुपी रही। तउ उ सबइ ओका पहिचान नाहीं पाएन। अउर उ पचे उ बात क बारे मँ ओसे पूछइ स ससान रहेन।

सब स बड़कवा कउन

(मत्ती १८ :१-५ ; मरकुस ९ :३३-३७)

४६ एक दाई ईसू क चलन क बीच इ बाते प झगड़ा भवा कि ओनमाँ स सब स बड़कवा कउन बाटइ ? ४७ ईसू जानि गवा कि ओनके मने मँ का बिचार अहइ। तउ उ गदिला क लिहस अउर ओका अपने लगे टाड़ कइके ४८ ओनसे बोला, “जउन कउनो इ गदिला क मोरे नाउँ मँ ग्रहण करत ह, उ माना मोर ग्रहण करत बाटइ। अउर जउन कउनो मोर ग्रहण करत ह, उ ओकर (परमेस्सर) ही ग्रहण करत बाटइ जउन मोका पटएस ह। एह बरे जउन तू सबन मँ सब स नान्ह बाटइ, उहइ सबइ त बड़कवा अहइ।”

जउन तोहार बिरोधी नाहीं, उ तोहार ही अहइ

(मरकुस ९ :३८-४०)

४९ यूहन्ना आपन प्रतिक्रिया परगट करत भवा कहेस, “स्वामी, हम पचे तोहरे नाउँ प एक ठु मनई क दुस्ट आतिमन क निकारत लखा ह। हम सबइ ओखा रोकइ थामइ क जतन कीन्ह ह काहेकि उ हम पचन मँ स कउनो नाहीं अहइ, जउन तोहरे पाछे पाछे चलत हीं।”

५० एँह पइ ईसू यूहन्ना स कहेस, “ओका जिन रोका काहेकि जउन तोहरे बिरुद्ध मँ नाहीं अहइ, उ तोहरे पच्छ मँ ही बाटइ।”

### एक सामरी सहर

५१ अब अइसा भवा कि जब ओका ऊपर सरगे मँ लइ जाइके समइ आइ तउ उ यरूसलेम जाइके मन पक्का कइके चला गवा। ५२ उ आपन दूतन क पहिले ही पठइ दिहस। उ पचे चलन अउर ओकरे बरे तइयारी करइ क सामरी लोगन क गाउँ मँ पहुँचेन। ५३ मुला सामरी मनइयन हुवाँ ओकर सुआगत मान नाही किहेन काहेकि उ यरूसलेम जात रहा। ५४ जब ओकर चलन याकूब अउर यूहन्ना इ देखेन तउ उ पचे बोलेन, “पभू का तू चाहत ह कि हम हुकुम देई कि अकासे स आगी वरिसइ अउर ओनका भसम कइ देइ ?”

५५ एँह प उ ओनकी कइँती मुड़ा अउर ओनका डाटेस फटकारेस। ५६ फिन उ सबइ दूसर गाउँ चला गएन।

### ईसू क पाछे चलब

(मत्ती ८ : १९ - २२)

५७ जब उ सबइ सड़क पइ जात रहेन कउनो ओसे कहेस, “तू कतहूँ भी जा मइँ तोहरे पाछे चलब।”

५८ ईसू ओसे कहेस, “लोखरिन क लगे बिल होत ही अउर अकासे क चिरइयन क घोंसला होत ही मुला मनई क पूत क मूँइ धरइ क कउनो ठउर नाही।”

५९ उ दूसर स कहेस, “मोरे पाछे होइ जा।”

मुला उ मनई बोला, “पभू पहिले मोका जाइ द्या काहेकि मइँ आपन बाप क दफनियाइ आवउँ।”

६० तब ईसू ओसे कहेस, “मरे भवा लोगन क आपन मुदा गाड़इ द्या, तू जा अउर परमेस्सर क राज्य क एँलान करा।”

६१ फिन कउनो अउर भी कहेस, “हे पभू, मइँ तोहरे पाछे चलब मुला पहिले मोका आपन घरे क मनइयन स बिदाइ कइ देइ द्या।”

६२ एँह प ईसू ओसे कहेस, “अइसा कउनो भी जउन हरे प हाथ धरे क बाद पाछे देखत ह, परमेस्सर क राज्य क जोगग नाही।”

### ईसू बहत्तर चलन क पठएस

१ इ सबइ घटि जाइके पाछे पभू बहत्तर १० अउर मनइयन क तैनात किहस अउर फिन जउन जउन सहरन अउर टिकानन प ओका खुद जाइके रहा, दुइ दुइ कइके उ ओनका उ आपन स अगवा पठएस। २ उ ओनसे बोला, “फसल खूब जिआदा बा, मुला काम क करइया मजूर कम अहइ। एह बरे फसल क पभू स बिनती करा कि उ आपन फसल मँ मजूर पठवइ।

३ “जा अउर सुमिरत रहा, मइँ तोहका बिगवन क बीच भेड़ क मेमनन क नाई पठवत अहउँ। ४ कउनो बटुआ आपन संग जिन ल्या, न थैला अउर न ही पनही। राहे मँ कउनो स पैलगी तलक जिन करा। ५ जउनो घरवा मँ जा, सब ते पहिले कहा, ‘इ घरवा क सान्ति मिलइ।’ ६ जदि हुवाँ कउनो सान्ति क मनई होई तउ तोहार सान्ति ओका मिली। मुला जदि उ मनई सान्ति क न होई तउ तोहार सान्ति लौटि आई। ७ जउन कछू उ पचे तोहका देई। ओका खात पिअत उहइ घरवा मँ ठहरा। काहेकि मजुरी प मजूर क हक अहइ। घर घर जिन फिरा।

८ “अउर जब कबहूँ तू कउनो सहर मँ जा अउर उ सहर क मनई तोहार सुआगत करई तउ जउन कछू तोहका परसई, बस उहइ खा। ९ उ सहर क बेरमियन क बीमार स जरटुट करा अउर ओनसे कहा, ‘परमेस्सर क राज्य तोहरे नगिचे आइ पहुँचा बा!’

१० “अउर जब कबहूँ तू कउनो अइसे सहर मँ जा जहाँ क मनई तोहार मानसम्मान न करई, तउ हुवाँ क गलियन मँ जाइके कहा, ११ इ सहर क उ धूरि तलक जउन हमरे गोड़े मँ चिपकी रही, हम तोहरे खिलाफ हिआँ झार देत अही। फिन भी इ धियान रहइ कि परमेस्सर क राज्य नगिचे आइ गवा बा। १२ मइँ तोहसे कहत हउँ कि उ दिन उ सहर क लोगन स सदोम क लोगन क दसा कहुँ नीक होइ।

११ : ५५ कछू यूनानी प्रतियन मँ इ भाग जोड़ा गवा अहइ : “अउ ईसू कहेस, ‘का तू नाही जानत्या कि तू कइसी आतिमा स रिस्ता रखत ह।’ ५६ मनई क पूत मनइयन क आतिमन क नासये नाही मुला ओनकइ उद्धार करइ आवा अहइ।”

१२ : १ बहत्तर लूका क कछू यूनानी प्रतियन मँ इ गिनती सत्तर भी मिलत ह।

बिस्वास न करइवालन क चिताउनी

(मत्ती ११ :२०-२४)

१३ “अरे खुराजीन, अरे बैतसैदा, तोहका धिक्कार अहइ काहेकि जउन अद्भुत कारजन तोहमाँ कीन्ह गएन, जदि ओनका सूर अउर सैदा मँ कीन्ह जात तउ न जानी कबहुँ उ टाट क कपरा पहिरि के राखि प बडठिके मनफिराव कइ लेतेन। १४ कछू भी होइ निआव क दिन सूर अउर सैदा क हालत तोहसे कहूँ नीक होई। १५ अरे कफरनहूम का तू सर्ग क ऊँचाई क तरह ऊँचा उठब्या ? तू तउ तरखाले नरक मँ जाब्या।

१६ “चेलो ! जउन कउनो तोहका सुनत ह, मोका सुनत ह, अउर जउन कउनो तोहका दुरियावत ह, उ मोका दुरियावत ह जउन मोका पटएस ह। अउर जउन मोका नकारत ह उ उसे नकारत ह जउन मोका पटएस ह।”

सइतान गिरत ह

१७ फिन उ सबइ बहत्तर आनन्दित होइके वापस लउटेन अउर बोलेन, “हे पर्भू, दुस्ट आतिमन तलक तोहरे नाउँ मँ हमार हुकुम मानत हीं !”

१८ एँह पइ ईसू ओनसे कहस, “मइँ सइतान क अकास स बिजरी क नाई गिरत लखेउँ ह। १९ सुना, कीरा अउर वीछी क गोड़े तरे रौदब अउर सइतान क समूची सक्ती पहावी होइ क सामर्थ मइँ तोहका दिहे अही। तोहका कउनो नसकान नाहीं पहुँचाइ पाई। २० मुला इ बात प खुस जिन ह्वा कि आतिमन तोहरे बसे मँ अहई बल्कि एह पइ खुस होइ जा कि तोहार नाउँ सरगे मँ लिखा बाटइ।”

ईसू क परमपिता स पराथना

(मत्ती ११ :२५-२७ ; १३ :१६-१७)

२१ उहइ छिन उ पवित्र आतिमा मँ रहिके आनंद मँ रहा अउर बोला, “हे परमपिता हे सरग अउर धरती क पर्भू ! मइँ तोहार स्तुति करत हउँ कि तू इ बातन क चतुर अउर बुद्धिमान मनइयन स छुपाइ के राखत भवा भी गदेलन बरे ओनका परगट कइ दिहा ह। हे परमपिता ! सचमुच ही तू अइसा ही करब चाहत रह्या।

२२ “मोका मोरे परमपिता क जरिये सब कछू दीन्ह ग अहइ अउर परमपिता क अलावा कउनो नाहीं जानत कि पूत कउन अहइ अउर पूत क

अलावा कउनो नाहीं जानत कि परमपिता कउन अहइ या ओकरे अलावा जेका पूत एँका परगट करइ चाहत ह।”

२३ फिन चलन कइँती मुडिके ईसू चुप्पे स कहेस, “धन्य अहईँ उ आँखिन जउन तू देखत अहा, ओका देखत हीं। २४ काहेकि मइँ तोहका बतावत हउँ कि उन बातन क बहोत स नबी अउर राजा देखइ चाहत रहिन, जेनका तू देखत रह्या, मुला देखि नाहीं सक्या। जउन बातन क तू सुनत रहत ह, उ सबइ ओनका सुनइ चाहत रहिन, मुला उ पचे सुन नाहीं पाएन।”

नीक सामरी क कथा

२५ तब एक धरम सास्तरी खडा भवा अउर ईसू क परीच्छा लेइ बरे ओसे पुछेस, “गुरु, अनन्त जीवन पावइ बरे मइँ का करउ ?”

२६ एँह पइ ईसू ओनसे कहस, “व्यवस्था मँ का लिखा बाटइ ? तू हुवाँ का पढत ह ?”

२७ धरम सास्तरी उत्तर दिहस, “तू आपन समूचा मन, सारी आतिमा, सारी सक्ती अउर सारी बुद्धि क संग आपन पर्भू स पिरम करा।” २८ अउर आपन पड़ोसी स भी वइसे ही पिआर करा, जइसे तू आपन खुद स करत ह।”

२९ तब ईसू ओसे कहस, “तू ठीक जवाब दिहा ह। तउ तू अइसा ही करा अउर एँहसे तू जीवित रहब्या।”

३० मुला उ आपन ताई निआव स जुरा भवा ठहरावइ कइच्छा करत भवा ईसू स कहस, “अउर मोर परोसी कउन अहइ ?”

३१ ईसू जवाबे मँ कहस, “देखा, एक मनई यरूसलेम स यरीहो जात रहा कि उ डाकुअन स घिरि गवा। उ पचे सब कछू मुच्छ कइ ओका नंगा कइ दिहन अउर मार पीटिक ओका अधमरा छोडि के उ पचे चल दिहन।

३२ “अब संजोग स उहइ रस्ता स एक यहूदी याजक जात रहा। जब उ एँका निहारेस तउ दूसर कइँती चला गवा। ३३ उहइ रस्ता स गुजरत भवा, एक लेवी \*\*भी हुवाँ आवा। उ ओका देखेस अउर उ भी दूसरी कइँती चला गवा।

३४ “मुला एक सामरी भी जात भवा हुवईँ आइ गवा जहाँ उ ओलार दीन्ह ग रहा। उ जब उ मनई क देखेस तउ ओकरे बरे ओकरे मन मँ करुना आइ। ३५ तउ उ ओकरे नगिचे आवा ओकरे घाउन प

११० :२७ उद्धृत व्यवस्था. ६ :५

\*\*१० :३२ लेवी लेवी परिवार समूह क एक मनई। इ परिवार समूह मन्दिर मँ याजक क मदद करत रहा।

तेल अउर दाखरस डाइके पट्टी बाँधेस। फिन उ ओका आपन पसु प लदिके एक ठु सराय मँ लइ गवा अउर ओका देखइ भालइ लाग।<sup>३५</sup> दूसरे दिन उ दुइ दीनार निकारेस अउर ओनका भटियारा क देत भवा कहेस, 'एँकर धियान रख्या अउर एँसे जिआदा जउन कछू खरच होइ, जब मई लौटिहउँ, तोहका चुकाइ देवूँ।'

<sup>३६</sup> 'बतावा तोहरे बिचार स डाकुअन क बीच घिरे भए मनई क पड़ोसी इ तीनउँ मँ स कउन भवा?'

<sup>३७</sup> धरम सास्तरी कहेस, 'उहइ जउन ओहँ प दाया किहेस।'

एँह पइ ईसू ओनसे कहेस, 'जा अउर वइसा ही करा जइसा उ किहेस ह।'

### मरियम अउर मार्या

<sup>३८</sup> जब ईसू अउर ओकर चलन आपन राहे प जात रहेन तउ ईसू एक गाउँ मँ पहुँचा। एक स्त्री, जेकर नाउँ मार्या रहा, दिल खोलिके ईसू क अगवानी अउर सम्मान किहेस।<sup>३९</sup> मार्या क बहिन मरियम नाउँ क रही जउन ईसू क गोड़वा मँ बैठि गई अउर जउन कछू उ कहत रहा, ओका सुनत रही।<sup>४०</sup> ओहँर तरह तरह क तइयारी मँ लाग मार्या बियाकुल होइके आइ अउर बोली, 'पभूँ, का तोहका चिंता नाही कि मोर बहिन सारा काम बस मोहे प डाइ दिहे अहइ? एह बरे ओसे मोर मदद करइ क कहा?'

<sup>४१</sup> पभूँ ओका जवाब दिहेस, 'मार्या अरी मार्या! तू बहोत स बातन क बरे चिंता मँ बूड़ी अउर बियाकुल रहत ह।<sup>४२</sup> मुला बस एक ही बात जरूरी अहइ। मरियम आपन बरे उहइ उत्तम हींसा क चुने बाटइ, तउ उ ओसे छीना नाही जाई।'

पराथना क बारे मँ ईसू क उपदेस

(मत्ती ६ : ९-१५)

**११** अब अइसा भवा कि ईसू कहूँ पराथना करत रहा। जब उ पराथना खतम कइ चुका तउ ओकर एक चेला ओसे कहेस, 'पभूँ हमका सिखावा कि हम पराथना कइसे करी। जइसा कि यूहन्ना आपन चलन क सिखाए रहा।'

<sup>२</sup> एँह पइ उ ओसे कहेस, 'तू पराथना करा, तउ कहा :

'परमपिता, तोहार नाउँ पवित्तर होइ, आवइ तोहार राज्य,

<sup>३</sup> हर दिन क बरे जरूरी रोटी हमका द्या।

<sup>४</sup> हमारा अपराध छमा करा,

काहेकि हमहूँ छमा कीन्ह ह आपन अपराधी क, कठिन परीच्छा मँ हमें जिन डावा।''

माँगत रहा

(मत्ती ७ : ७-११)

<sup>५-६</sup> फिन ईसू कहेस, 'मान ल्या तोहमाँ स कउनो क एक मीत अहइ तउ तू आधीरात ओकरे लगे आइके कहत ह, 'मीत, मोका तीन रोटी द्या। काहेकि एक मीत अबहि अबहि जात्रा प मोरे लगे आवा ह अउर मोरे लगे ओकरे समन्वा परसइ क कछू भी नाही बा।'<sup>७</sup> अउर मान ल्या उ मनई भितरे स जवाब दिहस, 'मोका तंग जिन करा, दुआर बंद होइ चुका अहइ बिछुटना प मोरे साथ गदेलन अहइ, एह बरे तोहका कछू देइ मँ खडा नाही होइ सकित।'<sup>८</sup> मई तोहका बतावत हउँ उ अगर न उठी अउर तोहका कछू न देई, मुला फिन भी काहेकि उ तोहार मीत बा, तउ तोहरे लगातार बे सरमाये क माँगत रहइ स उ खडा होई अउर तोहार जरूरत भर तोहका देई।<sup>९</sup> अउर एह बरे मई तोहसे कहत हउँ माँगा, तोहका दीन्ह जाई, ढूँढा तू पउब्या खटखटावा, तोहरे बरे दुआर खोलि दीन्ह जाई।<sup>१०</sup> काहेके हर कउनो जउन माँगत ह, पावत ह। जउन ढूँढत ह, ओका मिलत ह। अउर जउन खटखटावत ह, ओकरे खातिर दुआर खोलि दीन्ह जात ह।<sup>११</sup> तोहरे मँ अइसा बाप कउन होई जउन जदि ओकर बेटवा मछूरी माँगइ, तउ मछूरी क जगह प ओका कीरा थमाइ दीन्ह जाइ।<sup>१२</sup> अउर जदि उ अण्डा माँगइ तउ ओका बीछी दइ देइ।<sup>१३</sup> तउ बुरा होत भवा जब तू जानत ह कि आपन गदेलन क उत्तम भेंट कइसे दीन्ह जात हीं, तउ स्वर्गीय पिता जउन ओसे माँगत हीं, ओनका पवित्तर आतिमा केतना ढेरि क देई।'

ईसू क सक्ती परमेस्वर स मिली

(मत्ती १२ : २२-३० ; मरकुस ३ : २०-२७)

<sup>१४</sup> फिन ईसू जब एक गूँगा बनइ डावइवाली दुस्ट आतिमा क निकारत रहा तउ अइसा भवा कि जइसा ही दुस्ट आतिमा बाहेर निकरी, तउ उ गूँगा बोलइ लाग। भीड़ क मनई एँसे बहोतइ अचरजे मँ पड़ि गएन।<sup>१५</sup> मुला ओहमाँ स कछू कहेन, 'इ सइतान क सासक बाल्जाबुल क मदद स दुस्ट आतिमन क खदेरत ह।'

<sup>१६</sup> मुला अउर मनइयन ओका परखइ बरे कउनो सरग क चीन्ह क माँग किहेन।<sup>१७</sup> लेकिन ईसू जानत रहा कि ओनके मनवा मँ का बाटइ? उ ओनसे कहेस, 'उ राज्य जेहमाँ आपन भीतर ही

फूट परि जाइ, ओकर नास होइ जात ह अउर अइसे ही कउनो घरे क फूट परे प नास होइ जात ह।<sup>१८</sup> जदि सइतान आपन खिलाफ होइ जाइ तउ ओकर राज्य कइसे टिक सकित ह? इ मई तोहसे यह बरे पूछत हउँ काहेकि तू कहत ह कि मई बाल्ज़ाबुल क मदद स दुस्ट आतिमन क निकारत हउँ।<sup>१९</sup> मुला जदि मई बाल्ज़ाबुल क मदद स दुस्ट आतिमन क निकारत हउँ तउ तोहार मनवइयन ओनका केकरी मदद स निकारत ही? तउ तोहार आपन मनई ही तोहका गलत बतइहीं<sup>२०</sup> मुला जदि मई परमेस्सर क सकती स बुरी आतिमा को निकारत हउँ तउ इ साफ बा कि परमेस्सर क राज्य तू ताई आइ गवा अहइ।

<sup>२१</sup> “जब एक सक्तीसाली मनई पूरी तरह हथियार टेइके आपन घरे क रच्छा करत ह तउ ओकरे धन दौलत क रच्छा होत ह।<sup>२२</sup> मुला जब कबहुँ कउनो ओसे जिआदा बरिआर ओह प हमला कइके ओका हराइ देत ह तउ उ ओकरे सबहीं हथियारन क, जउने प ओका भरोसा रहा, ओसे छीन लेत ह अउर लूट क माल क उ पचे अपने दोस्तन मँ बाट लेत हीं।

<sup>२३</sup> “जउन मोर संग नाही अहइ, मोर खिलाफत मँ बाटेन। उ जउन मोरे संग बटोरत नाही अहइ, छितरइहीं।

बे कामकाजी मनई

(मत्ती १२ : ४३-४५)

<sup>२४</sup> “जब कउनो दुस्ट आतिमा कउनो मनई स बाहेर निकरत ह तउ अराम क ढूँढत सूखे ठउरन मँ स होत जात ह अउर जब ओका अराम नाही मिलत तउ उ कहत ह, ‘मई आपन उहइ जगह लौटब जहाँ स गइ हउँ।’<sup>२५</sup> अउर वापस जाइके उ ओका साफ सूथर अउर तरकीबे मँ बसी पावत ह।<sup>२६</sup> फिन उ जाइके आपन स भी जिआदा दुस्ट दूसर सात जिआदा दुस्ट आतिमन क हुवाँ लइ आवत ह। फिन उ सबइ ओहमँ जाइके रहइ लागत हीं। इ तरह उ मनई क पाछे क दसा पहिले स जिआदा खराब होइ जात ह।”

उ पचे धन्य अहइ

<sup>२७</sup> फिन अइसा भवा कि जइसे ही ईसू इ बातन कहेस, भिरिया मँ स एक स्त्री उठी चिल्लाइके

बोली, “उ गरभ धन्य अहइ, जउन तोहका धारण किहेस ह। अउर उ चूची धन्य अहइ, जेका तू चुस्या ह।”

<sup>२८</sup> एह प उ कहेस, “धन्य तउ मुला उ पचे बाटेन जउन परमेस्सर क बचन सुनत हीं अउन ओह प चलत हीं।”

प्रमान क माँग

(मत्ती १२ : ३८-४२ ; मरकुस ८ : १२)

<sup>२९</sup> जइसे जइसे भिरिया बढ़त रही, उ कहइ लाग, “इ एक दुस्ट पीढ़ी अहइ। इ कउनो अद्भुत चीन्हा लखइ चाहत ह। मुला एँका योना क चीन्हा क अलावा अउर कउनो चीन्हा नाही दीन्हा जाइ।<sup>३०</sup> काहेकि जइसे निनवे क मनइयन बरे योना चीन्हा बन गवा, वइसे ही इ पीढ़ी बरे मनई क पूत भी चीन्हा बनी।

<sup>३१</sup> “दक्खिन क रानी ःःः निआव क दिन परगट होइके इ पीढ़ी क मनइयन क दोखी ठहराई, काहेकि उ धरती दूसर कोने स सुलैमान क गियान सुनइ बरे आइ अउर अब लखा हिआँ तउ कउनो सुलैमान स भी बड़कवा अहइ।<sup>३२</sup> नीनावे क मनइयन निआव क दिना इ पीढ़ी क मनइयन क खिलाफ खड़ा होइके ओन पइ दोख लगइहीं काहेकि उ पचे योना क उपदेस क सुनिके मनफिराव करि लिहन ह। अउर देखा अब तउ योना स भी महान कउनो हिआँ नाही बा!

संसार क ज्योति बना

(मत्ती ५ : १५ ; ६ : २२-२३)

<sup>३३</sup> “दिया बारिके कउनो भी ओका कउनो छुपा ठउर या कउनो भाँड़ी क भीतर नाही राखत, मुला ओका डीबट प धरत ह जेहसे जउन भितरे आवइ, ज्योति लखि सकइ।<sup>३४</sup> तोहरे देह क दिया तोहार आँखिन अहइ, तउ जदि आँखी नीक अहइ तउ समूची देह ज्योति स भरि गइ बाटइ मुला, जदि इ सबइ खराब अहइ तउ तोहार देह अँधियार होइ जात ह।<sup>३५</sup> तउ धियान राखा! कि तोहरे भीतर ज्योति अहइ, अँधियारा नाही।<sup>३६</sup> एह बरे जदि तोहार समूची देह ज्योति स भरपूर अहइ अउर एँकर कउनो भी अंग अँधियारा नाही तउ उ पूरी तरह अइसे चमकी मान ल्या कउनो दिया तोह पइ आपन किरण स प्रकासित होत ह।”

††११ : ३१ दक्खिन क रानी अर्थात् सीना हजार मील चलिके सुलैमान स परमेस्सर क गियान खीकइ आइ रही। १ राजा १० : १-३



ईसू फरीसियन क नुक्ताचीनी करत ह

(मत्ती २३ :१-३६ ; मारकुस

१२ :३८-४० ; लूका २० :४५-४७)

३७ ईसू जब आपन बात पूरी किहस तउ एक फरीसी ओसे अपने साथ खाइ बरे हट किहसे। तउ उ भितरे जाइके खइया क खाइ बैठि गवा। ३८ मुला उ फरीसी जब इ देखेस कि खइया स पहिले उ आपन हाथ नाही धोएस तउ ओका बड़ा अचरज भवा। ३९ एह पइ पभू ओनसे कहेस, “अब लखा तू फरीसियन टाठी अउर खोरा क बस बाहेर स तउ माँजत ह मुला तोहरे भीरत लालच अउर दुस्तता भरी अहइ। ४० अरे मूढ़ मनइयो! का जउन बाहरी अंग क बनाएस ह, उ भीतरी अंग क नाही बनाएस। ४१ एह बरे जउन कछू भितरे अहइ, ओका दीनन क दइ द्या। फिन तोहरे बरे सब कछू पवित्र होइ जाइ।

४२ “अरे फरीसियन! तोहका धिक्कार अहइ काहेकि तू आपन पुदीना अउर सुदाब बूटी अउर हर कउनो जरी बूटि क दसवाँ हीसा तउ चढ़ाइ देत ह मुला परमेस्सर बरे पिरेम अउर निआव क टारि देत ह। मुला इ बातन क तोहका उ बातन क बगैर टारि देइ क करइ चाही।

४३ “अरे फरीसियन! तोहका धिक्कार अहइ। काहेकि तू सबइ आराधनालय मँ बहोत ही प्रमुख आसन चाहत बाटचा अउर बजारन मँ मान मर्जादा क संग पैलगी तोहका सोहात ह। ४४ तोहका धिक्कार अहइ काहेकि तू पचे बिना कउनो चीन्हा क कब्र क नाई अहा जेह प मनई चलत हीं मुला उ सबइ नाही जानत हीं।”

४५ तब एक धरम सास्तिरि ईसू स कहेस, “गुरु, जब तू अइसी बातन कहत ह तउ हम भी बेज्जत होइत ह।”

४६ एह प ईसू कहेस, “अरे धरम सास्तिरियो! तोहका धिक्कार अहइ। काहेकि तू सबइ मनइयन प अइसा बोझा लादे बाटचा जेका उठाउब मुस्किल अहइ। अउर तू खुद ओन बोझन क एक टु अँगुरी भर स छुअइ नाही चाहत ह। ४७ तोहका धिक्कार अहइ काहेकि तू नबियन बरे मकबरा क बनवत ह, जेनकइ कतल कीन्ह गवा अउर ओनकर कतल करइया तोहार पूर्वजन रहेन। ४८ एँसे तू सबइ इ देखावत ह कि तू आपन पूर्वजन क उ काम क अँगीकार करत ह। काहेकि उ पचे तउ ओनका मारेन ह अउर तू पचे ओनकइ मकबरा क बनाया ह। ४९ एह बरे परमेस्सर क गियान भी कहेस, ‘मई नबियन अउर प्रेरितन क भी ओनके लगे पठउव।

फिन कछू क तो उ पचे मारि डइहीं अउर कछू क सजा देइहीं।’

५० “एह बरे संसार क सुरुआत स जेतना भी नबियन क लह बहाइ दीन्ह ग अहइ, ओनकइ हिसाब इ पीढ़ी क मनइयन स चुकाइ जाइ। ५१ यानी हाबिल क कतल स लइके जकरयाह क कतल क हिसाब जउन परमेस्सर क मन्दिर अउर वेदी क बीच कीन्ह गवा रहा। हाँ, मई तोहसे कहत हउँ इ पीढ़ी क मनइयन क एँकरे बरे लेखा जोखा देइ क होइ।

५२ “ओ धरम सास्तिरियो! तोहका धिक्कार अहइ, काहेकि तू सबइ गियान क कुंजी तउ लइ लिहा ह। मुला ओहमाँ न तउ खुद घुसि पाया अउर न घुसइ क कउनो जतन करत रह्या। ओनका भी तू अडंगा डाय जे अइसा करइ चाहेन।”

५३ अउर फिन जब ईसू हुवाँ स चला गवा तउ उ सबइ धरम सास्तिरियन अउर फरीसियन ओसे घोर दुस्मनी राखइ लागेन। बहोत स बातन क बारे मँ ओसे सोझ सवाल करइ लागेन। ५४ काहेकि उ सबइ ओका ओकर कही कउनो बात स घात करइ बरे टोहत रहेन।

फरीसियन जइसा जिन बना

१२ ? अउर फिन जब हजारन मनइयन क भारी भीड़ जुटि गइ तउ एक दुसरे क रौंदि जात रही तब ईसू पहिले आपन चलन स कहइ लाग, “फरीसियन क खमीरे स, जउन ओनकइ कपट बा, बचा रहा। २ कछू छुपा नाही अहइ जउन परगट नाही कइ दीन्ह जाइ। अइसा कछू अनजाना नाही अहइ जेका बतावा नाही दीन्ह जाइ। ३ एह बरे हर उ बात जेका तू अँधियारे मँ कह्या ह, उजिआरे मँ सुनी जाइ। अउर एकांत खोली मँ जउन कछू भी तू चुपे स कउनो क काने मँ कह्या ह, घरे क छते स एलान कइ दीन्ह जाइ।”

परमेस्सर स डेराअ

(मत्ती १० :२८-३१)

४ “मुला मोर मीतो, मई तोहसे कहत हउँ ओनसे जिन डेराअ जउन तोहरे तन क मारि डाइ सकत हीं अउर ओकरे पाछे अइसा कछू नाही अहइ जउन ओनके बस मँ होइ। ५ मई तोहका देखाउब कि तोहका कउनो स डेराइ चाही। ओसे (परमेस्सर) डेराअ अउर तोहका मारिके नरक मँ नावइ क सकती राखत ह। हाँ, मई तोहका बतावत हउँ, बस उहइ स डेराअ।

६ “का दुइ पइसा मैं पाँच टु चिरइयन नाहीं बिकतिन ? फिन भी परमेस्सर ओहमाँ स एक क भी नाहीं बिसरत । ७ अउर लखा तोहरे मूँडे प क एक एक बारि तलक गना भवा अहई । डेराअ जिन तू बहोत सी चिरइयन स कहूँ जिआदा कीमत क अहा ।”

ईसू क नाउँ प जिन सर्मा

(मत्ती १० : ३२-३३ ; १२ : ३२ ; १० : १९-२०)

५ “मुला मई तोहसे कहत हउँ जउन कउनो मनई सबही क समन्वा मोका मानत ह, मनई क पूत भी उ मनई क परमेस्सर क दूतन क समन्वा मानी । १ मुला ज जउन मोका दुसरे क समन्वा न मानी, ओका परमेस्सर क दूतन क समन्वा इन्कार कइ दीन्ह जाइ ।

१० “अउर हर उ मनई क तो छमा कइ दीन्ह जाइ जउन मनई क पूत क खिलाफ कउनो सब्द बोलत ह, मुला जउन पवित्तर आतिमा क बुराई करत ह, ओका छमा नाहीं कीन्ह जाइ ।

११ “तउ जब उ पचे तोहका आराधनालय मैं, राज्य क करइवालन अउर अधिकारियन क समन्वा लइ जाइँ तउ फिकिर जिन कर्या काहे तू आपन क कइसे बचउब्या या तोहका का कछू कहै होइ । १२ चिंता जिन करा काहेकि पवित्तर आतिमा तोहका सिखाइ कि उ समइया तोहका का बोलइ चाही ।”

सुआरथ क खिलाफ चिताउनी

१३ फिन भीड़ मैं स ओसे कउनो कहेस, “गुरु, मोरे भइया स मोरे बाप क धन दौलत क हीसा बाँटइ बरे कहि या ।”

१४ एह प ईसू ओसे कहेस, “अरे भले मनई, मोका तोहरे बरे निआववाला या पंच कउन बनएस ह” १५ तउ ईसू ओनसे कहेस, “होसियारी क संग आपन क लालच स दूर राखा । काहेकि जरूरत स जिआदा धन-दौलत होइ प जिन्नगी क आधार ओकर संग्रह नाहीं होत ।”

१६ फिन उ ओनका एक दिस्टान्त कथा सुनाएस: “कउनो धनी मनई क धरती प खूब पैदावार भइ । १७ उ आपन मनवा मैं सोचत भवा कहइ लाग, ‘मई का करूँ, मोरे लगे फसिल क रखइ बरे ठउर तउ अहइ नाहीं ।’

१८ “फिन उ बोला, ‘ठीक अहइ मई इ करब कि आपन अनाज क कोठिला गिराइके बड़का कोठा बनवाउव अउर आपन समूचा अनाज क अउर

सामान हुवाँ रखब । १९ फिन आपन आतिमा स कहब, अरे मोर आतिमा अब बहोत स उत्तम बस्तु, बहोत स बरिस बरे तोहरे लगे एँकट्टी अहई । घबरा जिन, खावा, पिआ अउर मउज उड़ावा !”

२० “मुला परमेस्सर ओसे बोला, ‘अरे मूर्ख ! इहइ राति मैं तोहार आतिमा तोहसे लइ लीन्ह जाइ । जउन कछू तू तइयार किहे अहा, ओका कउन लेइ ?”

२१ “लखा, उ मनई क संग भी कछू अइसा ही भवा ह, उ अपने बरे बटोरत ह मुला परमेस्सर क निगाह मैं उ धनी नाहीं ।”

परमेस्सर क राज क महत्ता

(मत्ती ६ : २५-३४, १९-२१)

२२ तब उ आपन चलन स कहेस, “एह बरे मई तोहसे हउँ, आपन जिन्नगी क फिकिर जिन करा कि तू का पहिनब्या ? २३ काहेकि जिन्नगी खइया स अउर तन ओढ़ना स जिआदा जरूरी अहइ । २४ कउअन क लखा, न उ पचइ बोवत हीं, न ही उ पचे काटत हीं । न ओनके लगे भण्डारा वा अउर न आजु अन्न क कोठिला, फिन भी परमेस्सर ओनका भोजन देत ह । तू तउ चिरइयन स केतना जिआदा कीमती अहा । २५ चिन्ता कइके, तू पचन मैं स कउन अइसा अहइ, जउन आपन उमिर मैं एक घड़ी भी अउर जोर सकत ह ? २६ काहेकि तू जदि छोटका काम क भी नाहीं कइ सकत्या तउ बाकी बरे काहे फिकिर करत ह ?

२७ “कोका बेली क लखा, उ कइसे उगत हीं ? न उ सबइ मेहनत करत हीं, न कताई, फिन भी मई तोहसे कहत हउँ कि सुलेमान आपन समूचे धन दौलत क संग ओहमाँ स कउनो एक क नाई नाहीं सज पाएस । २८ एह बरे जब मैदान क घास क, जउन आज हिआँ वा अउर भियान ही ओका भार मैं झोंक दीन्ह जाइ, परमेस्सर अइसे ओढ़नन स सजावत ह तउ अरे ओ कम बिसवास करइया मनइयो ! तोहका तउ उ केतना अउर जिआदा ओढ़ना पहिराइ ।

२९ “अउर फिकिर जिन करा कि तू का खाब्या अउर का पीब्या । एँके बरे जिन सोचा । ३० काहेकि संसार क अउर सबहीं मनई चीजन्क क पाछे धावत अहई मुला तोहार परमपिता तउ जानत ही अहइ कि तोहका इ चीजन्क जरूरत अहइ । ३१ मुला तू तउ परमेस्सर क राज्य क चिन्ता करा । इ चीजन तउ तोहका दइ दीन्ह जइहीं ।

धने प भरोसा जिन करा

३२ "हे भोली भेड़ी क झण्ड ! जिन डेरा अ, काहेकि तोहार परमपिता तोहका राज्य देइ क तइयार अहइ। ३३ तउ आपन धन दौलत बेचिके धन गरीबन मँ बाँटि द्या। आपन लगे अइसी झोरी राखा जउन पुरान न होई अरथ वा कबहुँ न टूटइवाला सरगे मँ खजाना जहाँ ओह तलक कउनो चोर क पहुँच न होइ। अउर न ओका न किरवा नास कइ पावई। ३४ काहेकि जहाँ तोहार खजाना अहइ, हुवई तोहार मनवा भी रही।

सदा तइयार रहा

(मत्ती २४ : ४२-४४)

३५ "काम करइ क सदा तइयार रहा। अउर आपन दिया बरे रहा। ३६ अउर ओ मनइयन जइसा बना जउन बियाह क भोज स लौटिके आवत आपन स्वामी क जोहत होई जेहसे उ जब आवइ अउर दुआर खटखटावइ तउ उ पचे फउरन खोलि सकई। ३७ उ नउकर धन्य अहई जेका स्वामी वापस आइके जागत अउर तइयार पइहीं। मई तोहसे सच कहत हउँ कि उ भी ओनकर सेवा बरे करिहाउँ बाँधि लेइ अउर ओनका खइया क पीढा प जेवई बरे बइटाई। उ आई अउर ओनका जेवाइ। ३८ उ चाहे आधी राति स पहिले आवइ अउर चाहे आधी राति क पाछे जदि उ ओनका तइयार पावत ह तउ उ सबइ धन्य अहई।

३९ "इ बात बरे निश्चित रहा कि जदि घरे क स्वामी क इ पता होइ कि चोर कउनो घड़ी आवत अहइ, तउ उ ओका आपन घरे मँ सेंध नाही लगावइ देइ। ४० तउ तू भी तइयार रहा काहेकि मनई क पूत अइसी घड़ी मँ आई जेका तू सोच नाही सकत्या।"

बिसवास क जोगग सेवक कउन ?

४१ तब पतरस पछेस, "पभूँ इ दिस्टान्त कथा तू हमरे बरे कहत अहा या सब बरे ?"

४२ एह प पभूँ कहेस, "तउ फिन अइसा बिसवास क जोगग, बुद्धिमान संरजाम अधिकारी कउन होइ जेका पभूँ आपन नउकरन क ठीक समइ प खइया क चीज देइ बरे ठहराइ ? ४३ उ नउकर धन्य अहइ जेका ओकर स्वामी जब आवइ तउ ओका वइसा ही करत पावइ। ४४ मई सच कहत हउँ कि उ ओका आपन सबहिँ धन दौलत क अधिकारी ठहराइ।

४५ "मुला उ नउकर आपन मनवा मँ सोचइ कि मोर स्वामी तउ आवइ मँ देर करत अहइ अउर उ दूसर पुरुस अउर स्त्री नउकरन क मारब पीटब सुरु कइ देइ अउर खाइ पिअइ अउर नसा मँ चूर होइ। ४६ तउ उ जउकर क स्वामी अइसे दिन आइ जाइ जेका उ सोचत नाही। एक ठु अइसी घरी जेकरे बारे मँ निसाखातिर अहइ। फिन भी ओकर टुकरा टुकरा कइ डाइ अउर ओका न बिसवास करइयन क बीच ठउर देइ।

४७ "उ नउकर जउन आपन स्वामी क इच्छा जानत ह अउर ओकरे बरे तइयार नाही होत या जइसा ओकर स्वामी चाहत ह, वइसहु नाही करत, तउ नउकर प जमिके मार परी। ४८ मुला उ जेका आपन स्वामी क इच्छा क ग्यान नाही अउर कउनो अइसा काम कइ डावइ जउन मार खाइ काबिल होइ तउ उ नउकर प हल्की मार परी। काहेकि उ हर मनई स जेका बहोत जिआदा दीन्ह ग अहइ, जिआदा माँगा जाइ। उ मनई जेका ढेर सौपा ग अहइ ओसे जिआदा ही माँगा जाइ।"

मनइयन क मत ईसू स मेल नाही खात

(मत्ती १० : ३४-३६)

४९ "मई धरती प एक आगी बारइ आवा हउँ मोर केतनी इच्छा अहइ कि उ साइद अबहुँ ताई बरि जात। ५० मोरे लगे एक बपतिस्मा अहइ जउन मोका लेब वा जब ताई उ पूरा नाही होइ जात, मई केतना बियाकुल हउँ। ५१ तू का सोचत बाट्या कि मई इ धरती प सान्ति लइ आवइ क बरे आवा हउँ ? नाही, मई तोहका बतावत हउँ, मई अलगावइ आवा हउँ। ५२ काहेकि अब स आगे एक घरे क पाँच आदमी एक दूसर क खिलाफ बाँटि जइहीं। तीन दुइ क बिरोध मँ अउर दुइ तीन क बिरोध मँ होइ जइहीं।

५३ बाप बेटवा क बिरोध मँ,

अउर बेटवा बाप क बिरोध मँ,

महतारी बिटिया क बिरोध मँ,

अउर बिटिया महतारी क बिरोध मँ,

सास दुलहिन क बिरोध मँ

अउर दुलहिन सास क बिरोध मँ होइ जइहीं।"

समइ क पहिचान

(मत्ती १६ : २-३)

५४ फिन उ भीड़ स बोला, "जब तू पच्छुँ कइती कउनो बदरे क उठत भइ लखत ह तउ कहि देत ह, 'बरखा आवति अहइ।' अउर फिन अइसा ही होत ह। ५५ अउर फिन जब दखिनी हवा चलत ह,

तू कहत ह, 'गरमी पड़ी' अउर अइसा ही होत ह।  
 ५६ अरे कपटी मनइयो! तू धरती अउर अकासे क  
 रूपे क समझाउव तउ जानत बाट्या, फिन अइसा  
 काहेकि इ जुग क बारे में समझउत्या नाही?"

आपन समसिया हल करा

(मत्ती ५ :२५-२६)

५७ "जउन नीक अहइ, ओकर फैसला  
 करइवाला तू खुद काहे नाही बनत्या? ५८ जब  
 तू आपन बैरी क संग न्यायाधीस क लगे जात  
 रहब्या तउ रास्ता में ही ओकरे संग समझौता  
 करइ क जतन करया। नाही तउ कहूँ अइसा न  
 होइ कि उ तोहका न्यायाधीस क लगे खैच लइ  
 जाई अउर न्यायाधीस एक अधिकारी क सौपि  
 देइ। अउर अधिकारी तोहका जेलि में धाँध देइ।  
 ५९ मई तोहका बतावत हउँ, तू हुवाँ स तब ताई  
 छूटि नाही पउब्या जब तलक आखिरी दमड़ी  
 तक न चुकाइ द्या।"

मनफिरावा

१३ १ उ समइया हुवाँ हाजिर कछू मनइयन ईसू  
 क ओन गलीलियन क बारे में बताएँस  
 जेनकेइ लहू पिलातुस ओनके बलिदान क संग  
 मिलाइ दिहें रहा। २ तउ ईसू ओनसे कहेस, "तू  
 का सोचत ह कि सबइ गलीलियन दूसर सबइ  
 गलीलियन स जिआदा पापी रहेन काहेकि ओनका  
 इ सबइ बातन भीजे पड़ी? ३ नाही! मई तोहका  
 बतावत हउँ, जदि तू भी मनफिरावा नाही करब्या  
 तउ तू भी वइसी ही मउत स मरब्या जइसी उ  
 सबइ मरे रहेन! ४ या ओन अट्टारह मनइयन  
 क बारे में तू का सोचत ह जेनके ऊपर सीलोह  
 क बुर्ज गिरिके ओनका मारि डाएँस। का सोचत  
 ह, उ सबइ यरूसलेम में बसइया दूसर सबइ ही  
 मनइयन स जिआदा अपराधी रहेन? ५ नाही! मई  
 तोहका बतावत हउँ कि जदि तू मनवा न फिरउब्या  
 तउ तू भी वइसे ही मरब्या!"

बँझउ वृच्छ

६ फिन उ इ दिस्टान्त कथा कहेस: "कउनो मनई  
 आपन अँगूरे क बारी में एक टु अँजिरे क वृच्छ  
 रोपे रहा। तउ उ ओह पइ फल ढूँढइ आवा पर  
 ओका कछू नाही मिल पावा। ७ एँह पइ उ माली  
 स कहेस, 'अब लखा मई तीन बरिस स अँजिरे क  
 वृच्छ प फल टटोरत आवत हउँ मुला मोका एक टु  
 भी नाही मिलि पावा। एह बरे एँका काटि डावा। इ  
 धरती क अइसी ही वृथा काहे करत रहइ?' ८ माली

ओका जवाब दिहेस, 'स्वामी एँका इ बरिस तब  
 ताई तजि द्या, जब तलक मई एँकरे चारिहुँ कइँती  
 खनिके एहमाँ पाँस नउबउँ? ९ फिन जदि उ अगवा  
 बरिस फल देइ तउ नीक बा अउर जदि नाही देत  
 तउ तू एँका काटि डाइ सकत ह।"

सबित क दिन स्त्री क चंगा करव

१० कउनो आराधनालय में सबित क दिन ईसू  
 जब उपदेस देत रहा। ११ तउ हुवँई एक अइसी  
 स्त्री रही जेहमाँ दुस्ट आतिमा समाइ ग रही।  
 जउन ओका अट्टारह बरिस स पंगु बनाइ दिहे  
 रही। उ निहुरिके कुबड़ी होइ गइ अउर तनिकउ  
 सोझ नाही होइ सकत रही। १२ ईसू ओका जब  
 निहारेस तउ आपन लगे बोलाएँस अउर कहेस,  
 "हे स्त्री, तोहका आपन बेरामी स छुटकारा मिलि  
 गवा!" इ कहत भवा १३ ओह पइ आपन हाथ  
 रखेस। अउर उ फउरन सीध होइ गइ। उ परमेस्सर  
 क गुन गावइ लाग।

१४ ईसू काहेकि सबित क दिन ओका बेरामी  
 स जरदुट किहेस, एह बरे आराधनालय क नेता  
 किरोध में आइके मनइयन स कहेस, "काम करइ  
 क बरे छ: दिन होत हीं तउ ओनही दिनम में आवा  
 अउर आपन बेरामी क दूर करावा पर सबित क  
 दिन नीरोग होइ बरे जिन आवा।"

१५ पभूँ जवाब देत भवा ओसे कहेस, "अरे  
 कपटियो! का तोहमाँ स हर कउनो सबित क दिन  
 आपन बर्धा अउर गदहा क बारा स निकारिके  
 कहूँ पानी पिआवइ नाही लइ जात ह? १६ अब  
 इ स्त्री जउन इब्राहीम क बिटिया अहइ अउर  
 जेका सइतान अट्टारह बरिस स जकरिके राखे बा,  
 का एँका सबित क दिन एँका बंधन स छुटकारा  
 नाही देइ क चाही?" १७ जब उ इ कहेस तउ ओकर  
 खिलाफत करइवालन सबइ समाइ गएँन। ओह  
 कइँती समूची भीड़ ओकरे अचरजे स भरे कामन  
 स जेनका उ किहे रहा, खुस होइ गइ।

सरग क राज्य कइसा अहइ

(मत्ती १३ :३१-३३; मरकुस ४ :३०-३२)

१८ तउ ईसू कहेस, "परमेस्सर क राज्य का अहइ  
 अउर मई एँकर तुलना कइसे करउँ? १९ उ सरसई  
 क दाना क नाई अहइ, जेका कउनो लइके आपन  
 बगिया में बोएँस। उ बड़ा भवा अउर एक वृच्छ  
 होइ गवा। फिन अकासे क चिरइयन ओकर डारी  
 प घाँसला बनाइ लिहन।"

२० उ फिन ईसू कहेस, "परमेस्सर क राज्य क  
 बरोबरी मई कइसे करउँ? २१ इ उ खमीरे क नाई

अहइ जेका एक स्त्री तीन हीसा पिसान मँ सान दिहैस अउर उ समूचा पिसान खमीरे स भरि गवा ।”

साँकर दुआर

(मत्ती ७ :१३-१४ ; २१-२३)

२२ ईसू जब सहरन अउर गाँउन स होत भवा उपदेस देत भवा यरूसलेम जात रहा । २३ तबही ओसे कउनो पूछेस, “पभू क केवल कछू मनइयन क ही उद्धार होइ ?”

ईसू कहेस, २४ “साँकर दुआरे स घुसइ क होइ सकइवाला जतन करा, काहेकि मई तोहका बतावत हउँ कि भीतर जाइ क जतन बहोत स करिहीं पर जाइ न पइहीं । २५ जब एक दाई घरे क स्वामी उठिके दुआर बंद कइ देत ह, तउ तू बाहेर ही खड़ा दुआर खटखटावत कहब्या, ‘महासय, हमरे बरे खोलि द्या ! मुला उ तोहका जवाब देइ, ‘मई नाही जानत तू कहाँ ले आवा बाटचा ?’ २६ तब तू कहइ लगब्या, ‘हम तोहर संग खावा ह, तोहर संग पिआ ह, तू हमरी गलियन मँ हमका सीख दिहा ह ।’ २७ पर उ तोसे कही, ‘मई नाही जानत तू कहाँ स आवा अहा ? अरे कुकमी मनइयो ! मोरे लगे स पराइ जा !’

२८ “जब तू इब्राहीम, इसहाक, याकूब अउर दूसर सबही नबियन क परमेस्सरे क राज्य मँ निहरब्या मुला तोहका बाहेर ढकेल दीन्ह जाइ । तउ हुवाँ बस रोउब अउर दाँत पीसब होई । २९ फिन पूरब अउर पच्छेँ, उत्तर अउर दक्खिन स मनइयन परमेस्सर क राज्य मँ आइ आइके खइया क चउकी प आपन आसन ग्रहण करिहीं । ३० धियान रहइ कि हुवाँ जउन आखिरी अहइ पहिले होइ जइहीं अउर जउन पहिले अहइ उ पचे आखिरी होइ जइहीं ।”

ईसू क मउत यरूसलेम मँ

(मत्ती २३ :२७-३९)

३१ उहइ समइ ईसू क लगे कछू फरीसियन आएन अउर ओसे बोलेन, “हेरोदेस तोहका मारि डावइ चाहत ह, एह बरे हुवाँ स कहुँ अउर चला जा ।”

३२ तब उ ओनसे कहेस, “जा अउर उ लोखरी ##स कहा, ‘मई मनइयन मँ स दुस्ट आतिमन क निकारब, मई आज ही चंगा करब अउर भियान भी । फिन तीसर दिन मई आपन काम पूरा करब ।’

३३ फिन भी मोका आजू, भियान अउर परउँ चलत ही रहइ क अहइ । काहेकि कउनो नबियन बरे इ नीक नाही कि उ यरूसलेम स बाहेर प्रान तजि देइ ।

३४ “यरूसलेम अरे ओ यरूसलेम ! तू नबियन क कतल करत ह अउर परमेस्सर जेका तोहरे लगे पटएस ह, ओन प पाथर बरिसावत ह । मई केतनी दाई तोहरे मनइयन क वइसे ही आपुस मँ बटोरइ चाहा ह जइसे एक टु मुर्गी आपन बचवन क आपन पखना तरे बटोरत ह । मुला तू नाही चाह्या । ३५ लखा तोहरे बरे तोहार घर तोहरे लिए उजरा पड़ा अहइ । मई तोहका बतावत हउँ तू मोका उ समइया तलक फिन नाही देखब्या । जब ताई उ समइ न आइ जाइ जब तू कहब्या, ‘धन्य अहइ उ, पभू क नाउँ प जउन आवत बा ।’” ##

का सबित क दिन चंगा करब उचित बा ?

१४ १ एक दाई सबित क दिन मुख्य फरीसियन मँ स कउनो क घर ईसू खइया बरे गवा । ओहर उ पचे नगिचे स आँखि गड़ाइके लखत रहेन । २ हुवाँ ओकरे समन्वा जलंधर स दुःखी एक टु मनई रहा । ३ ईसू धरम सास्तिरियन अउर फरीसियन स पूछेस, “सबित क दिन कउनो क चंगा करब उचित अहइ या नाही ?” ४ मुला उ पचे खमोस रहेन । तउ ईसू उ मनई क लइके चंगा कइ दिहस अउर फिन ओका कहुँ पठइ दिहस । ५ फिन उ ओनसे पूछेस, “जदि तोहमाँ स कउनो क लगे आपन बेटवा अहइ या बधो अहइ, उ कुआँ मँ गिरि पड़त ह तउ सबित क दिन भी तू ओका फउरन नाही निकरिब्या ?” ६ उ पचे एँह पइ ओकर बात नाही काटि सकेन ।

आपन क मान जिन द्या

७ काहेकि ईसू इ लखेस कि मेहमान आपन बरे बइठइ क कउनो खास ठउर ढँढत रहेन, तउ उ ओनका एक दिस्टान्त कथा सुनाएस । उ बोला : ८ “जब तोहका कउनो बियाहे क भोज प बोलावइ तउ हुवाँ कउनो सम्मान क ठउर प जिन बइठा । काहेकि होइ सकत ह हुवाँ कउनो तोहसे जिआदा बइकवा मनई क उ बोलाए होइ । ९ फिन तू दुइनउँ क बोलावइवाला तोहरे लगे आइके तोसे कही, ‘आपन इ जगह इ मनई क दइ द्या ।’ अउर फिन

##१३ :३२ लोखरी लोखरी चलाक होत ह, एह बरे ईसू हेरोदेस क लोखरी क रूप मँ कहिके ओखा धूर्त कहइ चाहत रहा ।

##१३ :३५ उद्धृत भजन. ११८ :२६

लजाइके तोहका सबन क तले क ठउरे प बइठइ क होइ ।

१० “तउ जब तोहका बोलौवा जात ह तउ जाइके सबन त तले क जगह ग्रहण कइ ल्या जइसे जब तोहका न्यौता देइवाला आवइ तउ तोहसे कही, ‘भीत उठा, ऊपर बइठा ।’ फिन उ सबन क समन्वा, जउन तोहरे लगे हुवाँ मेहमान होइहीं, तोहार मान बाढ़ी । ११ काहेकि हर कउनो जउन आपन क उठाई ओका निहुराई दीन्ह जाई अउर जउन आपन क निहुराई, ओका ऊँचा कीन्ह जाई ।”

### बदले क फल

१२ फिन जउन ओका बोलाए रहा, ओसे उ बोला, “जब कबहुँ तू कउनो दिन या राति क भोज द्या तउ आपन धनो पड़ोसियन क जिन बोलावा काहेकि एकरे बदले मैं तोहका बोलइहीं अउर इ तरह तोहका ओकर फल मिलि जाई । १३ मुला जब तू कउनो भोज द्या तउ दीन दुखियन, अपाहिजन, लंगड़न अउर अँधरन क बोलावा । १४ फिन काहेकि ओनके लगे वापस लउटावइ कछु नाहीं अहइ, तउ इ तोहरे बरे आसीर्वाद बनि जाई । एकर बदले क फल तोहका धर्मी मनई क जी उठइ प दीन्ह जाई ।”

### बड़वार भोज क दिस्तान्त कथा

(मत्ती २२ :१-१०)

१५ फिन ओकरे संग खइया क खात रहेन मनइयन मैं स एक इ सुनिके ईसू स कहेस, “हर उ मनई धन्य अहइ, जउन परमेस्सर क राज्य मैं जेवत ह !”

१६ तब ईसू ओसे कहेस, “एक मनई कउनो बड़के भोज क तइयारी करत रहा, उ बहोत स मनइयन क न्यौत दिहस । १७ फिन दावत क समइ जेनका न्यौत दिहस, नउकरे क पठइके इ कहवाएस, ‘आवा ! काहेकि भोजन तइयार अहइ ।’ १८ उ सबइ एक तरह आनाकानी करइ लागेन । पहिला ओसे कहेस, ‘मइँ एक खेत बेसहे अहउँ, मोका जाइके ओका देखब अहइ, कृपा कइके मोका छमा करइ ।’ १९ फिन दूसर कहेस, ‘मइँ पाँच जोड़ी बर्धा मोल लिहे अहउँ, मइँ तउ सिरिफ ओनका परखइ जात हउँ, कृपा कइके मोका छमा करइ ।’ २० एक अउर भी बोला, ‘मइँ अबहि बियाह किए हउँ । इ कारण स नाही आइ सकत हउँ ।’

२१ “तउ जब उ नउकर लौटिके आवा तउ उ आपन स्वामी क इ बातन बताइ दिहस, एँह पइ

उ घरे क स्वामी बहोत कोहाइ गवा अउर आपन नउकरे स कहेस, ‘हाली ही ! सहर क गली कूचा मैं जा अउर गरीब गुरबा, अपाहिज, अँधर अउर लँगड़न क हिआँ लइ आवा ।’

२२ “उ नउकर स कहेस, ‘स्वामी तोहार हुकुम पूरी कइ दीन्ह गइ अहइ मुला अबहि भी ठउर बाकी अहइ ।’ २३ फिन स्वामी नउकरे स कहेस, ‘सड़कन प अउर खेतन क मेडे ताई जा अउर हुवाँ स मनइयन स चिरोरी कइके हिआँ बुलाइ लिआवा जेसे मोर घर भरि जाइ । २४ अउर मइँ तोहसे कहत हउँ जउन पहिले बोलाइ गवा रहेन ओहमाँ स एक भी भोज न चिखइ सकेन !”

### चेला बनइ क कीमत

(मत्ती १० :३७-३८)

२५ ईसू क संग भारी भीड़ जात रही । उ ओनके कइँती मुड़ि गवा अउर बोला, २६ “जदि मोरे लगे कउनो आवत ह अउर आपन बाप महतारी, पत्नी अउर बचवा, आपन भाइयन अउर बहिनियन अउर हिआँ ताई कि आपन जिन्नगी तलक स मोसे जिआदा पिरम राखत ह, उ मोर चेला नाही होइ सकत । २७ जउन आपन करूस (यातना) उठाइके मोरे पाछे नाही चलत ह, उ मोर चेला नाही होइ सकत ।

२८ “जदि तोहमाँ स कउनो बुर्ज बनावइ चाहइ तउ का उ पहिले स बइठिके ओकरे दामे क, इ लखइ बरे कि ओका पूरा करइके ओकरे लगे काफी कछु बा कि नाही, हिसाब न लगाई ? २९ नाही तउ उ नेव तउ खनि देइ अउर ओका पूरा न कइ पावइ स, जउन ओका सुरु होत लखेन ह, सबहि ओकर मसखरी उइइहीं अउर कइहीं, ३० ‘अरे लखा इ मनई बनाउब तउ सुरु कहेस ह मुला इ ओका पूर नाही कइ सका !’

३१ “या कउनो राजा अइसा होइ जउन कउनो दूसर राजा क खिलाफ जुद्ध छेइइ जाइ अउर पहिले बैठिके इ न बिचारइ कि आपन दस हजार सैनिकन क संग का उ बीस हजार सैनिकन आपन बैरी क मुकाबला कइ भी सकी कि नाही ? ३२ अउर जदि उ समर्थ नाही होत तउ ओकर बैरी अबहीं राहे मैं होइहीं तबहिँ उ आपन प्रतिनिधि मंडल क पठइके सांति मिलाप क सुझाई ।

३३ “तउ फिन इहइ तरह तोहमाँ स कउनो भी जउन आपन सबहिँ धन दौलत क तजि नाही देत, मोर चेला नाही होइ सकत ।

आपन सुभाव जिन तजा  
(मत्ती ५ :१३ ; मरकुस ९ :५०)

३४ “नोन उत्तिम अहइ मुला जदि ओकर स्वाद विगर जाइ तउ ओका फिन स नमकीन नाही बनावा जाइ सकता। ३५ न तउ उ माटी क लायक नही अउर न पाँस क कूड़ा क। मनई सिरिफ ओका यूँ ही बहाइ देइहीं।

“जेकरे लगे सुनइ क कान अहई, ओका सुनइ द्या।”

सरगे मँ खुसी  
(मत्ती १८ :१२-१४)

१५ अब चुंगी (टैक्स) क उगहिया अउर पापी सबहिं ओका सुनइ बरे ओकरे लगे आवइ लाग रहेन। २ तउ फरीसियन अउर धरम सास्तिरियन बड़बड़ करत भए कहइ लागेन, “इ मनई तउ पापी मनइयन क अगवानी करत ह अउर ओनके संग जेवंत ह।”

३ एह पइ ईसू ओनका इ दिस्टान्त कथा सुनाएस: ४ “मान ल्या तोहमाँ स कउनो क लगे १०० भेड़ अहई अउर ओहमाँ स कउनो एक हेराइ जाइ तउ उ का १९ क खुली जगह मँ तजिके हेरान भेड़ क पाछे न धाई जब ताई उ ओका पाइ न जाइ। ५ फिन जब ओका भेड़ मिलि जात ह तउ उ ओका खुसी क साथ आपन काँधे प उठावत ह। ६ अउर जब घर लौटत ह तउ आपन मीतन अउर पड़ोसियन क नगिचे बोलाँइके कहत ह, ‘भोर संग खुसी मनावा काहेकि मोका हेरान भेड़ मिलि गइ अहइ।’ ७ मई तोहसे कहत हउँ, इहइ तरह कउनो एक क मनफिरावइवाला पापी बरे, ओन निनावे धर्मी मनइयन स, जेनका मनफिराव करइ क जरूरत नाही, सरगे मँ कहूँ जिआदा खुसी मनाइ जइ।

८ “या सोचि ल्या कउनो स्त्री अहइ जेकरे लगे दस चाँदी क सिक्का बाटेन अउर ओकर एक ठु सिक्का हेराइ जात ह तउ का उ दिया बारिके घरे क तब ताई न बहारी अउर होसियारी स नाही ढूँढत रही जब तलक उ ओका न मिलि जाइ ? ९ अउर जब उ जब ओका पाइ जात हु तउ आपन मीतन अउर पड़ोसियन क लगे बोलाँइके कहत ह, ‘भोरे संग खुसी मनावा काहेकि मोर सिक्का जउन हेराइ ग रहा, मिलि गवा।’ १० मई तोहसे कहत हउँ इ तरह एक पापी बरे जउन मनफिराव ह, परमेस्सर क दूतन क हाजरी मँ हुआँ खुसी मनाइ जाइ।”

भटक गवा बेटवा क पावइ क दिस्टान्त कथा

११ फिन ईसू कहेस, “एक मनई क दुइ बेटवा रहेन। १२ तउ छोटका बेटवा आपन बाप स कहेस, ‘पिताजी, जउन धन दौलत मोरे हींसा मँ आवइ, ओका मोका दइ द्या !’ तउ बाप उन दुइनउँ क आपन धन बाँट दिहेस।

१३ “अबही कउनो जिआदा समइ नाही बीता रहा, कि छोटका बेटवा आपन समूचा धन दौलत बटोरिस अउर कउनो दूर देस क चला गवा। अउर हुवाँ जंगली क तरह रहत भवा आपन सारा धन बर्बाद कइ डाएस। १४ जबहिं ओकर समूचा धन खतम होइ गवा तबही उ देस मँ सबहिं कइती एक ठु भयानक अकाल पड़ि गवा अउर ओका जरूरत क चीजन क कमती पड़इ लाग। १५ एह बरे उ देस क कउनो मनई क हिआँ जाइके उ मजूरी करइ लाग। उ ओका आपन खेते मँ सुअर चरावइ पठइ दिहस। १६ हुवाँ उ सोचत साइद कैरब क फरी पेट भरइ बरे मिलि जाइ जेका सुअरन खात रहेन मुला कउनो ओका एक फरी नाही दिहेस।

१७ “फिन जब ओकर होस ठिकाना मँ आइ गवा तउ उ बोला, ‘भोरे बाप क लगे केतना ही अइसे मजूर अहई जेनके लगे खाइ क पाछे भी भोजन बचा रहत ह। अउर मई हिआँ भूख स मरत हउँ। १८ तउ मई हिआँ स उठिके आपन बाप क लगे जाब अउर ओनसे कहब: पिताजी, मई परमेस्सर अउर तोहरे खिलाफ पाप किहे हउँ। १९ अब अगवा स तोहार बेटवा कहवावइ क जोगग नाही अहउँ। मोका आपन रोजिन्दा क मजूर क नाई बनइ ल्या।’ २० तउ उ उठिके आपन बाप क लगे चला गवा।

बेटवा लउटत ह

“अबहिं उ जिआदा दूरी प ही रहा कि ओकर बाप ओका निहारेस अउर ओकरे बाप क दया आइ। तउ दौड़िके उ ओका आपन बाँहे मँ गहियाह लिहस अउर चूमेस। २१ बेटवा बाप स कहेस, ‘पिताजी, मई तोहरी निगाहे मँ अउर परमेस्सर क खिलाफ पाप किहे हउँ, मई अब अउर जिआदा तोहार बेटवा कहवावइ क जोगग नाही हउँ।’

२२ “मुला बाप आपन नउकरन स कहेस, ‘हाली ! उत्तिम ओढ़ना निकारि लइ आवा अउर ओनका एँका पहिरावा। एँकरे हाथे मँ अँगूठी अउर गोड़वा मँ जूतियाँ पहिरावा। २३ कउनो मोट बछ्वा लइ आइके मारि डावा अउर आवा ओका हम पचे खाइके खुसी मनाई। २४ काहेकि मोर इ बेटवा जउन मरि गवा रहा अब जइसे फिन स जिउ उठा

वा। इ हेराई गवा रहा, मुला अब इ मिलि गवा अहइ। तउ उ पचे खुसी मनावइ लागेन।

### पुराना बेटवा लउटत ह

२५ “अब ओकर बड़का बेटवा जउन खेते में रहा, जब आवा अउर घरे क लगे पहुँच गवा त उ गावइ नाचइ क सुर सुनेस। २६ उ आपन एक ठु नउकर क बोलाइके पूछेस, ‘इ सब का होत अहइ?’ २७ नउकर ओसे कहेस, ‘तोर भाई आइ गवा अहइ अउर तोर बाप ओका हिफाजत में अउर मोटमर्दा पाइके एक ठु मोट बछ्वा कटवाएस ह।’

२८ “बड़का भाई कोहाइ गवा, उ भितरे जाइ तलक नाही चाहत रहा। तउ ओकर बाप बाहेर आइके ओका समझाएस बुझाएस। २९ मुला उ बाप क जवाब दिहस, ‘देखा बरिसन स तोहार सेवा मइ करत रहेउं। मइ तोहरे कउनो हुकुम क खिलाफत नाही किहेउं, मुला तू मोका तउ कबहूँ एक बोकरी तलक नाही दिहा कि मइ आपन मीतन क संग कउनो खुसी मनाइ सकित। ३० मुला जब तोहार इ बेटवा आवा जउन वेस्यन में तोहार धन फूकेस, ओकरे बरे तू मोट बछ्वा कटवाया।’

३१ “बाप ओसे कहेस, ‘भोर बेटवा, तू हमेसा ही मोरे लगे अहा अउर जउन कछु मोरे लगे बा, सब तोहार अहइ। ३२ मुला हमका खुस होइ चाही अउर जलसा मनावइ चाही काहेकि इ भाई, जउन मरि ग रहा, अब फिन जिन्ना होइ, ग अहइ। इ हेराइ ग रहा, अब मिलि गवा बा।”

### साँच धन

१६ <sup>१</sup>फिन ईसू आपन चलन स कहेस, “एक धनी मनई रहा। ओकर एक प्रबन्धक रहा। उ प्रबन्धक प लाँछन लगाइ गवा कि उ ओकर धन दौलत क नासत रहा। २ तउ उ ओका बोलाएस अउर कहेस, ‘तोहरे बारे में इ मइ का सुनत रहत हउं? आपन संरजाम क हिसाब किताब द्या काहेकि अब अगवा तू प्रबन्धक नाही रहि सकत्या।’

३ “एह पइ प्रबन्धक मन ही मन में कहेस, ‘भोर स्वामी मोसे मोर प्रबन्धक क नउकरी छीनत अहा, तउ अब मइ का करउं? मोहमाँ अब एतनी ताकत भी नाही बा कि मइ खेते खोदाई अउर गोंडाई क काम तलक कइ सकउं। अउर माँगइ मैं तउ मोका लाज आवति बाटइ। ४ ठीक, मोरी समझ में आइ गवा कि मोका का करइ चाही जेहसे जब मइ प्रबन्धक क ओहदा स हटाइ दीन्ह जाउं तउ मनई आपन घरे में मोर सुआगत करइ।’

५ “तउ उ स्वामी क हर देनदार क बोलाएस। पहिले मनई स उ पूछेस, ‘तोहका मोरे स्वामी क केतना देब अहइ?’ ६ उ कहेस, ‘३,००० लीटर जौतून क तेल।’ एह पइ उ ओसे बोला, ‘इ ल्या आपन बही खाता अउर बैठिके हाली १,५०० लीटर कइ द्या।’

७ “फिन उ दूसर स कहेस, ‘अउर तोह प केतनी देनदारी अहइ?’ उ बताएस, ‘२७० क्विंटल गोहूँ।’ उ ओसे बोला, ‘इ ल्या आपन बही अउर २२५ क्विंटल कइ द्या।’

८ “एह प ओकर स्वामी उ बेइमान प्रबन्धक क सराहेस काहेकि उ होसियारी स काम लिहे रहा। संसारे में रहइवाला मनई आपन जइसे मनइयन स ब्यौहार करइ मैं परमेस्सर क जोतिवाला स जिआदा चालाक अहइ।

९ “मइ तोहसे कहत हउं संसारे क धन दौलत स आपन बरे मीत बनावा। काहेकि जब उ धन दौलत खतम होइ जाइ, उ पचे अनंत निवासे में तोहार सुआगत करिही। १० उ सबइ जेनें पइ तनिक बरे बिसवास कीन्ह जाइ सकत ह, ओन पइ जिआदा बरे भी बिसवास कीन्ह जाइ अउर इहइ तरह जउन तनिक बरे बेइमान होइ सकत हीं उ जिआदा बरे बेइमान होइही। ११ इ तरह जदि तू संसारे क धन दौलत बरे तू बिसवासनीय नाही रह्या तउ साँच धने क बारे में तोह पइ कउन भरोसा करी? १२ जदि जउन कउनो दूसर क अहइ, तू ओकरे बरे बिसवास क जोगग नाही, बाट्या, तउ जउन तोहार अहइ, ओका तोहरा कउन देइ?

१३ “कउनो भी नउकर दुइ मालिक क सेवा नाही कइ सकत। उ या तो एक स धिना करी अउर दूसर स पिरम या उ एक क बरे न्यौछावर करी अउर दूसर क दुरियाई। तू धने अउर परमेस्सर दुइनउं क सेवा एक संग नाही कइ सकत्या।”

परमेस्सर क व्यवस्था अटल बा

(मत्ती ११:१२-१३)

१४ अब फरीसियन जउन धन क लोभी रहेन, जब इ सब सुनेन तउ उ पचे ईसू क बहोत बुराई किहेन। १५ एह पइ उ ओनसे कहेस, “तू पचे उ सबइ अहा जउन मनइयन क इ जताइ देइ चाहत ह कि तू बहोत नीक अहा मुला परमेस्सर तोहरे मन क जानत ह। मनई जेका बहोत कीमती समझत हीं, परमेस्सर बरे उ तुच्छ अहइ।

१६ “यूहन्ना तलक व्यवस्था अउर नबियन क समइ रहा। ओकरे पाछे परमेस्सर क राज्य क सुसमाचार क प्रचार होत रहा अउर हर कउनो



बड़ी तेजी स ँकर कइती हींचा चला आवत रहा ।  
१७ फिन सरग अउर धरती क डुग जाब तउ सहल  
वा मुला व्यवस्था क एक एक बिन्दु क अमान्य  
होब नाही ।

तलाक अउर दुहेजा बियाह

१८ “उ हर कउनो जउन आपन पत्नी क तजत ह  
अउर दूसर स्त्री क बियाहत ह, व्यभिचार करत  
ह । अइसे ही आपन पति स तलाकी गइ, कउनो  
मनई स बियाहत ह, उ भी व्यभिचार करत ह ।”

धनी मनई अउर लाजत

१९ “अब देखा एक मनई रहा जउन बहोत धनी  
रहा । उ बैजनी रंग क ओढ़ना पहिरत रहा अउर  
हर रोज अमीरी टाट बाट स रहत आनन्द लेत  
रहा । २० हुँवई लाजर नाउँ क दीन दुखिया ओकरे  
दुआरे ओलरा रहत रहा । ओकर देह घाउन स भरि  
गइ रही । २१ उ धनी मनई क जूटे स ही उ आपन  
पेटवा भरइ क तरसत रहा । हिआँ तलक कि कूकुर  
भी अउतेन अउर ओकरे घाउ क चाट जातेन ।

२२ “अउर फिन अइसा भवा कि उ दीन हीन  
मनई मरि गवा । तउ सरगदूतन लइ जाइके ओका  
इब्राहीम क गोदी मँ बइटाइ दिहन । फिन उ धनी  
मनई भी मरि गवा अउर ओका दफनियावा गवा ।  
२३ नरके मँ तइपत भवा उ जब आँखी खोलिके  
लखेस तउ इब्राहीम ओका बहोत दूर देखाइ गवा  
मुला लाजर उ ओकरी गोदी मँ लखेस । २४ उ तब्बइ  
पुकारके कहेस, ‘बाप इब्राहीम, मोहे प दाय्या करा  
अउर लाजर क पठवा कि उ पानी मँ अगुँरि क  
नोक बोरिके मोर जीभ ठंढी कइ देइ, काहेकि मइँ  
इ आगी मँ तइपत हउँ !”

२५ “मुला इब्राहीम बोला, ‘मोर बेटहना, याद  
राखा, तू आपन जिन्नगी मँ आपन नीक चीजन्क  
पाइ गया मुला लाजर क बुरी चीज मिलि पाइँ ।  
तउ अब हिआँ उ आनन्द भोगत बा अउर तू दारूण  
दुःख । २६ अउर इ सब क अलावा हमरे अउर तोहरे  
बीच एक बड़की खाई डाइ दीन्ह ग अहइ काहेकि  
हिआँ स जदि कउनो तोहरे लगे जाइ चाहइ, उ  
जाइ नाही सकत अउर हुवाँ स कउनो हिआँ आइ  
न सकइँ ।”

२७ “उ धनी मनई कहेस, ‘अइ बाप ! मइँ तोहसे  
पराथना करत हउँ कि तू लाजर क मोरे बाप क घर  
पठइ द्या २८ काहेकि मोरे पाँच भाइयन अहइँ । उ  
ओनका चिताउनी देइ ताकि ओनका इ दारूण दुःख  
क ठउर मँ न आवइ क होइ ।”

२९ “मुला इब्राहीम कहेस, ‘ओनके लगे मूसा क  
व्यवस्था अहइ अउर नबियन क लिखा अहइ । ओ  
पचेन क ओनका सुनइ द्या ।”

३० “धनी मनई कहेस, ‘नाही बाप इब्राहीम,  
जदि कउनो मरे हुअन मँ स ओनके लगे जाइ तउ  
उ पचे मनफिराव करिहीँ ।”

३१ “इब्राहीम ओसे कहेस, ‘जदि उ सबइ मूसा  
अउर नबियन क नाही अनकतेन तउ, जदि कउनो  
मरे हुअन मँ स उठिके ओनके लगे आवइ तउ भी  
कोउ काम क न होई, काहेकि उ ओनका भी न  
सुनिहीँ ।”

पाप अउर छिमा

(मत्ती १८ : ६-७, २१-२२ ; मरकुस ९ : ४२)

१७ ईसू आपन चलन स कहेस, “जेनसे  
मनइयन भटकत हीं, अइसी बातन तउ  
होइहीं ही मुला धिक्कार उ मनई क अहइ जेकरे  
जरिये उ सबइ होइँ । २ ओकरे बरे जिआदा नीक  
इ होत कि बजाय ँकरे कि उ इन छोटकन मँ स  
कउनो क पाप करइ क हुस्कारि देइ, ओकरे गटइया  
मँ चकरी क पाट टाँगिके ओका समुदर मँ ढकेल  
दीन्ह जात । ३ होसियार रहा !

“जदि तोहार भाई पाप करइ तउ ओका डाटा  
अउर जदि उ आपन किहे प पछताइ तउ ओका  
छिमा कइ द्या । ४ अगर हर दिना उ सात दाई पाप  
करइ अउर सातहु दाई लौटिके तोहसे कहइ कि  
मोका पछतावा अहइ तो तू ओका छिमा कइ द्या ।”

तोहार बिसवास केतना बड़वार अहइ

५ ँह पइ प्रेरितन पभूस कहेन, ‘हमरे बिसवास  
क बढ़ोतरी करा !”

६ पभूस कहेस, “जदि तोहमाँ सरसों क दाना क  
तरह बिसवास होत तो तू इ सहतूत क बूच्छ स  
कहि सकत ह ‘उखड़ि जा अउर समुदर मँ जाइके  
लगा ।’ अउर उ तोहार बात मान लेत ।

उत्तमि सेक्कन बनि जा

७ “मान ल्या तोहमाँ स कउनो क लगे एक दास  
अहइ जउन हर जोतत या भेड़न क चरावत ह । उ  
जब खेते स लौटिके आवइ तउ का ओकर स्वामी  
ओसे कही, ‘तुरन्त आवा अउर खइया क खाइ बैठि  
जा ?’ ८ मुला बजाय ँकरे का उ ओसे न कही, ‘मोर  
भोजन तइयार करा, आपन ओढ़ना पहिरा अउर  
मोर खात पिअत क खइया परसा, तबहिँ ँकरे  
पाछे तू भी खाइ पी सकत ह ।’ ९ का उ आपन हुकुम  
पूरा करइ प का उ सेवक क बिसेस धन्यवाद देत ह ?

नाहीं। १० तोहरे संग भी अइसा ही अहइ। जउन कछू करइ क तोहसे कहा ग अहइ, ओका कइ डाए क पाछे तोहका कहइ चाही, 'हम नालायक दास अही हमका कउन बड़कई न चाही। हम तउ आपन कर्तब कीन्ह ह।'"

आभारी रहा

११ फिन जब ईसू यरूसलेम जात रहा तउ उ सामरिया अउर गलील क बीच क चउहई क लगे स निकरा। १२ उ जब एक गाउँ मँ जात रहा तबहि दस कोढ़ी ओका मिलेन। उ सबइ कछू दूरी प खड़ा रहेन। १३ उ पचे ऊँच आवाज मँ बोलेन, "हे ईसू! हे स्वामी! हम प दाया करा!"

१४ फिन जब उ ओनका लखेस तउ उ बोला, "जा अउर आपन खुद क याजकन क देखावा।"

उ सबइ जात ही रहेन कि कोढ़ स छुटकारा पाएन। १५ मुला ओहमाँ स एक जब इ देखेस कि उ चंगा होइ ग अहइ, तउ उ वापस लौटा अउर ऊँच आवाज मँ परमेस्सर क गुन गावइ लाग। १६ उ मुँहना धइके ईसू क गोड़वा पर गिरि गवा अउर ओकर एहसान मानेस। (उ एक सामरी रहा।) १७ ईसू ओसे पूछेस, "का सबहि दस क दसउ कोढ़ स छुटकारा नाहीं पाएन? फिन उ सबइ नौ कहाँ वाटेन? १८ का केवल सामरी क तजिके ओहमाँ स कउनो भी परमेस्सर क स्तुति करइ वापस नाहीं लौटा?" १९ फिन ईसू ओसे कहेस, "खड़ा ह्वा अउर चला जा, तोहार बिसवास तोहका चंगा किहेस ह।"

परमेस्सर क राज्य तोहरे भीतर बा

(मत्ती २४ : २३-२८ ; ३७-४१)

२० एक दाई जब फरीसियन ईसू स पूछेन, "परमेस्सर क राज्य कब आई?"

तउ उ ओनका जवाब दिहस, "परमेस्सर क राज्य अइसे परगट होइके नाहीं आवत। २१ मनइयन इ न कइहीं, 'उ हिआँ अहइ!' या 'उ हुवाँ अहइ!' काहेकि परमेस्सर क राज्य तउ तोहरे भीतर ही अहइ।"

२२ मुला चेलन उ बोलाएस, "अइसा समइ आइ जब तू मनई क पूत क दिनन मँ स एक दिन क भी तरसब्या मुला, ओका न लख पउब्या। २३ अउर मनइयन तोहसे कइहीं, 'देखा, हिआँ!' या 'देखा, हुवाँ!' तू हुवाँ जिन जा या ओकर पाछे जिन जा।

जब ईसू लौटी

२४ "वइसे ही जइसे बिजुरी चमकिके एक छोर स दूसर छोर मँ चमकत ह, वइसे ही मनई क पूत भी आपन दिन मँ परगट होइ। २५ मुला ओका पहिले बहोत स दारुण दुःख झेलइ क होइ अउर इ पीढ़ी क जरिए उ जरूर ही न मान्न होइ।

२६ "वइसे ही जइसे नूह क दिनन मँ भवा रहा, मनई क पूत क दिनन मँ भी होइ। २७ उ दिना तलक जब नूह नाउ मँ बइठा, मनई खात पिअत रहेन, बियाह करत रहेन, अउर बियाह मँ दीन्ह जात रहेन। फिन जल परलइ आइ अउर उ सबन क नास कइ दिहस।

२८ "इहइ तरह होइ जइसे लूत क दिना मँ भी भवा रहा। मनइयन खात पिअत रहेन, बेसहत रहेन, बेचत रहेन अउर खेती अउर घर बनवत रहेन। २९ मुला उ दिन जब लूत सदोम स बाहेर निकरा तउ अकास स आगी अउर गंधक बरसइ लाग अउर उ सबइ बर्बाद होइ गएन। ३० उ दिना भी जब मनई क पूत परगट होइ, ठीक अइसे ही होइ।

३१ "उ दिन जदि कउनो मनई छूते प होइ अउर ओकर सामान घरे क भीतर होइ तउ ओका उठावइ बरे तरखाले न उतरइ। इहइ तरह जदि कउनो मनई खेते मँ होइ तउ उ पाछे न लौटइ। ३२ लूत क पत्नी क याद करा,

३३ "जउन कउनो आपन जिन्नगी बचावइ क जतन करी, उ ओका खोइ देइ अउर जउन आपन जिन्नगी खोइ, उ ओका बचाइ लेइ। ३४ मई तोहका बतावत हउँ, उ राति एक खटिया प जउन दुइ मनई होइहीं, ओहमाँ स एक उठाइ लीन्ह जाइ अउर दूसर छोर दीन्ह जाइ। ३५ दुइ स्त्रियन एक संग चकरी चलावत होइहीं, ओहमाँ स एक उठाइ लीन्ह जाइ अउर दूसर स्त्री छोर दीन्ह आइ।" ३६ §§

३७ फिन ईसू क चेलन ओसे पूछेन, "हे पर्भू, अइसा कहाँ होइ?"

उ ओनसे कहेस, "जहाँ ल्हास पडी होइ, गिद्ध भी हुवँइ एकट्ठा होइहीं।"

परमेस्सर आपन मनइयन क जरूर सुनी

१८ फिन ईसू चेलन क इ बतावइ बरे एक दिस्टान्त कथा सुनाएस कि उ पचे

§§१७ : ३६ कछू यूनानी प्रतियन मँ पद ३६ जोड़ा गवा अहइ : "दुइ ठु पुरुसन जउन खेतवा मँ होइहीं, ओहमाँ स एक उठाइ लीन्ह जाइ अउर दूसर छोड़ दीन्ह जाइ।"

लगातार पराधना करत रहइँ अउर निरास न होइँ । उ इ दिस्टान्त कथा कहेस: २ “कउनो सहर मँ एक न्यायाधीस होत रहा । उ न तो परमेस्सर स डेरात रहा अउर न ही मनइयन क परवाह करत रहा । ३ उहइ सहर मँ, अब लखा एक टु विधवा भी रहत रही । अउर उ ओनके लगे बार बार आवत अउर कहत, ‘देखा, मोरे बरे कीन्ह गवा अनिआउ क खिलाफ निआउ मिलइ चाही!’ ४ तउ एक लम्बा समइ तलक तउ उ न्यायाधीस नाही चाहत रहा मुला आखिर मँ उ आपन मने मँ सोचेस, ‘चाहे मई परमेस्सर स न डेरात हउँ अउर न मनइयन क परवाह करत हउँ । ५ तउ भी काहेकि इ विधवा स मोर कान पक ग अहइँ तउ मई देखिहउँ कि ओका निआउ मिलि जाइ जेहसे इ मोरे लगे कइउ दाइँ आइके कहूँ मोरे नाक मँ दम करि देइ ।”

६ फिन पर्भू कहेस, “देखा ! उ दुस्ट न्यायाधीस का कहे रहा । ७ तउ का परमेस्सर आपन चुना भए मनइयन प धियान न देइ कि ओनका, जउन ओका राति दिन टेरत ही, निआव मिलइ ? का उ ओनकइ मदद करइ मँ देर लगई ? ८ मई तोहसे कहत हउँ कि उ ओनका जल्दी निआव देई । फिन भी जब मनई क पूत आइ तउ का उ धरती प बिसवास पाई ?”

दीन होइके परमेस्सर क आराधना

९ फिन ईसू ओन मनइयन बरे जउन आपन क नेक तउ मानत रहेन, अउर कउनो क कछू नाही समझतेन, इ दिस्टान्त कथा सुनाएस: १० “मन्दिर मँ दुइ मनई पराधना करत रहेन, एक फरीसी रहा अउर दूसर चुंगी (टेक्स) क उगहिया । ११ उ फरीसी अलग खड़ा होइके इ पराधना करइ लाग, हे परमेस्सर मई तोहार धन्यवाद करत हउँ कि मई दूसर मनइयन जउन डाकू, टग अउर व्यभिचार नाही हउँ अउर न ही इ चुंगी उगहिया जइसा हउँ । १२ मई हप्ता मँ दुइ दाई उपास राखत हउँ अउर आपन समूची आमदनी क दसवाँ हीसा दान मँ दइ देत हउँ ।”

१३ “मुला उ चुंगी उगहिया जउन दूर खड़ा रहा अउर हिआँ तलक कि सरगे कइँती आपन आँखिन उठाइके नाही लखत रहा, आपन छतिया पीटत भवा बोला, हे परमेस्सर, मोहे पापी प द्या कर ! १४ मई तोहका बतावत हउँ, इहइ मनई धर्मी कहवाइके आपन घरे लौट गवा, न कि उ दूसर । काहेकि हर उ मनई जउन आपन खुद क बड़का

समझी, ओका छोटका बनइ दीन्ह जाइ अउर जउन दीन मानी, ओका बड़का बनइ दीन्ह जाइ ।”

गदेलन परमेस्सर क सच्चा हकदार अहइँ

(मत्ती १९ :१३-१५ ; मरकुस १० :१३-१६)

१५ मनई आपन गदेलन तलक ईसू क लगे लइ आवत रहेन कि उ ओनका छू भरि देइ । मुला जब ओकर चेलन इ लखेन तउ ओनका झड़पेन । १६ मुला ईसू गदेलन क लगे बोलाएस अउर चेलन स कहेस, “इ नान्ह गदेलन क मोरे लगे आवइ द्या, एनका जिन रोका, काहेकि परमेस्सर क राज्य अइसन क अहइ । १७ मई सच कहत हउँ कि जउन परमेस्सर क राज्य इ गदेलन क नाई ग्रहण नाही करत ह, ओहमाँ कवहुँ घुसि न पाई ।”

एक धनी मनई क ईसू स सवाल

(मत्ती १९ :१६-३० ; मरकुस १० :१७-३१)

१८ फिन कउनो यहूदी नेता ईसू स पूछेस, “उत्तिम गुरु, अनन्त जीवन क हक पावइ बरे मोका का करइ चाही ?”

१९ ईसू ओसे कहेस, “तू मोका उत्तिम काहे कहत अहा ? सिरिफ परमेस्सर क तजिके अउर कउनो भी उत्तिम नाही अहइ । २० तू परमेस्सर क हुकुम क तो जानत अहा : ‘व्यभिचार जिन करा, कतल जिन करा, चोरी जिन करा, झूठी साच्छी जिन द्या, आपन बाप अउर महतारी क आदर करा ।” \*

२१ उ यहूदी नेता बोला, “मई इन बातन क आपन लरिकाई स मानत आवा हउँ !”

२२ ईसू जब इ सुनेस तउ उ ओसे बोला, “अबही एक बात अहइ जेकर तोहमाँ कमी अहइ । तोहरे लगे जउन कछू अहइ, सब कछू क बेचि डावा अउर फिन जउन मिलइ, ओका गरीबन मँ बाँटा । एँहसे तोहका सरगे मँ भण्डारा मिली । फिन आवा अउर मोरे पाछे होइ जा ।” २३ तउ जब यहूदी नेता सुनेस तउ उ बहोत दुःखी भवा, काहेकि उ बहुत अमीर रहा ।

२४ ईसू जब ई देखेस कि उ बहोत दुःखी अहइ तउ उ कहेस, “ओन मनइयन बरे जेनके लगे धन बा, परमेस्सर क राज्य मँ घुसि पाउब केतना मुस्किल अहइ । २५ हाँ, कउनो ऊँट बरे सुई क नोक स निकरि जाव तउ सहज बा मुला कउनो धनी मनई क परमेस्सर क राज्य मँ घुस पाउब सहल नाही अहइ !”

केकर उद्धार होइ ?

२६ उ मनइयन जउन इ सुनेन, बोलेन, “फिन भला उद्धार केकर होइ ?”

२७ ईसू कहेस, “उ बातन जउन मनइयन बरे नाही होइ सकतीं, परमेस्सर बरे होइ सकत हीं !”

२८ फिन पतरस कहेस, “देखा, तोहरे पाछे चलइ बरे हम उ सब कछू तजि दीन्ह ह जउन हमरे पास रहा !”

२९ तब ईसू ओनसे बोला, “मई तोहसे सच कहत हउं, अइसा कउनो नाही जउन परमेस्सर क राज्य बरे घर-बार, पत्नी या भाइयन या महतारी बाप या संतान क तजि दिहे होइ, ३० अउर ओका इहइ जुग मँ कइउ कइउ गुना जिआदा न मिलइ अउर आवइवाला समइ मँ उ अनन्त जीवन क न पाइ जाइ !”

ईसू मरिके जी उठी

(मत्ती २० :१७-१९ ; मरकुस १० :३२-३४)

३१ फिन ईसू ओन बारहु क एक कइती लइ जाइके ओनसे बोला, “सुना, हम यरूसलेम जात अही। मनई क पूत क बारे मँ नबियन क जरिये जउन कछू लिखा गवा अहइ, उ पूर होइ। ३२ हाँ, उ गैर यहूदियन क सौंप दीन्ह जाइ, ओकर मसखरी उड़ाइ जाइ, उ कोसा जाइ अउर ओह पइ थूक दीन्ह जाइ। ३३ फिन उ सबइ ओका पिटिहीं अउर मारि डइहीं अउर तीसर दिन फिन जी जाई।”

३४ एहमाँ स कउनो भी बात उ सबइ नाही समुझ सकेन। इ कहब ओनसे छुपा ही रही गवा कि उ कउने बारे मँ बतावत रहा।

आँधर क आँखिन

(मत्ती २० :२९-३४ ; मरकुस १० :४६-५२)

३५ ईसू जब यरीहो क लगे पहुँचा रहा तउ भीख माँगत भवा एक आँधर, हुवई राह किनारे बइटा रहा। ३६ आँधर जब मनइयन क जाइ क आवाज सुनेस तउ उ पूछेस, “का होत अहइ ?”

३७ तउ मनइयन ओसे कहेन, “नासरत क ईसू हिआँ स जात अहइ।”

३८ तउ आँधर इ कहत भवा पुकार उठा, “दाऊद क पूत, ईसू। मोहे प द्या करा !”

३९ उ जउन अगवा चलत रहेन उ पचे ओसे खमोस रहइ क कहेन, मुला उ अउर जिआदा पुकारइ लाग, “दाऊद क पूत मोरे प द्या करा !”

४० ईसू थम गवा अउर उ हुकुम दिहेस कि आँधर क ओकरे लगे लइ आवा जाइ ! तउ जब उ नगिचे

आवा तउ ईसू ओसे पूछेस, ४१ “तू का चाहत ह, मई तोहरे बरे का करउ ?”

उ कहेस, “पभू, मई फिन स देखइ चाहत हउँ।”

४२ एह पइ ईसू कहेस, “तोहका जोति मिलइ, तोहार बिसवास स तोहार उद्धार भवा ह।”

४३ अउर फउरन ही ओका आँखिन मिल गइन। उ परमेस्सर क महिमा क बखान करत भवा ईसू क पाछे होइ गवा। जब सब मनइयन इ देखेन तउ उ पचे परमेस्सर क स्तुति करइ लागेन।

जक्कई

१ फिन ईसू यरीहो मँ घुसिके जब हुवाँ स जात रहा। २ तो हुवाँ जक्कई नाउँ क एक मनई भी हाजिर रहा। उ चुंगी (टैक्स) उगहियन मुखिया रहा। तउ उ बहोत धनी रहा। ३ उ इ देखइ क जतन करत रहा कि ईसू कउन अहइ, मुला भिडिया क कारण उ देख नाही पावत रहा काहेकि ओकर कद छोटवार राह। ४ तउ उ सबन क अगवा धावत भवा एक टु गुलरी क बूच्छ प जाइ चढ़ा जेहसे, उ ओका निहारि सकइ काहेकि ईसू क उहइ रास्ता स होइके निकरइ क रहा।

५ फिन जब ईसू उ ठउरे प आवा तउ उ ऊपर लखत भवा जक्कई स कहेस, “जक्कई, हाली स नीचे उतरि आवा काहेकि मोका आजु तोहरे ही घरे प रुकइ चाही।”

६ तउ उ तड़फइ नीचे उतरिके खुसी क संग ओकर अगवानी किहेस। ७ जब सबहिँ मनइयन इ लखेन तउ उ पचे बड़बड़ाइ लागेन अउर बोलेन, “अरे इ एक पापी क घर मेहमान बनइ जात अहइ।”

८ मुला जक्कई खड़ा भवा अउर पभू स बोला, “हे पभू देखा, मई आपन सारी धन दौलत क आधा हीसा गरीब गुरबन क दइ देब अउर जदि मई कउनो क छल कइके कछू भी छीना ह तउ ओका चौगुना कइके लौटाइ देब !”

९ ईसू ओसे कहेस, “इ घरे प आज उद्धार आइ गवा ह, काहेकि इ मनई भी इबराहीम क ही संतान अहइ। १० काहेकि मनई क पूत भी जउन कउनो हेराइ गवा अहइ, ओका ढूँढ़इ अउर ओकर उद्धार करइ आवा ह।”

परमेस्सर जउन देत ह ओका बैपरा

(मत्ती २५ :१४-३०)

११ जब उ मनइयन इ बातन क सुनत रहेन तउ ईसू ओनका एक दिस्तान्त कथा सुनाएस काहेकि ईसू यरूसलेम क नगिचे रहा अउर उ पचे सोचत

रहेन कि परमेस्सर क राज्य तुरंत ही परगट होइ जात अहइ।<sup>१२</sup> तउ ईसू कहेस, “एक ऊँच कुल क मनई राजा क पद पावइ बरे कउनो परदेस में गवा।<sup>१३</sup> तउ उ आपन दस नउकरन क बोलाएस अउर ओनमाँ स हर एक क एक एक थैली दिहस अउर ओनसे कहेस, ‘जब ताई मई लौटउँ, एँसे कउनो बियापार करा।’<sup>१४</sup> मुला सहर क दूसर मनई ओसे धिना करत रहेन, एह बरे उ पचे ओकर पाछे इ कहइ क एक प्रतिनिधि मण्डत पठएस, ‘हम नाही चाहित कि इ मनई हम पइ राज करइ।’

<sup>१५</sup> “मुला उ राजा क पववी पाइ गवा। फिन जब उ वापस लौटा तउ जउन नउकरन क उ धन दिहे रहा ओनका इ जानइ बरे कि उ सबइ कउन लाभ कमाइ लिहन ह, उ बोलाँवा पठएस।<sup>१६</sup> पहिला आइ अउर बोला, ‘स्वामी, तोहार थैलियन स मई दस अउर थैली कमाउँ ह!’<sup>१७</sup> एह पइ ओकर स्वामी ओसे कहेस, ‘उत्तम नउकर तू नीक किहा ह। काहेकि तू इ छोटकी सी बात प बिसवास क जोगग रहा। तू दस सहरन क अधिकारी होब्या।’

<sup>१८</sup> “फिन दूसर नउकर आवा अउर बोला, ‘स्वामी तोर थैलियन स मई पाँच अउर थैली कमायउँ ह!’<sup>१९</sup> फिन उ एँहसे कहेस, ‘तू पाँच सहरन क ऊपर राज करब्या।’

<sup>२०</sup> “फिन एक दूसर नउकर आवा अउर बोला, ‘स्वामी इ रही तोहार थैली जेका मई अँगौछा मँ बाँधिके कहुँ रख दिहे रहेउँ।’<sup>२१</sup> मई तोहसे डेरात रहत हउँ, काहेकि तू एक कठोर मनई अहा। तू जउन रख्या नाही ह तू ओका भी लइ लेत ह अउर जउन तू बोया नाही ओका काटत ह!’

<sup>२२</sup> “मालिक ओसे कहेस, ‘अरे दुस्ट नउकर! मई तोहरे आपन सब्दन क ऊपर तोहार निआव करब। तू तो जानत ही ह कि मई जउन राखत नाही हउँ, ओका भी लइ लेइवाला अउर जउन बोवत नाही ओका बी काटइवाला कठोर मनई हउँ?’<sup>२३</sup> तउ फिन तू मोर धन बियाज प काहे नाही लगाया ताकि मई अबहुँ वापस आवत होतउँ तउ बियाज क साथ ओका लइ लेतउँ।’<sup>२४</sup> फिन लगे खड़ा मनइयन स उ कहेस, ‘एँकर थैली एँहसे लइ ल्या अउर जेकरे लगे दस थैली अहइ ओका दइ द्या।’

<sup>२५</sup> “एँह पइ उ सबइ ओसे बोलेन, ‘मालिक, ओकरे लगे तउ दस थैली अहइ!’

<sup>२६</sup> “मालिक कहेस, ‘मई तोहसे कहत हउँ हर एक उ मनई क जेकरे लगे अहइ अउर जिआदा दीन्ह जाइ अउर जेकरे पास नाही अहइ, ओसे

जउन ओकरे लगे अहइ, उ भी छीन लीन्ह जाइ।<sup>२७</sup> मुला मोर उ बैरी जउन नाही चाहतेन कि मई ओन पइ हुकूमत करउँ जेनका हिआँ मोरे समन्वा लावा अउर मारि डावा।”

ईसू क यरूसलेम मँ घुसब

(मत्ती २१:१-११; मरकुस

११:१-११; यूहन्ना १२:१२-१९)

<sup>२८</sup> इ बातन कहि चुके क पाछे ईसू अगवा चलत भवा यरूसलेम कइती बढइ लाग।<sup>२९</sup> अउर फिन जब उ बैतफगे अउर बैतनिय्याह मँ उ पहाड़ी क नगिचे पहुँचा जउन जैतून क पर्वतन कही जात रही तउ उ आपन दुइ चेलन क इ कहिके पठएस कि<sup>३०</sup> “इ जउन गाउँ तोहरे समन्वा अहइ, हुवाँ जा। जइसे ही तू हुवाँ घुसब्या, तोहका गदही क बच्चा हुवाँ बाँधा भवा मिली। जेहँ पइ कउनो कबहुँ सवारी नाही किहे होइ, ओका खोलिके हिआँ लिआवा।<sup>३१</sup> अउर जदि कउनो तोहसे पूछइ तू एँका काहे खोलत अहा, तो तोहका ओसे इ कहब अहइ, ‘पर्भू क चाही।”

<sup>३२</sup> फिन जेनका पठवा ग रहा, उ पचे गएन अउर ईसू जइसा ओनका बताए रहा, ओनका बइसा ही मिला।<sup>३३</sup> तउ जब उ सबइ बचवा क खोलत ही रहेन, ओकर मालिक लोगन ओनसे पूछेन, “तू इ बचवा क काहे खोलत बाटया?”<sup>३४</sup> उ पचे कहेन, “इ पर्भू क चाही।”<sup>३५</sup> फिन उ पचे ओका ईसू क लगे लइ आएन। उ पचे आपन ओढ़ना उ बच्चा प ओढ़ाइ दिहेन अउर ईसू क ओह पइ बइटाइ दिहेन।<sup>३६</sup> ईसू जब जात रहा तउ मनइयन आपन ओढ़ना सड़क पइ बिछावत जात रहेन।

<sup>३७</sup> अउर फिन जब उ जैतून क पर्वतन स तलहटी क लगे आवा तउ चेलन क समूची भीड़ ओन सबहिं अजूबा कामे बरे, जउन उ पचे लखे रहेन, ऊँच आवाज मँ खुसी स परमेस्सर क स्तुति करइ लागेन।<sup>३८</sup> उ पचे पुकारेन;

“राजा उ धन्य अहइ, आवत ह जउन नाउँ मँ पर्भू (परमेस्सर) क!†

सरगे मँ सान्ति होइ, अउर अकास मँ महिमा होइ परमेस्सर क!”

<sup>३९</sup> भिड़िया मँ खड़ा भएन कछू फरीसियन ओसे कहेन, “गुरु, चेलन क मना करा!”

<sup>४०</sup> तउ उ जवाब दिहस, “मई तोहसे कहत हउँ जदि इ सबइ खामोस होइ जाइ तउ उ सबइ पाथर चिचियइही।”

ईसू यरूसलेम बरे रोड पड़ा

११ जब उ नगिचे आइके सहर क लखेस तउ उ ओह प रोड पड़ा। १२ अउर बोला, “जदि तू बस आजु इहइ जानत होत्या कि कउन तोहका सान्ति देइ मुला अब उ तोहरी आँखी स ओझर होइ गवा बा। १३ उ दिनन तोहे प अइहीं जब तोहरे बैरी चारिहुँ कइँती अइचन खड़ी कइ देइहीं। उ सबइ तोहका घेरि लेइहीं अउर सब कइँती स तोह पइ दबाव डइहीं। १४ उ सबइ तोहका धूरी मँ मिलइहीं। तोहका अउर तोहरे दीवार क भीतर रहइवालन गदेलन क। तोहरी चहरदीवारे क भीतर उ सबइ तोहरे मकाने क एक पथरा भी ना छोड़िहइँ। काहेकि जब परमेस्सर तोहरे लगे आइ, तू उ घड़ी क नाहीं पहिचान्या।”

ईसू मंदिर मँ

(मत्ती २१:१२-१७; मरकुस

११:१५-१९; यूहन्ना २:१३-२२)

१५ फिन ईसू मंदिर मँ घुसा अउर जउन हुवाँ दुकानदारी करत रहेन ओनका बाहेर निकारइ लाग। १६ उ ओनसे कहेस, “पवित्र सास्तर मँ लिखा ग अहइ, ‘मोर घर पराथना घर होइ।’ मुला तू पचे एँका ‘डाकुअन क अइडा बनए अहा।’”

१७ अब तो हर दिन मंदिर मँ उपदेस देइ लाग। मुख्ययाजकन, धरम सास्तिरियन अउर मुखिया मनइयन ओका मार डावइ क ताक मँ रहइ लागेन। १८ मुला ओनका अइसा कइ डावइ क कउनो अउसर न मिल पावा काहेकि मनइयन ओकरे बचन क बहोत मान्नाता देत रहेन।

ईसू स यहूदियन क सवाल

(मत्ती २१:२३-२७; मरकुस ११:२७-३३)

२० १ एक दिन जब ईसू मंदिर मँ मनइयन क उपदेस देत भवा सुसमाचार सुनावत रहा तउ मुख्ययाजकन अउर धरम सास्तिरियन, बुजुर्ग यहूदी नेतन क संग ओकरे लगे आएन। २ उ पचे ओसे पूछेन, “हमका बतावा तू इ काम कउनो अधिकार स करत अहा? उ कउन अहइ जउन तोहका इ अधिकार दिहे अहइ?”

३ ईसू ओनका जवाब दिहस, “मई भी तोहसे एक सवाल पूछत हउँ, तू मोका बतावा ‘यूहन्ना क

बपतिस्मा देइ क अधिकार सरग स मिला रहा या मनई स?”

५ एँह पइ आपुस मँ बिचार क चर्चा करत भवा उ पचे बोलेन, “जदि हम कहित ह, ‘सरग स’ तउ इ कही, ‘तउ तू ओह प बिसवास काहे नाहीं किहा?’ ६ अउर अगर हम कही, ‘मनई स’ तउ सबहीं मनई हम पइ पाथर फेकिहीं। काहेकि उ सबइ इ मानत हीं कि यूहन्ना एक नबी रहा।” ७ तउ उ सबइ जवाब दिहेन कि उ पचे नाहीं जानतेन कि उ अधिकार कहाँ स मिला।

८ फिन ईसू ओनसे कहेस, “तउ मई भी तोहका नाहीं बताउव कि इ चीज मई कउनो अधिकारे स करत हउँ!”

परमेस्सर आपन पूत क पठवत ह

(मत्ती २१:३३-४६; मरकुस १२:१-१२)

१ फिन ईसू मनइयन स आपन दिस्टांत कथा कहइ लाग: “कउनो मनई अंगूरे क बगिया लगाइके ओका कछ्छू किसानन क लगाने प दिहस अउर उ बहोत दिना तक कहुँ चला गवा। १० जब फसल काटइ क समइ आइ, तउ उ एक नउकर क किसानन क लगे पठाएस ताकि उ पचे ओका अंगूरे क बगिचा क कछ्छू फल दइ देइ। मुला किसानन ओका मार पीटिके खाली हाथ लौटाइ दिहेन। ११ उ तब एक नउकर हुवाँ पठाएस। मुला उ पचे ओकर टोंकाइ कइ डापन। उ सबइ ओकरे संग बहोत बुरा ब्यौहार किहेन। अउर ओका भी खाली हाथे लौटाइ दिहेन। १२ एँह पइ उ एक तिसरा नउकर पठाएस मुला उ पचे एँके भी घायल कइके बाहेल ढकेल दिहेन।

१३ “तब तउ बगिया क मालिक कहइ लाग, ‘मोका का करइ चाही? मई आपन पियारे बेटवा क पठउव साइद उ पचे ओकर इज्जत करिहइँ!’

१४ मुला किसानन जब ओकरे बेटवा का लखेन तउ आपुस मँ सोच बिचारि करत भए बोलेन, ‘इ तउ बारिस अहइ, आवा एँका मारि डाइ जेहसे बारिस हमार होइ जाइ!’ १५ अउर उ पचे ओका बगिया स बाहेर खदेरेके मारि डापन।

“तउ फिन बगिया क मालिक ओनके संग का करी? १६ उ आइ अउर ओन किसानन क मारि डाइ अउर अंगूरे क बगिया अउरन क सौँपि देइ।”

उ पचे जब इ सुनेन तउ उ सबइ बोलेन, “अइसा कबहूँ न होइ चाही!” १७ तब ईसू ओनकइ कइँती

११:१५:४६ उद्धृत यसा. ५६:७

११:१५:४६ उद्धृत यिर्म. ७:११

निहारत भवा कहेस, “तउ फिन इ जउन लिखा अहइ ओकर अरथ का अहइ :

‘जउने पाथर क राजगीर बेकार समझ लिहे रहेन उहइ कोनवा क प्रमुख पाथर बन गवा’ ? §

१८ हर कउनो जउन उ पाथर प गिरी चूर चूर होइ जाइ अउर जेहँ पइ उ गिरी चकनाचूर होइ जाइ !”

१९ धरम सास्तिरियन अउर मुख्ययाजकन कउनो रास्ता ढूँढीके ओका पकड़ि लेइ चाहत रहेन काहेकि उ ताड़ ग रहेन कि उ इ दिस्टान्त कथा ओनके खिलाफ कहेस ह। मुला उ पचे मनइयन स डेरात रहेन।

यहूदी नेतन क चाल

(मत्ती २२ :१५-२२ ; मरकुस १२ :१३-१७)

२० तउ उ पचे होसियारी स ओह प निगाह राखइ लागेन। उ पचे अइसे खुफिया पठएन जउन ईमानदार होइ क सुआंग रचत रहेन। (ताकि उ सबइ ओकर कही भइ कउनो बातन मँ फँसाइके राज्यपाल क सक्ती व अधिकारे क मातहत कर देई।) २१ तउ उ पचे ओसे पूछत भए कहेन, “गुरु, हम जानित ह कि जउन नीक अहइ अउर उहइ क तू कहत अउर उपदेस देत अहा अउर न ही कउनो क पच्छ लेत ह। मुला तू सचाई स परमेस्सर क रास्ता क उपदेस देत अहा। २२ तउ बतावा कैसर क हमका चुंगी (टैक्स) देब नीक वा या नाही चुकाउब ?”

२३ ईसू ओनकइ चाल क ताड़ गवा रहा। तउ उ ओनसे कहेस, २४ “मोका एक दीनार देखावा, एँह पइ मूरति अउर लिखाइ केकर अहइ ?”

उ सबइ कहेन, “कैसर का।”

२५ एँह पइ उ ओनसे बोला, “तउ फिन जउन कैसर क अहइ, ओका कैसर क द्या। अउर जउन परमेस्सर क अहइ ओका परमेस्सर क।”

२६ उ पचे ओकरे जवाब प चकित होइके चुप रहि गएन अउर उ मनइयन क समन्वा जउन कछू कहे रहा, ओह पइ ओका पकड़ि नाही पाएन।

ईसू क धरइ बरे सद्कियन क चाल

(मत्ती २२ :२३-३३ ; मरकुस १२ :१८-२७)

२७ अब देखा कछू सद्कियन ओकरे लगे आएन। (इ सबइ सद्कियन उ रहेन जउन फिन स जी उठब का नाही मनतेन।) उ पचे ओसे पूछत

भए कहेन, २८ “गुरु, मूसा हमरे बरे लिखा वा कि जदि कउनो क भाई मरि जाइ अउर ओकरे कउनो बचवा न होइ अउर ओकर पत्नी होइ तउ ओकर भाई विधवा स बियाहिके आपन मरे भए भाई बरे, ओसे संतान पइदा करइ। २९ अब देखा, सात भाइयन रहेन। पहिला भाइ कउनो स्त्री स बियाह किहेस अउर उ बे संतान क ही मरि गवा। ३० फिन दूसर भाई ओसे बियाहेस, ३१ अउर अइसे ही तीसर भाई ओसे बियाहेस। सबन क संग एक जइसा ही भवा। उ पचे बे संताने क मर गएन। ३२ पाछे उ स्त्री भी मरि गइ। ३३ अब बतावा, फिन स जी उठे प उ केकर पत्नी होइ काहेकि ओसे तउ सातहु ही बियाहे रहेन ?”

३४ तब ईसू ओसे कहेस, “इ जुग क मनई बियाह करत हीं अउर बियाह कइके बिदा होत हीं। ३५ मुला उ मनइयन जउन मरे भएन मँ स जी जाइ बरे अउर आवइवाले जुग मँ भाग लेइ क जोग्य ठहराइ दीन्ह ग अहइ, उ पचे न तउ बियाह करिहीं अउर न ही बियाह कइके बिदा कीन्ह जइहीं। ३६ अउर उ फिन कबहुँ मरिहीं भी नाही, काहेकि उ पचे सरगदूतन क नाई अहइ, उ पचे परमेस्सर क संतान अहइ काहेकि उ पचे पुनरुत्थान क पूत अहइ। ३७ मूसा तलक झाड़ी स जुड़ा भवा अनुच्छेद मँ देखाएस ह कि उ पचे मरे भएन मँ स जिआवा ग अहइ, जबकि उ कहेस पभूँ, ‘इब्राहीम क परमेस्सर, इसहाक क परमेस्सर अउर याकूब क परमेस्सर’ \*\*अहइ। ३८ उ मरे भएन क नाही मुला जिअत क परमेस्सर अहइ। उ सबइ मनइयन जउन ओकर अहइ, जिअत अहइ।”

३९ कछू धरम सास्तिरियन कहेन, “गुरु, नीक कह्या।” ४० काहेकि फिन ओसे कउनो अउर सवाल पूछइ क हिम्मत नाही कइ सकेन।

मसीह क दाऊद क पूत अहइ ?

(मत्ती २२ :४१-४६ ; मरकुस १२ :३५-३७)

४१ ईसू ओसे कहेस, “उ पचे कहत हीं कि मसीह दाऊद क पूत अहइ। इ कइसे होइ सकत ह ? ४२ काहेकि भजन संहिता क किताब मँ दाऊद खुद कहत ह:

‘पभूँ (परमेस्सर) मोरे पभूँ (मसीह) स कहेस; मोरे दाहिन हाथ बइटा,

§२० :१७ उद्धृत भजन संहिता ११८ :२२

\*\*२० :३७ उद्धृत निर्गा. ३ :६

४३ जब तलक कि मई तोहरे बैरियन क तोहरे गोड़ धरइ क चउकी न बनाइ देउँ ।<sup>††</sup>

४४ इ तरह जब दाऊद मसीह क 'पभू' कहत ह तउ मसीह दाऊद क पूत कइसे होइ सकत ह"

धरम सास्तिरियन क खिलाफ ईसू क चिताउनी

(मत्ती २३ :१-३६ ; मरकुस

१२ :३८-४० ; लूका ११ :३७-५४)

४५ सबहीं मनइयन क सुनत उ आपन मनवइयन स कहेस, "धरम सास्तिरियन स होसियार रहा । उ लम्बा चोगा पहिरिके इज्जत क संग बाजारन मँ सुआगत सम्मान पावइ चाहत हीं । अउर आराधनालय मँ ओनका सबस जिआदा प्रमुख आसन क ललक रहत ह । दाउतन मँ उ सबइ इज्जत स भरा आसन चाहत हीं ।<sup>४७</sup> उ पचे विधवन क अकसर धोखा देत हीं अउर ओनकर मकान लइ लेत हीं । देखॉवा बरे उ पचे बड़ी बड़ी पराथना करत हीं । इन मनइयन क कड़ी स कड़ी सजा भुगुतइ पड़ी ।"

सच्चा दान

(मत्ती १२ :४१-४४)

२१ ईसू आपन अँखिया उठाइके देखेस कि धनी लोग दान पातर मँ आपन आपन भेंट चढावत अहइँ ।<sup>२</sup> तबहीं उ एक गरीब विधवा क ओहमाँ, ताँबे क दुइ नान्ह सिक्का नावत भइ लखेस ।<sup>३</sup> उ कहेस, "मई तोहसे सच कहत हूँ कि दूसर सबहीं मनइयन स इ विधवा जिआदा दान दिहेस ह ।<sup>४</sup> इ मई इ बरे कहत हउँ काहेकि इ सबहीं मनइयन आपन उ धने मँ स जेकर ओनका जरूरत नाही रही, दान दिहे रहेन मुला इ विधवा गरीब होत भइ जिन्ना रहइ बरे जउन कछू ओकर लगे रहा, सब कछू दइ डाएस ।"

मन्दिर क बिनास

(मत्ती २४ :१-१४ ; मरकुस १३ :१-१३)

५ कछू चेलन मन्दिर क बारे मँ बतियात रहेन कि उ मंदिर सुन्नर पथरन अउर परमेस्सर की दीन्ह गइ मनौती क भेंट स कइसे सजाना ग बा !

६ तबहिँ ईसू कहेस, "अइसा समइ आइ जब, इ जउन कछू तू देखत अहा, ओहमाँ एक पाथर दूसर पाथर टिक न रह पाइ । उ सबइ ढहाइ दीन्ह जइहीं !"

७ उ पचे ओसे पूछत भए बोलेन, "गुरु, इ बातन कब होइहीं ? अउर इ बातन जउन होइवाली अहइँ, ओकर कउन चीन्हा होइहीं ?"

८ ईसू कहेस, "होसियार रहा, कहुँ कउनो तोहका छल न लेइ । काहेकि मोरे नाउँ स बहोत मनइयन अइहीं अउर कइहीं, 'मई मसीह अहउँ' अउर 'समइ आइ पहुँचा अहइ' । ओनके पाछे, जिन जा ।<sup>९</sup> परन्तु जब तू जुद्ध अउर दंगा क बात सुना तउ जिन डेराअ काहेकि इ बातन तउ पहिले घटि जइहीं । अउर ओनकइ अंत फउरन न होइ ।"

१० उ ओनसे फिन कहेस, "एक जाति दूसर जाति क खिलाफ खड़ी होइ अउर एक राज्य दूसर राज्य क खिलाफ ।<sup>११</sup> बड़ा बड़ा भुइँडोल अइहीं अउर अनेक जगहन प अकाल पड़िहीं अउर महामारी आइ । अकासे मँ खौफनाक घटना घटिहीं अउर भारी चीन्हा परगट होइहीं ।

१२ "मुला इ सबन घटना स पहिले तोहका बंदी बनइ डइहीं अउर तोहका दारुण दुःख देइहीं । उ सबइ तोह प जुर्म लगावइ बरे तोहका आराधनालय क सौँपिहीं अउर फिन तोहका जेल पठइ दीन्ह जाइ । अउर फिन मोरे नाउँ क कारण उ पचे तोहका राजा लोग अउर राज्यपाल क समन्वा लइ जइहीं ।<sup>१३</sup> एँसे तोहका मोरे बारे मँ साच्छी देइ क अउसर मिली ।<sup>१४</sup> एह बरे पहिले स ही एँकर फिकिर न करइ क निहचइ कइ ल्या कि आपन बचाव कइसे करब्या ।<sup>१५</sup> काहेकि अइसी बुद्धि अउर सब्द तोहका मई देब कि तोहार कउनो भी बैरी तोहार सामना अउर तोहार खण्डन नाही कइ सकी ।<sup>१६</sup> मुला तोहार महतारी बाप, भाई, बन्धु, नातेदार अउर मीत भी तोहका धोखा स पकड़वइहीं अउर तोहमाँ स कछू क तउ मरवाइ ही डइहीं ।<sup>१७</sup> मोरे कारण सब ताँसे बैर रखिहीं ।<sup>१८</sup> मुला तोहरे मूँडे क एक बार बाँका नाही होइ ।<sup>१९</sup> तोहार सहइ क सकती, तोहरे प्रान क रच्छा करी ।

यरूसलेम क नास

(मत्ती २४ :१५-२१ ; मरकुस १३ :१४-१९)

२० "अब लखा जब यरूसलेम क तू फऊज स घिरा देखब्या तउ समुझ लिहा कि ओकर तहस नहस होइ जाब नगिचे अहइ ।<sup>२१</sup> तब तउ जउन यहूदिया मँ होइ, ओनका चाही कि उ पचे पहाड़न प पराइ जाइ अउर उ सबइ जउन सहर क भीतर होइ, बाहेर निकर आवइ अउर उ पचे जउन गाउँ मँ



होई ओनका सहर मँ नाही जाइ चाही।<sup>२२</sup> काहेकि उ दिनन सजा क होइहीं। एँहसे जउन लिखा ग वाटइ, उ सबहीं पूर होइ।<sup>२३</sup> उ स्त्रियन बरे, जउन पेटवा स भारी होइहीं अउर ओनके बरे जउन दूध पिआवत होइहीं, उ दिनन केतना खौफनाक होइहीं। काहेकि उ दिनन धरती प बहोत बड़की बिपत आइ इ मनइयन प परमेस्सर कोहाइ जाइ।<sup>२४</sup> उ सबइ तरवारे क धार स गिरा दीन्ह जइहीं अउर कैदी बनइके सब देसन मँ पहुँचाइ दीन्ह जइहीं। अउर यरूसलेम बे यहूदियन क गोडवा तरे तब तलक रौद जाइ जब तलक गैर यहूदियन क समइ पूर नाही होइ जात।

डेराअ जिन

(मत्ती २४ :२९-३१ ; मरकुस १३ :२४-२७)

<sup>२५</sup> “सूरज चाँद अउर तारन मँ चीन्हा परगत होइहीं अउर धरती प क सबहिँ रास्ट्रन प बिपत आइ अउर उ सबइ समुद्र क आवाज अउर उधर-पुथर स घबराइ उठिहीं।<sup>२६</sup> मनइयन डर अउर संसार प आवइ वाली बिपत क भय से बेहोस होइ जइहीं काहेकि आकास क सक्ती हलोर दीन्ह जाइ।<sup>२७</sup> अउर तबहिँ उ पचे मनई क पूत क आपन सक्ती अउर महान महिमा क एक बादर आवत भवा देखिहीं।<sup>२८</sup> अब देखा, इ बातन जब घटइ लागइ तउ खड़ा होइके तू आपन मूँड ऊपर उठाइ ल्या। काहेकि तोहार छुटकारा नगिचे आइ रही होइ !”

मोर बचन अमर वा

(मत्ती २४ :३२-३५ ; मरकुस १३ :२८-३१)

<sup>२९</sup> फिन एक टु डिस्टान्त कथा कहेस: “अउर सबहिँ बृच्छन अउर अंजीरे क बिरवा लखा।<sup>३०</sup> ओहमाँ स जइसे ही कोंपर फूटत हीं, तू आपन आप जान जात ह कि गर्मी क रितु बस आइ ग अहइ।<sup>३१</sup> वइसे ही तू जब इ बातन क घटतइ देख्या तउ जान लिहा कि परमेस्सर क राज्य नगिचे अहइ।

<sup>३२</sup> “मई तोहसे सच कहत हउँ कि जब तलक इ सब बातन घटि नाही जातिन, इ पीढी क अंत नाही होइ! <sup>३३</sup> धरती अउर अकास बरिवाद होइ जइहीं, पर मोर बचन हमेसा अटल रही!

हमेसा तइयार रहा

<sup>३४</sup> “आपन धियान राखा जेहसे तोहार मन कहुँ पिअइ पिआवइ अउर संसारे क फिकिर स पाथर न होइ जाइ। अउर उ दिन एक फंदा क तरह

तोह प एकाएक न आइ पड़इ।<sup>३५</sup> सचमुच ही उ इ सारी धरती क बसइयन पइ अइसे ही आइ गिरी।<sup>३६</sup> हर छिन होसियार रहा, अउर पराथना करा कि तोहका इ सब बातन स, जउन घटइवाली अहई, बचइ क ताकत मिलइ अउर तू मनई क पूत क समन्वा खड़ा होइ सका।”

<sup>३७</sup> हर रोज मंदिर मँ उपदेस देत रहा मुला, राति बीति जाइ प हर साँझ जैतून पर्वत प चला जात रहा।<sup>३८</sup> सबहीं मनई भिन्सारे क तड़के उठत रहेन अउर मंदिर मँ ओकरे लगे जाइके, ओका सुनत रहेन।

ईसू क मार डावइ क कुचाल

(मत्ती २६ :१-५ ; १४-१६ ; मरकुस

१४ :१-२, १०-११ ; यूहन्ना ११ :४५-५३)

**२२** <sup>१</sup> अब फसइ नाउँ क बे खमीरे क रोटी क त्यौहार आवइ क रहा। <sup>२</sup> ओहँर मुख्य याजकन अउर धरम सास्त्रियन काहेकि मनइयन स डेरात रहेन एह बरे कउनो अइसे चाल क ताक मँ रहेन जेहसे उ ईसू क मारि डावइँ।

यहूदा क कुचाल

<sup>३</sup> फिन इस्करियोति कहावइवाला उ यहूदा मँ, जउन उन बारहु मँ एक रहा, सइतान समाइ गवा।<sup>४</sup> उ मुख्ययाजकन अउर सैनिकन क लगे गवा अउर ओनसे ईसू क कइसे पकड़वाइ सकत ह, इ बारे मँ बातचीत किहस।<sup>५</sup> उ सबइ बहोत खुस भएन अउर ओका एँकरे बरे धन देइ क राजी होइ गएन।<sup>६</sup> उ भी राजी होइ गवा अउर उ अइसे अउसरे क ताड़ मँ रहइ लाग जब भीड़-बड़ी न होइ अउर उ ईसू का ओकरे हथवा मँ धराइ देइ।

फसह क तइयारी

(मत्ती २६ :१७-२५ ; मरकुस

१४ :१२-२१ ; यूहन्ना १३ :२१-३०)

<sup>७</sup> फिन बे खमीर क रोटी क उ दिन आवा जब फसह क मेमने क बलि दीन्ह जात ह।<sup>८</sup> तउ उ इ कहत भवा पतरस अउर यूहन्ना क पटाएस, “जा अउर हमरे बरे फसह क भोज तइयार करा जैसे हम पचे ओका खाइ सकी।”

<sup>९</sup> उ सबइ ओसे पूछेन, “तू हम पचन स ओकर तइयारी कहाँ करावइ चाहत ह?”

उ ओनसे कहेस,<sup>१०</sup> “तू जइसे ही सहर मँ घुसब्या तोहका पानी क गगरी लइ जात भवा एक मनई मिली, ओकरे पाछे होइ जाया अउ प जउन घरे मँ उ जाइ तू भी पाछे चला जाया।<sup>११</sup> अउर घरे

क स्वामी स कहा गुुरु, तोहसे पूछेस ह कि उ मेहमान क कमरा कहाँ बा जहाँ मई आपन चलन क संग फसह क भोज क खइया क खाइ सकउँ।' १२ फिन उ मनई सिद्धियन क ऊपर तोहका सजा सजावा एक बड़ा कमरा देखाई, हुवई तइयारी कर्यो।"

१३ उ पचे चल पड़ेन अउर वइसा ही पाएन जइसा उ ओनका बताए रहे। फिन उ पचे फसह क भोज क तइयार किहेन।

परभू भोज

(मत्ती २६ :२६-३० ; मरकुस १४ :२२-२६ ;  
१ कुरिन्थियन ११ :२३-२५)

१४ फिन उ घड़ी आइ तब ईसू खाइ बरे बइठा अउर परेरितन ओनके साथ बइठेन। १५ उ ओनसे कहेस, "यातना झेलइ स पहिले इ फसह क भोज संग करइ क मोर प्रबल इच्छा रही। १६ काहेकि मई तोहसे कहत हउँ कि जब तलक परमेस्सर क राज्य मँ फसह क भोज का पूरा मतलब न समझ लिया तब तलक मई एँका दूसरी दाई न खाव।"

१७ फिन उ खोरा उठाइके धन्यवाद दिहेस अउर कहेस, "ल्या एँका आपुस मँ बाँटि ल्या। १८ काहेकि मई तोहसे कहत हउँ आजु क पाछे जब ताई परमेस्सर क राज्य नाही आइ जात मई कइसी भी दाखरस कबहुँ न पिअव।"

१९ फिन उ तनिक रोटी लिहस अउर धन्यवाद दिहस। उ रोटी का तोड़ेस अउर ओनका देत भवा कहेस, "इ मोर देह अहइ जउन तोहरे बरे दीन्ह ग अहइ। मोरे याद मँ अइसा ही कर्यो।" २० अइसे ही जब उ पचे भोजन कइ चुकेन तउ उ खोरा उठाएस अउर कहेस, "इ दाखरस मोरे उ लहू क रूप मँ एक नवा करार क प्रतीक अहइ जउन तोहरे बरे उड़ेला गवा अहइ।"

ईसू क बैरी कउन

२१ "मुला देखा, मोका जउन धोखा स पकड़वाइ, ओकर हाथ हिअँइ मेजे प मोर संग अहइ। २२ काहेकि मनई क पूत तउ मारा ही जाइ जइसा कि तइ अहइ मुला धिक्कार उ मनई क अहइ जेकरे जरिए उ पकड़वाइ जाइ।"

२३ एँह पइ उ आपुस मँ एक दुसरे स सवाल करइ लागेन, "ओहमाँ स उ कउन होइ सकत ह जउन अइसा करइ जात अहइ?"

सेवक बना

२४ फिन ओहमाँ इ बात भी उठी कि ओहमाँ स सब स बड़कवा केका समुझा जावइ २५ मुला ईसू ओनसे कहेस, "गैर यहूदियन क राजा ओन प रुतवा राखत हीं अउर उ सबइ जउन ओन प हुकुम चलावत हीं, खुद मनइयन क 'उपकारी' कहवावत हीं। २६ मुला तू वइसे नाही अहा तउ भी तोहमाँ स सब स बड़कावा सब ते छोटकवा जइसा होइ चाही अउर जउन राज करत ह ओका चाकर क नाई होइ चाही। २७ काहेकि बड़कवा कउन अहइ : उ जउन खाइ क मेज प बइठा अहइ या उ जउन परसत ह का उहइ नाही जउन मेज प अहइँ मुला तोहरे बीच मई वइसा हउँ जउन परोसत ह !

२८ "मुला तू उ सबइ अहा जउन मोरी परीच्छा मँ मोर साथ दिहा ह। २९ अउर मई तोहका वइसे ही एक राज्य देत अही जइसे मोर परमपिता एँका मोका दिहे रहेन। ३० काहेकि मोरे राज्य मँ तू मोरे मेज प खा अउर पिआ अउर इस्राएल क बारहू जनजातिन क निआव करत भवा सिंहासने प बइठा।

बिसवास बनाई राखा

(मत्ती २६ :३१-३५ ; मरकुस  
१४ :२७-३१ ; यूहन्ना १३ :३६-३८)

३१ "सुना, तू सबन क गोहूँ क तरह फटकइ बरे सइतान चुन लिहे बा। समौन, ओ समौन ! ३२ मई तोहरे बरे पराथना कीन्ह ह कि जेहसे की परमेस्सर पर तोहार बिसवास खतम न होइ अउर जब तू वापस आवा तउ तोहरे भाइयन क ताकत बड़इ।"

३३ मुला समौन ओसे कहेस, "परभू, मई तोहरे संग जेल जाइ अउर मरइ तलक तइयार अहउँ।"

३४ फिन ईसू कहेस, "पतरस मई तोहसे बतावत हउँ कि आजु तब तलक मुर्गा बाँग न देइ जब ताई तू तीन दाई मना नाही कइ लेब्या कि तू मोका जानत ह !"

दारुण दुःख झेलइ क तइयार रहा

३५ फिन ईसू आपन चलन स कहेस, "मई तोहका जब बे बटुआ बे थैली या बे चप्पल क पठाए रहेउँ तउ का तोहका कउनो चीजे क कमी रही?"

उ पचे कहेन, "कउनो चीजे क नाही।"

३६ उ ओनसे कहेस, "मुला अब जउन कउनो क लगे भी कउनो बटुआ अहइ, उ ओका लइ लेइ अउर थैला भी लइ लेइ अउर उ थैला क भी लइके चलइ। जेकरे लगे तरवार न होइ, उ आपन

चोगा तलक बेंचिके ओका बेसहि लेइ।<sup>३७</sup> काहेकि मई तोहका बतावत हउँ कि पवित्र सास्तर क इ लिखा मोह प सचमुच ही पूरा होइ जाइ :

‘उ एक अपराधी माना गवा।’<sup>##</sup> हौं मारे बारे मँ लिखी गइ इ बात पूरा होइ जाइ प आवति अहइ।”

<sup>३८</sup> उ सबइ कहेन, “पभू, देखा हिआँ दुइ तरवार अहई।”

एह प ओनसे कहेस, “बस बहोत अहइ।”

प्रेरितन क पराथना क हुकुम

(मत्ती २६ :३६-४६ ; मरकुस १४ :३२-४२)

<sup>३९-४०</sup> फिन उ हुवाँ स उठिके रोज क तरह जैतून पर्वत प चला गवा। अउर ओकर चलन भी ओकरे पाछे पाछे होइ गएन। उ जब उ ठउरे प पहुँचा तउ उ ओनसे कहेस, “पराथना करा कि तोहका परीच्छा मँ न पडइ क होइ।”

<sup>४१</sup> फिन उ ओनसे पाथर फेंकई क तरह पूरी दूरी तक चला गवा। फिन उ घुटना क सहारे निहुरा अउर पराथना करइ लाग, <sup>४२</sup> “हे परमपिता, अगर तोहार इच्छा होइ इ यातना क कटोरा मोहसे दूर हटावा मुला फिन भी नाही बल्कि तोहार इच्छा पूरा होई।” <sup>४३</sup> तबहीं एक सरगदत हुवाँ परगट भवा अउर ओका सक्ती देइ लाग। <sup>४४</sup> ओहर ईसू व्याकुल होइके बड़े आग्रह पूर्वक पराथना करइ लाग। ओकर पसीना लोहू क बूँदे क नाई धरती पइ गिरत रहा। <sup>४५</sup> अउर जब उ पराथना स उठिके आपन चलन क लगे आवा तउ उ ओनका दुःखे मँ थकिके सोवत पावा। <sup>४६</sup> तउ उ ओनसे कहेस, “तू पचे सोवत काहे अहा ? उठा अउर पराथना करा कि तू कउनो परीच्छा मँ न पडा।”

ईसू क बंदी बनाउव

(मत्ती २६ :४७-५६ ; मरकुस

१४ :४३-५० ; यूहन्ना १८ :३-११)

<sup>४७</sup> उ अबहीं बोलत ही रहा कि एक भीड़ जमा होइ गइ। यहूदा नाउँ क एक मनई जउन बारहु मँ स एक रहा, ओनकइ अगुवई करत रहा। उ ईसू क चुम्मा लेइ ओकरे लंगे आवा।

<sup>४८</sup> मुला ईसू ओनसे कहेस, “अरे यहूदा का तू एक चुम्मा स मनई क पूत क धोखा दइके पकड़वावइ जात अहा ?” <sup>४९</sup> जउन घटइ जात रहा, ओका लखिके ओकरे नगिचे क मनइयन कहेन, “पभू का हम पचे तरवारि क वार करी ?”

<sup>५०</sup> अउर ओहमाँ स एक तउ महायाजक क नउकर प वारि कइके ओकर दाहिन कान काट डाएस।

<sup>५१</sup> मुला ईसू फउरन कहेस, “ओनका इ भी करइ द्या।” फिन ईसू ओकर कनवा छुइके चंगा किहेस।

<sup>५२</sup> फिन ईसू ओह प चढ़ाई करइ आएन मुख्ययाजकन, मन्दिर क सैनिकन अउर बुजुर्गं यहूदी नेतन स कहेस, “का तू तरवारि अउर लाठिन लइके कउनो डाकू क मुकाबला करइ निकरा अहा ?” <sup>५३</sup> मन्दिर मँ मई हर दिन तोहरे ही संग रहेउं, मुला तु मोह पइ हाथ नाही राख्या। मुला इ समइ तोहार अहइ-अंधियारे (पाप) क हुकुम क काल।”

पतरस क इन्कार

(मत्ती २६ :५७-५८, ६९-७५ ;

मरकुस १४ :५३-५४, ६६-७२ ;

यूहन्ना १८ :१२-१८ ; २५-२७)

<sup>५४</sup> उ पचे ओका कैदी बनाइ लिहन अउर हुवाँ स लइ गएन। फिन उ सबइ ओका महायाजक क घर लइ गएन। पतरस कछू दूरी प ओकरे पाछे पाछे आवत रहा। <sup>५५</sup> अँगन क बीच उ पचे आगी सुलगएन अउर एक साथे खाले बैठि गएन। पतरस भी हुवई ओनहीं मँ बइठा रहा। <sup>५६</sup> आगी क रोसनी मँ एक नउकरानी ओका हुवाँ बइठे लखेस। उ ओह पइ आँखी गड़ावत भइ कहेस, “इ मनई तउ ओकरे साथे भी रहा।”

<sup>५७</sup> मुला पतरस इन्कार करत भवा कहेस, “हे स्त्री, मई ओका नाही जानत हउँ।” <sup>५८</sup> तनिक दरे पाछे एक ठु दूसर मनई ओका लखेस अउर कहेस, “तू भी ओनहीं मँ स एक अहइ।”

मुला पतरस बोला, “भल मनई, मई उ नाही हउँ।”

<sup>५९</sup> कउनो लगभग एक घड़ी बीत भइ होइ कि कउनो अउर भी जोर स कहइ लाग, “सचमुच ही इ मनई ओकरे संग भी रहा। काहेकि लखा उ गलील वासी भी अहइ।”

<sup>६०</sup> मुला पतरस बोला, “भल मनई, मई नाही जानता हउँ तू केकरे बारे मँ बतियात अहा।”

उहइ घड़ी, उ अबहीं बातन करत ही रहा कि एक ठु मुर्गा बाँग दिहस। <sup>६१</sup> अउर पभू मुड़िके पतरस पइ आँखी गड़ाएस। तबहिं पतरस क पभू क उ वचन याद आवा जउन उ ओसे कहे रहा : “आजु मुर्गा क बाँग देइ स पहिले मोका तीन दाई मुकरि

जाब्या।” ६२ तब उ बाहेर चला गवा अउर फूटि फूटि को रोवइ लाग।

ईसू क मसखरी

(मत्ती २६ :६७-६८ ; मरकुस १४ :६५)

६३ जउन मनइयन ईसू क धइ राखे रहेन उ पचे ओकर मसखरी अउर ओका टोकइ लागेन। ६४ ओकरे आँखी प पट्टी बाँधि दिहन अउर ओसे इ कहत भए पूछइ लागेन, “भविस्सबाणी करा! उ कउन अहइ जउन तोहका मारेस!” ६५ उ सबइ ओका बेज्जत करइ बरे ओसे अउर भी बातन कहेन।

ईसू यहूदी नेतन क समन्वा

(मत्ती २६ :५९-६६ ; मरकुस

१४ :५५-६४ ; यूहन्ना १८ :१९-२४)

६६ जबहिं दिन भवा कि मुख्ययाजकन अउर धरम सास्तिरियन संग मनइयन क बुजुर्ग नेतन क एक सभा भइ। फिन उ पचे ओका आपन महासभा मँ लइ गएन। ६७ उ सबइ पूछेन, “हमका बतावा का तू मसीह अहा?”

ईसू ओनसे कहेस, “जदि मई तोहसे कहउँ तउ तू मोर बिसवास नाही करब्या। ६८ अउर जदि मई पूछउँ तउ तू जवाब नाही देब्या। ६९ मुला अब स मनई क पूत सबन स सक्तीवाला परमेस्सर क दाहिन कइती बइटाइ जाइ।”

७० उ पचे बोलेन, “तब तउ का तू परमेस्सर क पूत अहा?” उ कहेस, “हाँ, मई हउँ।”

७१ फिन उ पचे कहेन, “अब हमका कउनो अउर प्रमाण क जरूरत नाही अहइ? हम पचे खुद एकरे आपन मुँहना स इ सुन तउ लिहा ह।”

पिलातुस ईसू स पूछताछ किहेस

(मत्ती २७ :१-२, ११-१४ ; मरकुस

१५ :१-५ ; यूहन्ना १८ :२८-३८)

२३ १ फिन सारा जमघट खड़ा होइ गवा अउर ओका पिलातुस क समन्वा लइ गवा २ अउर उ पचे ओह पइ इ दोख लगावइ लागेन। उ सबइ कहेन, “हम पचे इ मनई का हमरे मनइयन क बहकावत भए धरा ह। इ कैसर क चुंगी (टैक्स) चुकावइ बरे खिलाफत करत ह अउर कहत ह इ खुद मसीह अहइ, एक राजा।”

३ एह पइ पिलातुस ओहसे पूछेस, “का तू यहूदियन क राजा अहा?”

ईसू ओका जवाब दिहास, “तू ठीक कहत रह्या कि मई उहइ हउँ।”

४ एह पइ पिलातुस मुख्ययाजकन अउर भीड़ से कहेस, “मोका इ मनई प कउनो दोख लगावइ क कउनो प्रमाण नाही देखॉइ देत।”

५ मुला उ पचे इ कहत भए दबाव डावत रहेन, “इ समूचइ यहूदिया मँ मनइयन क आपन उपदेस स भइकाएस ह। इ एंका गलील मँ सुरू किहे रहा अउर समूचइ रस्ता पार कइके हिआँ तलक आइ पहुँचा अहइ।”

ईसू क हेरोदेस क लगे पठउव

६ पिलातुस इ सुनिके पूछेस, “का इ मनई गलील क अहइ?” ७ फिन जब ओका इ पता लाग कि उ हेरोदेस क अधिकार पहुँटा क मातहत अहइ तउ उ ओका हेरोदेस क लगे पठाएस जउन उ समइ यरूसलेम मँ ही रहा।

८ तउ हेरोदेस जब ईसू क निहारेस तउ उ बहोत खुस भवा काहेकि बरिसन स ओका लखइ चाहत रहा। काहेकि उ ओकरे बारे सुनि चुका रहा अउर ओका कउनो अद्भुत कारज करत भवा लखइ क आसा करत रहा। ९ उ ईसू स ढेर सवाल किहेस मुला ईसू ओका कउनो जवाब नाही दिहेस। १० मुख्ययाजकन अउर धरम सास्तिरियन हुवँइ खड़ा रहेन अउर उ सबइ ओह प बुरी तरह स जुर्म लगावत रहेन। ११ हेरोदेस भी आपन सैनिकन क संग ओकर बेज्जत ब्यौहार किहेस अउर ओकर मसखरि उड़ाएस। फिन उ सबइ ओका एक उत्तिम चोगा पहिराइ के पिलातुस क लगे वापस पठइ दिहेस। १२ उ दिन हेरोदेस अउर पिलातुस एक दूसर क मीत होइ गएन। एँसे पहिले तउ एक दूसर क बैरी रहेन।

ईसू क मरब रहा

(मत्ती २७ :१५-२६ ; मरकुस

१५ :६-१५ ; यूहन्ना १८ :३९-१९ :१६)

१३ फिन पिलातुस मुख्ययाजकन, यहूदी नेतन अउर मनइयन क एक संग बोलाएस। १४ उ ओनसे कहेस, “तू इ मनइयन क बहकावइ वाला मनई क रूप मँ हिआँ मोरे लगे लइ आए अहा। अउर मई हिआँ अब तोहरे समन्वा ही एँकर जाँच पड़ताल कइ लीन्ह ह अउर तू एँह पइ जउन दोख लगाया ह ओकर न तउ कउनो टोस सबूत मिलि पावा ह। १५ नाही हेरोदेस क काहेकि उ एँका वापस हमरे लगे पठइ दिहेस ह। जइसा कि तू लखत अहा कि इ अइसा कछू नाही किहे अहइ कि इ मउत

क काबिल अहइ। १६ यह बरे मई एँका कोड़ा स पिटवाइ क छोड़ देवूँ।” १७ ॥

१८ मुला उ सबइ एक संग चिल्लाएन, “इ मनई क लइ जा। हमरे बरे बरअब्बा क तजि द्या।” १९ (बरअब्बा क सहर मँ मार धाड़ अउर कतल बरे जेल मँ धाँधा गवा रहा।)

२० पिलातुस ईसू क तजि देइ चाहत रहा, तउ उ ओनका समझाएस। २१ मुला उ पचे नारा लगावत रहेन, “एँका क्रूस प चढ़ाइ द्या, एँका क्रूस प चढ़ाइ द्या।”

२२ पिलातुस ओनसे तिसरी दाई पूछेस, “मुला इ मनई जुम का किहे अहइ? मोका ओकरे खिलाफ कछू नाही मिला बाटइ जउन एँका मउत क सजा दीन्ह जाइ, एह बरे मई कोड़वा लगावाइ के एँका छोड़ि देइहउँ।”

२३ मुला उ सबइ ऊँच आवाज मँ नारा लगाइके माँग करत रहेन कि ओका क्रूसे प चढ़ाइ दीन्ह जाइ। अउर ओकइ नारा क कुलाहल एँतना बाढ़ि गवा क २४ पिलातुस फैसला किहेस कि ओनकइ माँग मान लीन्ह जाइ। २५ पिलातुस उ मनई क छोड़ दिहस जेका मार धाड़ अउर कतल बरे जेलि मँ धाँधा ग रहा (इ उहइ रहा जेकरे तजि देइ क उ पचे माँग करत रहेन।) अउर ईसू क ओकरे हाथन मँ सौपि दिहन कि उ सबइ जइसा चाहइ, करइ।

ईसू क क्रूस प चढ़ावा जाव

(मत्ती २७:३२-४४; मरकुस

१५:२१-३२; यूहन्ना १९:१७-२७)

२६ जब उ सबइ ईसू क लइ जात रहेन तउ उ पचे कुरेनी क बसइया समौन नाउँ क एक मनई क, जउन आपन खेते स आवत रहा, धइ लिहन, अउर ओह पइ क्रूस लादिके ओका ईसू क पाछे, पाछे चलइ क मजबूर कइ दिहन।

२७ मनइयन एक भारी भीड़ ओकरे पाछे चलत रही। एहमां कछू स्त्रियन भी रहिन जउन ओकरे बरे रोवत रहिन अउर बिलापत रहिन। २८ ईसू ओनके कइँती मुड़ि गवा अउर बोला, “यरूसलेम क स्त्रियो, मोरे बरे जिन बिलापा बल्कि तू पचे आपन बरे अउर आपन बचवन बरे बिलाप करा। २९ काहेकि अइसे दिनन आवत अहइँ जब मनइयन कइँही, उ सबइ स्त्रियन धन्य अहइँ, जउन बाँझ बाटिन अउर धन्य अहइँ, उ सबइ कोख

जउन कउनो क कबहूँ जनम ही नाही दिहन। उ सबइ चूची धन्य अहइँ कबहूँ दूध नाही पियाएन।” ३० फिन उ पचे पहाड़न स कइँही, “हम पइ फाटि पड़ा!” अउर पहाड़ियन स कइँही, “हमका ढाँकि ल्या!” ३१ काहेकि मनइयन जब वृच्छ हरियर बाटइ, ओकरे संग तब अइसा करत हीं तउ जब पेड़ झुराइ जाइ तब का होइ?”

३२ दुइ अउर मनई, जउन दुइनउँ ही अपराधी रहेन, ओकर संग मउत क सजा दिये बरे लइ जावा जात रहेन। ३३ फिन जब उ पचे उ ठउरे प आएन जउन खोपड़ी कहवावत ह तउ उ पचे ओन दुइउँ अपराधियन क संग ओका क्रूस प चढ़ाइ दिहन, एक अपराधी क ओकरे दाहिन कइँती अउर, दूसर क बाईँ कइँती।

३४ एँह पइ ईसू बोला, “हे परमपिता, एँनका छमा कर्या काहेकि इ पचे नाही जानतेन कि इ सबइ का करत अहइँ।”

फिन उ सबइ पौसा फेकिके ओकरे ओढ़ना क बाँटि लिहन। ३५ हुवाँ खड़ा भएन मनइयन लखत रहेन। यहूदी नेतन ओकर मसखरी करत भएन बोलेन, “इ दूसरन क उद्धार किहे अहइ। अगर उ परमेस्सर क चुना भवा मसीह अहइ तउ एँका आपन खुद क रच्छा करइ द्या।”

३६ सैनिकन भी आइके ओकर मसखरी उड़ाएन। उ पचे ओका दाखरस पिअइ क दिहेन ३७ अउर कहेन, “जदि तू यहूदियन क राजा अहा तउ आपन खुद क बचाइ ल्या।” ३८ (ओकरे ऊपर इ खबर छापी गइ “इ अहइ यहूदियन क राजा।”)

३९ हुवाँ लटकावा भवा अपराधियन मँ स एक ओका बेज्जत करत भवा कहेस, “का तू मसीह नाही अहइ? हमका अउर आपन खुद क बचाइ ल्या।”

४० मुला दूसर उ पहिले अपराधी क फटकारत भवा कहेस, “का तू परमेस्सर स नाही डेराल्या? तोहका भी उहइ सजा मिलति अहइ ४१ मुला हमार सजा तउ उचित निआव स भरी अहइ काहेकि हम जउन कछू कीन्ह, ओकरे बरे जउन हमका मिलइ चाही रहा, उहइ मिलत बा मुला इ मनई तउ कछू भी बुरा नाही किहेस।” ४२ फिन उ बोला, “ईसू, जब तू आपन राज्य मँ आवा तउ मोका याद राख्या।”

॥२३:१७ कछू युनानी प्रतियन मँ पद १७ जोड़ा गवा अहइ: “हर बरिस फसह क त्यौहार प पिलातुस क जनता बरे एँके कैदी क छोड़इ पड़त रहा।”

॥२३:३० उद्धृत होसे १०:८

४३ ईसू ओसे कहेस, “मई तोहसे सच कहत हउँ, आज ही तू सरगलोक मँ मोरे संग होब्या।”

ईसू क मउत

(मत्ती २७ : ४५-४६ ; मरकुस

१५ : ३३-४१ ; यूहन्ना १९ : २८-३०)

४४ उ समइ दिना क बारह बजा होइ तबहीं तीन बजे तलक समूची धरती प गहिर अँधियारा छाइ गवा। ४५ सूरज भी नाहीं चमकत रहा। ओहर मंदिर मँ परदे क फटे क दुइ टुका होइ गएन। ४६ ईसू ऊँच आवाज मँ पुकारेस, “हे परमपिता, मई आपन आतिमा तोहरे हाथे मँ सौंपत हउँ।” इ कहिके उ आखिरी साँस लिहेस।

४७ जब रोम क फऊजी नायक, जउन कछू घटि गवा रहा, उ लखेस तउ परमेस्सर क गुन गावत भवा उ कहेस, “इ सचमुच ही एक नीक मनई रहा।” ४८ जब हुवाँ देखइ आएन एकट्ठा मनइयन, जउन कछू भवा रहा, ओका देखेन तउ आपन छाती पीटत लौटि गएन। ४९ मुला उ सबइ जउन ओका जानत रहेन, ओन स्त्रियन संग, जउन गलील स पाछे पाछे आवत रहिन, इ बातन क लखइ कछू दूरी प खड़ा रहेन।

अरिमतियाह क यूसुफ

(मत्ती २७ : ५७-६१ ; मरकुस

१५ : ४२-४७ ; यूहन्ना १९ : ३८-४२)

५०-५१ अब हुवई ईसूफ नाउँ क मनई रहा जउन यहूदी महासभा क निअम्बर रहा। उ एक नीक धर्मी पुरुस रहा। उ ओनका फैसला अउर ओका काम मँ लावइ बरे राजी नाहीं रहा। उ यहूदियन क एक सहर अरमतिया क बसइया रहा। उ परमेस्सर क राज्य क बाट जोहत रहा। ५२ उ मनई पिलातुस क लगे गवा अउर ईसू क ल्हास माँगेस। ५३ उ ल्हास क कूस पइ स नीचे उतरा अउर सने क उत्तिम रेसा क बना कपड़ा मँ ओका लपेट दिहस। फिन उ ओका चट्टान मँ काटी गइ एक कबर मँ धइ दिहस, जेहमाँ पहिले कबहुँ कउनो क भी नाहीं राखा गवा रहा। ५४ उ सुकरवार क दिन रहा, अउर सबित सुरू होइ क रहा।

५५ उ सबइ स्त्रियन जउन गलील स ईसू क साथे आइ रहिन, यूसुफ क पाछे होइ चलिन। उ पचे उ कबर देखिन अउर लखेन कि ओकर ल्हास कबर मँ कइसे धरी गइ। ५६ फिन उ पचे घर लौटिके खुसबूदार सामग्री अउर लेप तइयार किहेन।

सबित क दिन व्यवस्था क मुताबिक उ पचे आराम किहेन।

ईसू क फिन जी उठव

(मत्ती २८ : १-१० ; मरकुस

१६ : १-८ ; यूहन्ना २० : १-१०)

२४ १ हफ्ता के पहिले दिन बहोत भिन्सारे उ सबइ स्त्रियन कबर पइ खुसबूदार सामग्री क, जेका उ पचे तइयार किहेन, लइके आइन। २ ओनका कबर पइ स लुढ़कि गवा पाथर मिला। ३ तउ उ पचे भीतर चली गइन मुला हुवाँ पभू ईसू क ल्हास नाहीं मिली। ४ उ सबइ एँह पइ अबहीं असमंजस मँ ही पड़ी रहिन कि, ओनके लगे चमचमात ओढ़ना पहिरे दुइ मनई (सरगदूतन) खड़ा भएन। ५ उर स उ पचे धरती कइती मुहना लटकाए रहिन। उ दुइ मनइयन ओनसे कहेन, “जउन जिअत अहइ, ओका तू मुर्दवन क बीच काहे हेरति अहा ? ६ उ हिआँ नाहीं अहइ। उ जी उठा बा। याद कर जब उ अबहीं गलील मँ रहा, उ तोहसे का कहे रहा। ७ उ कहे रहा कि मनई क पूत क पापी मनइयन क हाथ सौंप दीन्ह जाव तय अहइ। फिन उ कूस पइ चढ़ाइ दीन्ह जाइ अउर तिसरे दिन ओका फिन स जीवित कइ देव तय अहइ।” ८ तब ओन स्त्रियन क ओकर सब्द याद होइ गएन।

९ उ पचे कबर स लौटि आइन अउर उ सबइ सब बातन ओन ग्यारहु चेलन अउर दूसर सबन क बताएन। १० इ पचे स्त्रियन रहिन, मरियम मगदलीनी, योअन्ना अउर याकूब क महतारी मरियम। उ सबइ अउर ओनके साथे क दूसर स्त्रियन इ बातन क प्रेरितन स कहत रहिन। ११ मुला ओनके सब्द प्रेरितन क बृथा जानि पड़िन। तउ उ सबइ ओनका बिसवास नाहीं किहेन। १२ मुला पतरस खड़ा भवा अउर कबर कइती पराइ गवा। उ खाले निहुरिके लखेस मुला ओका सन क उत्तिम रेसम स बना कफन क अलावा कछू नाहीं देखाँइ दिहे रहा। फिन आपन मन ही जउन कछू भ रहा, ओहँ प अचरज करत भवा उ चला गवा।

इम्माऊस के रस्ते प

(मरकुस १६ : १२-१३)

१३ उहइ दिना ओकर चेलन मँ स दुइ, यरूसलेम स कउनो सात मील दूर बसा भवा इम्माऊस नाउँ क गाउँ क जात रहेन। १४ जउन घटना घटी रहिन, ओन सब प उ सबइ आपुस मँ बतियात रहेन। १५ जबहिँ उ सबइ ओन बातन प बातचीत अउर सोच विचार करत रहेन तबहीं खुद ईसू हुवाँ हाजिर भवा अउर साथे साथे चलइ लाग।

१६ (मुला ओनका ओका पहिचानइ स टोका गवा ।)

१७ ईसू ओनसे कहेस, “चलत चलत एक दुसरे स तू कउनो बातन प बतियत रह्या ?”

उ पचे चलत चलत थम गएन । उ पचे दुःखी देखौं देत रहेन । १५ ओहमाँ स किलयोपास नाउँ क एक मनई ओसे कहेस, “यरूसलेम मँ रहइवाला अकेल्ला तू ही अइसा मनई होव्या जउन पिछले दिनन जउन बातन घटी अहई, ओका नाही जानत्या ।”

१९ ईसू ओनसे पूछेस, “कउन सी बातन ?”

उ पचे ओसे कहेन, “सब नासरत क ईसू क बारे मँ अहई । इ एक अइसा मनई रहा जे जउन किहेस अउर कहेस ओहसे परमेस्सर अउर सबहीं मनइयन क समन्वा इ देखौं दिहस कि उ एक महान नबी रहा । २० अउर हम इ बारे मँ बातन करत रहेन कि हमरे मुख्ययाजकन अउर नेतन ओका कइसे मउत क सजा देइ बरे सौंपि दिहेन । अउर उ पचे ओका क्रूस प चढाइ दिहेन । २१ हमार आसा रही कि इहइ रहा उ जउन इस्राएल क अजाद करावत ।

“अउर इ सब कछू क अलावा इ घटना क भए आजु तीसर दिन अहइ २२ अउर हमरी टोली क कछू स्त्रियन हमका अचरजे मँ डाइ दिहेन ह । आजु भोर मँ भिन्सारे उ पचे कबर प गइन । २३ मुला ओनका ल्हास नाही मिली । उ सबइ लौटि आइन अउर हमका बताएन कि उ पचे सरगदूतन क दर्सन पाइ गइन ह जउन कहे रहेन कि उ जीवित अहइ । २४ फिन हम पचन मँ स कछू कबर प गएन अउर जइसा स्त्रियन बताए रहिन, उ पचे हुवाँ वइसा ही पाएन उ सबइ ओका नाही देखेन ।”

२५ तब ईसू ओनसे कहेस, “तू पचे केतना मूरख अहा अउर नबियन जउन कछू कहेन, ओह प बिसवास करइ मँ केतना धीमे अहा । २६ का मसीह बरे इ जरूरी नाही रहा कि उ इ दारूण दुःखन क झेलइ अउर इ तरह आपन महिमा मँ घुसि जाइ ?”

२७ अउर इ तरह मूसा स सुरू कइके सबहिं नबियन तलक अउर पवित्र सास्तरन मँ ओकरे बारे मँ जउन कहा गवा रहा, उ ओका खोलिके ओनका समझाएस ।

२८ उ पचे जब उ गाउँ क लगे आएन, जहाँ जात रहेन, ईसू अइसा बताव किहेस, जइसे ओका अगवा जाइके होइ । २९ मुला उ पचे ओसे जबदस्ती हट करत भए कहेन, “हमरे साथ ठहर जा काहेकि करीब करीब साँझ होइ गइ अहइ अउर अब दिन ओनवइ क रहा ।” तउ उ ओकरे संग ठहरइ भीतर आइ गवा ।

३० जब ओनके संग उ खइया क मेजे प रहा तबहीं उ रोटी उठाएस अउर धन्यवाद दिहस । फिन ओका तोड़िके जब उ ओनका देत रहा ३१ तबहीं ओनकइ आँखी खोलि दीन्ह गइ अउर उ पचे ओका पहिचान लिहन । मुला उ ओनके समन्वा स अन्तर्धान होइ गवा । ३२ फिन उ आपुस मँ बोलेन, “रास्ता मँ जब उ हमसे बात करत रहा अउर हमका पवित्र सास्तरन क समझावत रहा तउ का हमरे हिरदइ क भीरत आगी भी नाही भइक गइ ?”

३३ फिन उ तुरंत खड़ा भएन अउर वापस यरूसलेम क चल दिहेन । हुवाँ ओनका ग्यारहवाँ प्रेरित अउर दूसर ओनके संग एँकट्टा मिलेन, ३४ जउन कहत रहेन, “पभू, असल मँ जी उठा अहइ । उ समौन (पतरस) क दर्सन दिहेस ह ।”

३५ फिन उ दुइनउँ राह मँ जउन भवा रहा, ओकर ब्यौरा दिहेन अउर बताएन कि जब उ रोटी क कउर लिहेस, तब उ सबइ ईसू क पहिचान लिहन ।

ईसू क आपन चेलन क समन्वा परगट होब

(मत्ती २८ :१६-२० ; मरकुस १६ :१४-१८ ; यूहन्ना २० :१९-२३ ; प्रेरितन क काम १ :६-८)

३६ अबहीं उ पचे ओनका इ बातन बताइ ही रहत रहेन कि उ खुद ओनके बीच आइ खड़ा भवा अउर ओनसे बोला, “तोहका सान्ति मिलइ ।”

३७ मुला उ पचे चौकिके सहम गएन । उ पचे सोचेन जइसे उ सबइ कउनो भूत लखत होई । ३८ मुला उ ओनसे बोला, “तू अइसे घबरान काहे अहा ? तोहरे मनवा मँ सन्देह काहे उठति अहइ ? ३९ मोरे हाथन अउर मोरे गोड़े क लखा । तू देख सकत ह कि इ सच मँ मई अहउँ । मोका छुआ, अउर लखा कि कउनो भूत क माँस अउर हाइ नाही होतिन अउर जइसा कि तू लखत अहा कि, मोर उ सबइ अहई ।”

४० इ कहत भवा उ हाथ अउर गोड़ ओनका देखाएस । ४१ मुला आपन आनन्द क कारण उ पचे अब भी ओह पइ बिसवास नाही कइ सकेन । उ पचे भउचक्का रहेन । तउ ईसू ओनसे कहेस, “हिआँ तोहरे पास कछू खाइ क अहइ ।” ४२ उ पचे पकाइ गइ मछरी क एक टुकड़ा ओका दिहेन । ४३ अउर उ ओका लइके समन्वा खाएस ।

४४ फिन उ ओनसे कहेस, “ई बातन उ सबइ अहई जउन मई तोहसे तब कहे रहेउँ, जब मई अबहीं तोहरे संग हउँ । हर उ बात जउन मोरे बारे मँ मूसा क व्यवस्था मँ, नबियन क किताबन अउर भजन संहिता मँ लिखी अहइ, पूरी होब ही अहइ ।”

४५ फिन पवित्र सास्तरन क समझइ बरे उ ओनकइ बुद्धि क दुआर खोल दिहस। ४६ अउर उ ओनसे कहेस, “इ उहइ अहइ, जउन लिखा अहइ कि मसीह दारूण दुख भोगी अउर तिसरे दिन मरे हुअन मँ स जी उठी। ४७-४८ अउर पापे क छमा बरे मनफिराव क इ संदेस यरूसलेम स सुरु होइके सब देसन मँ प्रचार कीन्ह जाइ। तू इ बातन क साच्छी अहा। ४९ अउर अब मोरे परमपिता मोसे जउन सपथ किहेस ह, ओका मई तोहरे बरे पठउब। मुला तोहका इ सहर मँ उ समइ तलक ठहरे रहइ क होइ जब तक तू सरगे क सकती स जुरा न ह्वा।”

ईसू क सरग क वापसी

(मरकुस १६ :१९-२० ; प्रेरितन क काम १ :९-११)

५० ईसू फिन ओनका बैतनिय्याह तलक बाहेर लइ गवा अउर उहथवा उठाइके आसीबांद दिहेस। ५१ ओनका आसीबांद देत देत उ ओनका तजि दिहेस अउर फिन ओका सरगे मँ उठाइ लीन्ह गवा। ५२ तब उ पचे ओकर आराधना किहेन अउर असीम आनन्द लइके यरूसलेम लौटि आएन। ५३ अउर मंदिर मँ परमेस्वर क स्तुति करत भएन उ पचे आपन दिन काटइ लागेन।